

# PODIGNI NADU!

*Svaki dan očekuj  
da će ti se  
dogoditi nešto  
dobro*



JOYCE MEYER

---

## **JOYCE MEYER**

je jedna od vodećih svjetskih učitelja Biblije. Njena emisija, "Uživanje u svakodnevnom životu sa Joyce Meyer", se emituje na stotinama televizijskih mreža i radio stanica širom svijeta.

Joyce je napisala više od 100 inspirativnih knjiga.

Neki od njenih bestselera su: *Revolucija ljubavi, Lepota umesto pepela, Nikad nemoj odustati, Isceljenje slomljenog srca, Vođa u nastajanju, Power Thoughts; The Confident Woman; Look Great, Feel Great; Starting Your Day Right; Ending Your Day Right; The Every-day Life Bible; Approval Addiction; How to Hear from God; Beauty for Ashes; i Bojno polje uma.*

Joyce intenzivno putuje i cijele godine održava konferencije i govori hiljadama ljudi širom svijeta.

---

# PODIGNI NADU!

*Svaki dan očekuj da će ti se  
dogoditi nešto dobro*

.....

JOYCE MEYER

*Syloam*

**Naslov originala:** Get your hopes up! - expect something good to happen to you every day

**Autor:** Joyce Meyer

Copyright © 2015 by Joyce Meyer

Joyce Meyer Ministries – U.S. Headquarters

P.O. Box 655

Fenton, MO 63026

Copyright © 2015 za srpsko izdanje, Syloam

Sva prava pridržana

**Izdaje:** Syloam - Hrišćanska međunarodna misija

[syloam@syloam-international.org](mailto:syloam@syloam-international.org)

[www.syloam-international.org](http://www.syloam-international.org)

[www.media.syloam-international.org](http://www.media.syloam-international.org)

Černyševského 11, 851 01 Bratislava, Slovačka

**Za Izdavača:** Miroslav Fic

**Urednik:** Miroslav Čobrda

**Prijevod:** Sonja Rakić

**Lektura:** Sonja Rakić

**Prijelom:** Darko Brvenik

**Štampa:** 1909. Minerva

**Tiraž:** 5000 komada

**ISBN:** 978-80-89414-58-1

U ovoj knjizi autor je pretežno koristio navode iz Biblije *The Amplified Bible*. Prilikom prevodenja korištena su dva prevoda Biblije ("Živa Riječ" i "Savremeni srpski prevod"), dok je tekst koji se nalazi u zagradama, prevoden direktno sa engleskog, smještan je u stihove iz Biblije, tako da se ne mijenja njihov smisao već proširuje i dopunjava značenje, kao što je slučaj i kod Amplified Bible.

*Zabranjeno kopiranje ove knjige (djelimično ili u cijelosti) bez pismenog dopuštenja izdavača.*

# Sadržaj

UVODNA RIJEČ	5
<b>PRVI DIO</b> NADAJ SE VEĆEM	11
1. POGLAVLJE PODIGNI NIVO OČEKIVANJA	13
2. POGLAVLJE PRATI VOĐU	25
3. POGLAVLJE UOČI I ELIMINIŠI SVAKI "NE MOGU"	35
4. POGLAVLJE ENERGIJA NADE	45
5. POGLAVLJE UPOZNATI NOVOGA SEBE	57
<b>DRUGI DIO</b> NADATI SE KAD SI POVRIJEĐEN	67
6. POGLAVLJE GORE GLAVU	69
7. POGLAVLJE BROJI BLAGOSLOVE, A NE PROBLEME	79
8. POGLAVLJE RIJEČI NADE	89
9. POGLAVLJE NASTAVI DALJE	101
<b>TREĆI DIO</b> NADA I SREĆA	113
10. POGLAVLJE U SVEMU TRAŽI NEŠTO DOBRO	115
11. POGLAVLJE ZATVORENICI NADE	127
12. POGLAVLJE BUDI ODGOVOR NA NEČIJU MOLITVU	137
13. POGLAVLJE NADA JE NAŠE SIDRO	149

<b>ČETVRTI DIO</b> <b>NADA JE OVDJE</b>		<b>157</b>
POGLAVLJE 14	NE ČEKAJ SUTRA	159
15. POGLAVLJE	BOŽIJA PERSPEKTIVA	167
16. POGLAVLJE	IZBOR JE TVOJ	177
17. POGLAVLJE	NEKA SE NADA PRELIVA	187
	EPILOG	199
	DODATNI BIBLIJSKI STIHOVI O NADI	201
	O AUTORU	207

## Uvodna riječ

Bez vjere je Bogu nemoguće ugoditi, jer ko mu pristupa, treba da vjeruje da Bog postoji i da nagrađuje one koji ga traže (vidi Jevrejima 11:6). Vjera je pouzdanje u ono čemu se *nadamo* (vidi Jevrejima 11:1). U Božijoj Riječi nam je obećano da nam je potrebna vjera koja je veličine zrna gorušice da bismo pomjerali planine (vidi Matej 17:20). Avram se u vjeri *nadao* da će primiti Božije obećanje (vidi Rimljani 4:18). Neki ljudi pokušavaju da imaju vjere, ali nemaju nadu. Ne očekuju da će im se zbog Božije ogromne dobrote nešto dobro dogoditi. Vjerujem da je nada preteča vjere i sa njom je povezana. Ne možemo imati jednu bez druge. Kako negativna i beznadežna osoba može hodati u vjeri? Neka osoba može vjerovati u Boga, ali čovjek ili žena vjere ne samo da vjeruju u Boga nego vjeruju i da je On dobar i da nagrađuje one koji ga traže. Oni čekaju i očekuju Božiju dobrotu, ne zato što je zaslužuju, nego zato što Bog obećava da će je dati.

Posljednjih 38 godina svog života sam provela putujući po svijetu, propovijedajući i podučavajući Božiju Riječ. Srela sam mnogo nevjerovatnih ljudi – ljudi kao što si ti. Vlasnike biznisa, domaćice, žene i majke koje rade, umjetnike, propovjednike, poduzetnike, političare, volontere, samohrane majke, samohrane očeve. Imala sam privilegiju da sretнем i žene i muškarce iz skoro svake oblasti života.

Nekima od njih sve ide od ruke i čini se da uspijevaju u svemu. Drugi su mi se povjerili da jedva žive, iz dana u dan pokušavajući da sastave kraj s krajem. Mnogi drugi se bore sa tako teškim oklonostima da se osjećaju kao da ih je život porazio.

Ali bez obzira kakva je osoba u pitanju i u kakvoj je situaciji, uočila sam da postoji jedna stvar koju oni svi očajnički trebaju: nada.

Nada je sretno i pouzdano iščekivanje dobrog. To je silna i univerzalna inspiracija, rastuća plima koja podiže sve brodove. Bez obzira na to da li jedva stižemo u luku ili smo se zaglavili za dok ili odvažno plovimo ka moru, nada nam podiže duh i izaziva nas da vjerujemo *ipak bi sve moglo izići na dobro*. Nekada je neobjašnjiv, ali neporeciv osjećaj da danas nije dobar dan za odustajanje. Nada je uvjerenje da nešto dobro samo što se nije dogodilo!

Zato vjerujem da je neophodna jedna knjiga o nadi koja će ti pomoći da otkriješ njene nevjerovatne mogućnosti. U stvari, Biblija nam govori da je to jedna od tri stvari koje ne prolaze kada sve druge iznevjere (vidi Korinćanima 13:13). Bez obzira na to ko si i u kakvim okolnostima se tvoj život trenutno nalazi, ne možeš uspješno funkcionišati bez nade. Ako su okolnosti loše, sigurno ti je potrebna nada, a ako su dobre, onda ti je nada potrebna da bi takve i ostale. Kada živiš u vrtu nade, tamo uvijek nešto cvjeta!

Ali koliko god da je nada velika, lako se može zamijeniti nečim drugim. Ako se tvoja nada osloni na neku osobu, to je nepouzdan izvor snage. Ako ti je nada na radnom mjestu, mogućnosti da zaradiš novac ili penziju, možda ćeš biti razočaran. Ako nada leži u tvojim vlastitim sposobnostima, ona će da izbjlijedi čim ti se poljulja samopouzdanje.

Prilično je jednostavno: nada je jaka onoliko koliko i njen izvor. Zbog toga oslonac nade mora biti Bog i obećanja koja nalazimo u Njegovoј Riječi. Ako Bog nije izvor nade, onda je ona samo lijepa misao i trenutna težnja. U stvari, nada na koju te ja pozivam je sasvim drugačija od onoga što svijet naziva nadom. Nada vjernika je nepokolebljivi, svemoćni,

sveznajući i sveprisutni jedini istiniti Bog i Njegov Sin, Isus Hrist.

Može se i ovako reći: Bez nade u Boga, nema mnogo toga što možeš uraditi, ali *sa* nadom u Boga, nema mnogo toga što *ne možeš* uraditi.

Posvećeno čitanje i proučavanje Riječi pokazuje nam šta se dešava kada se Božija djeca usude da žive sa nadom. Kroz Stari i Novi Zavjet, srećemo obične ljudе – ljudе sa manama i neuspjesima kao što smo i mi – kako prevazilaze nemoguće situacije zato što su izabrali da vjeruju da Bog ima na vidiku nešto nevjerojatno...oni stavljaju svoju nadu u Njega.

- Iako su jevrejska djeca mnogo generacija bili robovi u Egiptu, nuda u slobodu je ono što je Mojsija navelo da sanja o slobodi od svojih okrutnih opresora.
- Dok se izraelska vojska u strahu od Golijata krila u rovvovima, David je zbog nade u pobjedu pitao „Šta će biti čovjeku koji ubije ovog Filisteja i makne sramotu sa Izraela? (1. Samuelova 17:26)
- Dok je Haman kovao zavjeru da ubije Esterin narod, njoj je nuda dala hrabrost da razbije konvencije i da zatraži sastanak sa kraljem.
- Zbog nade da je Isus obećani mesija, obični ljudi su ostavljali poslove, prijatelje, pa čak i porodicu za slobom i pratili su Ga do krsta.

Da li vidiš kako priroda nade probija barijere i razbija granice? U svakom od ovih biblijskih primjera, nuda je mnogo više od motivišuće misli ili sanjarenja; nuda je neukrotiva Božija oluja koja govori da sa Bogom ništa nije nemoguće.

- Za Mojsija, nuda je kidala lance.
- Za Davida, nuda je postavila pitanje za koje niko drugi nije imao hrabrosti.

- Za Esteru, nada je imala vjere da je Bog može upotrijebiti protiv svih nedaća da spasi svoj narod od uništenja.
- Za učenike, nada im je dala hrabrosti da se ukrcaju na novi život i postanu oni koji mijenjaju živote.

Vjerujem da nada isto ovo može da uradi i u tvom životu. Zato sam uzbudjena što čitaš ovu knjigu. I zato sam uzbudjena što koristim priče, biblijske principe i praktične životne lekcije koje ćeš naći na svakoj stranici, a one će te ohrabriti da se pokreneš i *podigneš svoje nade!* Uradi to...strastveno je zgrabi i odbij da živiš bez nade!

Čitav život, shvatao to ili ne, svijet ti je govorio da se *ne nadaš previše*. Prijašnje боли, sadašnja razočaranja i buduće neizvjesnosti te uče da smiriš očekivanja: “*Budi razuman, ostani pribran, ne očekuj previše jer bi se mogao razočarati.*”

Test na trudnoću je pozitivan...*ne nadaj se; sjeti se šta se desilo prošli put.* Osoba koja te je povrijedila se izvini i želi da ispravi to što je uradila... *ne nadaj se; povrijediće te opet.* Na poslu se ukaže odlična prilika... *ne nadaj se; vjerovatno neće biti ništa od toga.*

Ali život bez nade i nije neki život. Može se reći da si samo oprezan: “*Bolje je spriječiti nego lječiti, Joyce*”, ali u stvari se samo plašiš. Plašiš se da budeš povrijeđen, plašiš se razočaranja, plašiš se da pokušaš. Možda je strah realan. Vjerovatno si ranije bio jako povrijeđen i iskusio si mnogo razočaranja i obeshrabrenja. Iskustvo ti govorí da se nikada ništa neće promijeniti, ali Božija Riječ nam govorí nešto drugo. Govori nam da je sa Bogom sve moguće!

Vrijeme je za promjenu! Vjeruj Bogu dovoljno da bi se mogao nadati najboljem: najboljoj vezi, najboljoj mogućnosti, najboljem braku, najboljim vijestima, najboljem ishodu, najboljem životu. Očekuj da ti se danas dogodi nešto dobro!

Bog želi da imaš najbolji mogući život. Ako si ikada sumnjao da je to istina, samo se prisjeti da je On dao svoje najbolje kada je poslao Isusa. Isus je umro da bi ti, ako prihvatiš dar spasenja, mogao da uživaš u vječnosti na Nebesima; ali je takođe umro da možeš da uživaš u dobrom životu i ovdje na zemlji.

U Jovanu 10:10, Isus je rekao: "Ja sam došao da imaju život i da ga imaju u izobilju."

Dok ideš kroz ovu knjigu, nadam se da ćeš vidjeti da Bog želi da „imaš život i da ga imaš u izobilju“. On želi najbolje za tebe duhovno, mentalno, emocionalno, fizički i u tvojim međuljudskim odnosima – svake godine. Svakog dana, svakog momenta. I kada znaš da Bog za tebe želi najbolje, nemaš izbora nego da budeš ispunjen nadom. Bog želi da ispuni sve tvoje potrebe i da ti omogući da pomogneš drugim ljudima.

Ako si danas povrijeđen, sumnjaš da će se išta promijeniti na bolje...podigni svoje nade.

Ako se mučiš u životu pitajući se postoji li dalje... podigni svoje nade.

Ako podižeš djecu i pitaš se šta je život pripremio za njih...podigni svoje nade.

Ako ulaziš u uzbudljivu avanturu, rizikujući više nego ikada ranije...podigni svoje nade.

Kada se usudiš da podigneš nade, stvari u tvom životu će početi da se mijenjaju. Vjera će porasti, radost će se vratiti, a mir će da vlada. Ako se možeš zadovoljiti time da samo preživiljavaš ili misliš da ne može bolje ili da za tebe nema sreće, onda vjerovatno treba da zanemariš ovu knjigu.

Ali ako si spremjan za promjenu – ako si spremjan na nešto bolje – nastavi da čitaš. Nada zna kako da na prelijep

način preokrene živote svih onih koji je prigrle. Ona je katalizator ideja i mašte (Izreke 24:14), sidro koje nas pričvršćuje dok bjesne životne oluje (Jevrejima 6:19), pouzdanje koje nas podstiče da izgradimo bolji život (Izreke 23:18), i utjeha koju imamo kada znamo da nismo sami (Rimljani 5:5).

Ako ti ovo dobro zvuči, budi dovoljno hrabar da uradiš nešto što dugo nisi: Podigni nade. Biće ti drago što jesi, jer Bog čeka da bude milostiv prema tebi.

# PRVI DIO

## Nadaj se većem

.....

*...Ali koji se uzdaju u Gospoda, stiču novu snagu:  
podiju se kao orlovi...*

*Izajja 40:31*

Prilično često ljudi smatraju da bi bilo pohlepno ili pogrešno da priželjkuju više od onoga što imaju. Iako je istina da uvijek treba da budemo zadovoljni onim što imamo, to ne znači da je loše željeti više dobrih stvari, dok god ih želimo iz ispravnih razloga. Kako možemo biti zadovoljni, a istovremeno željeti više? Ja sam trenutno veoma zadovoljna svim u svom životu jer vjerujem da je vrijeme koje je Bog odredio za moj život savršeno. Mogla bih biti prilično sretna sa ovim što imam jer su moja radost i zadovoljstvo u Hristu. Ipak, istovremeno želim više svega jer želim da idem onoliko daleko u životu koliko Bog dozvoljava i da uradim za Njega i druge onoliko koliko je za čovjeka moguće. Ne želim ni manje ni više od najboljeg što Bog želi da mi da!

Želim više Boga u svom životu i bliži, intimniji hod sa Njim (vidi Filipljanima 3:10). Želim više mudrosti, više stabilnosti, i više dobrih prijatelja. Želim više za moju djecu i želim da više ljudi prihvati Hrista kao svog spasitelja. Želim da vidim više čuda, iscjeljenja, prodora i moći.

Iskreno vjerujem da možemo biti zadovoljni sve dok nas ne uznemirava ono što imamo, dok u isto vrijeme čeznemo

za više toga iz ispravnih razloga i u pravo vrijeme (vidi Filipjanima 4:11, 19).

Ja vjerujem da oni koji su zadovoljni sa manje od svega onoga što Bog može uraditi za njih ustvari spriječavaju Božiju veličinu. On želi da pokaže svoju snagu u svačijem životu. On je kadar da uradi prekomjerno, izobilno, iznad i izvan svega onoga što se mi možemo usuditi da molimo ili mislimo, beskonačno iznad naših najviših molitvi, želja, misli ili snova (vidi Efescima 3:20).

## 1. POGLAVLJE

# Podigni nivo očekivanja

*Uzdaj se u Gospoda! Budi jak i neka bude hrabro tvoje srce,  
uzdaj se u Gospoda!*

*Psalam 27:14*

„Visoka očekivanja su ključ svega.“

– Sam Walton

Ispričaćeš mi priču o ženi po imenu Betty. Betty je vjernica. Ona redovno čita Bibliju. Ona takođe volontira jednom mjesечно dijeleći čebad beskućnicima. To zvuči prelijepo, zar ne?

Ali postoji nešto u vezi sa Betty što treba da znaš: Kada ona nije u blizini, njeni prijatelji je zovu „Betty, Loša Vijest“. Oni se grozno osjećaju zbog ovog nadimka ali, budimo pošteni, Betty ga je zaslужila. Ona ima svoje načine da očekuje, predviđa i nalazi ono najgore u svakoj situaciji. Daću ti jedan primjer.

Prošlog ljeta su Betty i njen muž (Promašaj Phil) otišli na porodični odmor sa njihovo dvoje djece (Neće Postići Mnogo Will i Osrednja Megan). Reći ćeš mi da je Phil muž pun ljubavi, a Will i Megan su divna djeca ali Betty ne gaji velike nade za njih. Ona takođe ne očekuje mnogo za njih. U stvari, na neki način ona očekuje najgore, sudeći po njihovim nadimcima.

Prije nekoliko mjeseci, Phil i Betty su planirali da provedu jednu sedmicu ljetnog odmora na popularnoj destinaciji ali kako se put približavao, Betty je jednostavno znala da će ispasti katastrofalno. Kada su se dovezli na 30 km od tog mesta, Betty nije prestajala da se žali: „Ovo je bila loša ideja. Redovi u parku će biti dugački kilometrima. Sumnjam da će hotel biti onako dobar kao na reklami. Kladim se da će kiša padati cijele sedmice.“ Phil i djeca su pokušali da ubijede Betty da će sve biti u redu – oni iz svake situacije mogu izvući ono najbolje – ali ništa ne može omesti njeno namćorasto raspoloženje. Siroti Phil, Will i Megan... 500 km vožnje je izgledalo kao 1.500 km mukotrpnog rada.

Moglo bi se reći da je odmor ispunio Bettina očekivanja. Redovi u vodenom parku su bili nešto duži nego inače. To nije smetalo Philu, Will i Megan – imali su više vremena da se zajedno smiju i planiraju na koju će sljedeću vožnju ići – ali Betty je bila strašno uznemirena. „Znala sam da će se ovo dogoditi!“, mrmljala je.

Restoran koji su izabrali za večeru još prve večeri takođe nije bio savršen. Konobarica je obavijestila Phil i Betty da su ostali bez soka koji su njih dvoje naručili. Phil je naručio drugo piće; Betty je odlučila da bude depresivna. „Nevjerovatno!“, uzdahnula je.

Ali kap koja je prelila čašu je bila hotelska soba. Kada se porodica tu noć smjestila u sobu, otkrili su da TV nije ispravan. „Znala sam! Znala sam! Znala sam!“, ogorčeno se žalila Betty. „Znala sam da ovaj hotel ništa neće valjati.“ Phil je pozvao recepciju i služba održavanja je brzo donijela novi televizor, ali šteta je već bila učinjena.

Betty Loša Vijest, imala je svoj odmor loših vijesti... upravo je to i očekivala.

## Pitanja Srca

Priča o Betty je izmišljena priča o nekome ko zastrašujuće liči na tebe i mene ponekad. Svi smo se često nalazili u situacijama kada moramo da se borimo sa pesimističnim stavovima i niskim očekivanjima – opisujući vrijeme kao „djelimično oblačno“ umjesto „djelimično sunčano“ i kada vidimo čašu „do pola praznu“ umjesto do pola punu“.

Betty su njena loša očekivanja sprječavala da uživa u ljetnjom odmoru, ali mnoge ljude preniska očekivanja sprječavaju da uživaju u životu. Oni kroz svaki dan idu sa negativnim, kritičkim stavovima, svemu nalazeći mane, rijetko se nadajući najboljem jer su suviše zauzeti tražeći najgore. Kada stvari idu slabo, oni misle: „*Imao sam osjećaj da će danas biti loš dan,*“ a kada stvari krenu dobro oni misle: „*ovo vjerovatno neće dugo trajati.*“ Bilo da su dani dobri ili loši, bilo da su na vrhu planine ili u dolini, oni ne uživaju u životu...jer nikada nisu ni očekivali da mogu. Možda ti i ja nismo loši kao Betty, ali iskreno govoreći, svaka doza beznadežnosti ima razarajući učinak na naše živote. Zašto ne vjerovati najboljem i otvoriti vrata da vidimo šta će Bog uraditi?

Niska očekivanja su više od nekoliko čangrizavih prigovora na ponедeljak koji traje duže nego inače ili osjećaj da smo ustali na pogrešnu nogu. Očekivanje nečeg lošeg je simptom dubljeg problema, *duhovnog* problema. Neka osoba može imati prošlost punu razočaranja koja su kod nje prouzrokovala naviku da ponovo očekuje isto. Neki ljudi imaju tako nisko samopoštovanje da vjeruju da nisu vrijedni ničeg dobrog, pa nikada nešto dobro i ne očekuju. Zatim postoje i oni koji ne znaju da je Bog dobar i da želi da uradi dobre stvari za svoju djecu. Rizik koji ovi simptomi nose su značajni. Kada bismo mogli opisati šta se dešava u našim dušama na isti način kao što opisujemo neko oboljenje, to bi moglo zvučati ovako:

**Doktor:** Znači, kažete da ste potišteni i duhovno i emotivno. Molim Vas, recite mi koji su vaši simptomi.

**Pacijent:** Pa, doktore, imam loš predosjećaj u vezi sa budućnošću. Do sada sam u životu imao dosta razočaranja i rijetko očekujem da stvari idu u korist meni ili mojoj porodici.

**Doktor:** Vaši simptomi mi govore sve što treba da znam. Bolujete od teške beznadežnosti.

Bettini simptomi su negativnost, briga i pritužbe. Ovi simptomi su posljedica stanja njenog srca: beznadežnosti. Umjesto da se nada odličnom porodičnom ljetovanju, Betty je očekivala najgore. *Redovi će biti dugački. Nikada nećemo naći dobar restoran.* Hotel će biti grozan. Ni u jednoj od ovih misli nema nade. Međutim, Phil, Will i Megan su imali drugačije simptome. Oni su bili pozitivni, optimistični, vedri i spremni da iskoriste ono najbolje u svakoj situaciji. Bili su puni nade, a njihova očekivanja su visoko dosezala.

Važno je shvatiti da su okolnosti bile iste i za Betty i za njenu porodicu, ali su oni na različit način reagovali na te okolnosti. Svi su stajali u dugim redovima; svi su jeli u istom restoranu; svi su sjedili ispred pokvarenog televizora. Kada su se ove stvari dogodile, Bettina niska očekivanja su bila potvrđena, zbog čega je ona željela da odustane od svega. Za ostatak porodice, njihova visoka očekivanja su bila na probi, ali su oni izabrali da ostanu puni nade i radosni, što im je omogućilo da nađu način da se izbore sa okolnostima i nastave dalje, uživajući u svakom koraku puta.

Sa ovom slikom u mislima, postaviću ti jedno važno pitanje: Koji su tvoji simptomi? Kada bi obavio poštenu procjenu vlastitog srca, šta bi tamo pronašao?

Da li si kao Phil, Will i Megan? Uzbuđen zbog budućnosti, u očekivanju da danas bude bolje nego juče, a sutra da

bude čak i bolje nego danas? Da li se svako jutro budiš sa radosnim iščekivanjem da će Bog uraditi nešto predivno u tvom životu?

Ili si više kao Betty Loša Vijest? Da li se spremаш za najgore? Da li se brineš da će se nešto loše dogoditi prije nego što se zista dogodi? Da li koristiš izraze kao što su: “*opet je sve po starom, ovo nikada neće uspjeti, trebao sam znati da će sve krenuti naopako i imam loš predosjećaj u vezi sa ovim?*”

**Da li se svako jutro budiš sa radosnim iščekivanjem da će Bog uraditi nešto predivno u tvom životu?**

## Povezanost vjerom

Procjena naših srca je važna vježba dok zajedno krećemo na ovo putovanje kroz nadu, jer nada u Boga i pozitivna *očekivanja* su veoma usko povezana sa vjerom. Radi diskusije, lako možemo reći da je nivo naših očekivanja u stvari nivo naše vjere. Pokaži mi osobu niskih očekivanja i ja ću ti pokazati osobu koja koristi vrlo malo vjere. Ali pokazi mi osobu visokih očekivanja i ja ću ti pokazati osobu koja sve radi sa odvažnom vjerom. Sjeti se da govorimo o očekivanjima od Boga. To je više od samo pukog pozitivnog stava; to je vjerovanje Bogu da će se pobrinuti za tebe i za sve što se tiče tebe.

**Pokaži mi osobu niskih očekivanja i ja ću ti pokazati osobu koja koristi vrlo malo vjere.**

Božija Riječ nam govori da naša vjera – naše pozitivno, puno nade očekivanje – godi Bogu (vidi Jevrejima 11:6), i nekoliko puta u Jevanđeljima mi vidišmo da je Isus bio podstaknut na djelovanje radi vjere – očekivanja – od Onoga koga je poznavao (vidi Matej 9:29, Marko 5:34, Luka 7:50 i Luka 17:19). Jedno ovakvo čudo

nalazimo u Marku u desetom poglavlju. Volim ovu priču i mislim da ima veliki značaj za tebe i mene danas, jer govori o važnosti očekivanja.

Marko 10:46 – 47 glasi:

...i dok je Isus sa svojim učenicima i silnim narodom izlazio iz Jerihona, pored puta je sjedio slijepi prosjak Vartimej – to jest sin Timejev. Kad je čuo da prolazi Isus Nazarećanin, povika: „Isuse, Sine Davidov, smiluj mi se!“

Ako razmisliš, Vartimej je imao mnoštvo razloga da očekuje najgore. On je bio slijepi prosjak koji je sjedio pored puta svaki dan, pokušavajući da preživi od nečijeg sitnog kusura. Živio je veoma težak život, i ako bi iko pokušao da umanji njegova očekivanja, pomislili bismo da bi to bio sam Vartimej. Mogao je misliti: *„Ovo je beskorisno. Neće moći ovako. Ništa se neće promijeniti. Isus me vjerovatno neće ni primjetiti. Zaštobih se nadao?“* Niko ga ne bi krivio.

Ali Vartimej se usudio da se nada nečem većem u životu. Počeo je da razmišlja o onome što bi se moglo dogoditi umjesto o onome što se ne bi moglo dogoditi. Ništa u njegovim očekivanjima nije bilo umanjeno kada je počeo da više iz sve snage: „Isuse, sine Davidov, smiluj mi se (sada)!“ Možeš li čuti insistiranje u njegovom glasu? Kao da je Vartimej odlučio da ni u kom slučaju neće propustiti ovu šansu. Mada su ga mnogi u gomili „opominjali, govoreći mu da učuti“ (pogledajte Marko 10:48), nisu uspjeli da ga utišaju. Vikao je sve glasnije dok Isus nije zastao i pozvao ga.

Slijedi najbolji dio priče: Kada su Vartimeja donijeli Isusu, Gospod mu je postavio skoro nepojmljivo pitanje. U stihu 51, Isus je rekao ovom slijepom prosjaku: „Šta hoćeš da učinim za tebe?“

Ovo pitanje zvuči čudno, zar ne? Njegovi učenici su možda u tom momentu mislili: „*Šta želiš da uradim za tebe?*“ *Gospode, nije li to očito? Čovjek je slijep. Kako ga to možeš pitati?*“ Ali Isus je pitao nešto dublje – on je pitao Vartimeja: „*Šta očekuješ? Da li očekuješ obrok? Da li želiš nekoga ko će te voditi za ruku? Da li očekuješ samo pomoći?*“ Svaka od ovih stvari je Vartimeju trebala, i da je živio sa malo vjere, mogao se zadovoljiti jednom od njih.

Ali Vartimej je imao viši nivo očekivanja. Kada ga je Isus pitao: „*Šta želiš da uradim za tebe?*“ Vartimej nije okljevao, nije morao razmišljati o tome, nije se pitao da li traži previše. Vartimej je odvažno rekao: „Učitelju, da progledam.“ Vjerovatno si upoznat sa ostatkom priče. Isus je bio duboko dirnut Vartimejevom vjerom. Stih 52 glasi: „A Isus mu reče: Iди, твоја вјера те је излијећила. И човјек одмах прогледа и подје путем за Исусом.“

Vartimej je bio dovoljno hrabar da vjeruje u ono najbolje od Boga i zato je upravo to i primio od Njega. Ovo je istina i u tvom životu i zbog toga je nivo tvojih očekivanja toliko važan za život koji ćeš živjeti. Ako ne očekuješ da će Bog išta veliko uraditi u tvom životu, onda neće. Ali ako se usudiš da podigneš očekivanja i počneš iščekivati kako Bog želi da uradi nešto veliko, počećeš da sanjaš, vjeruješ, moliš i ponašaš se sa samouvjerenom smjelošću, znajući da je Bog za tebe i da ima sjajan plan za tvoj život.

**Bog je za tebe  
i ima sjajan plan  
za tvoj život**

U slučaju da preispituješ da li je za tebe prihvatljivo da očekuješ dobre stvari od Boga, molim te da polako pročitaš i da meditiraš nad ovim stihovima u Izajiji.

Zato će Gospod (iskreno) čekati (očekivati, težiti, tražiti) da vam pokaže milost, i zato će se visoko podignuti da bi se sažalio nad vama; jer Gospod je Bog suda: blaženi (sretni, uzdignuti) su svi koji se pouzdaju u Njega!

Izajia 30:18

Bog traži one prema kojima može biti dobar, i ako tražiš (očekuješ) da Bog bude dobar prema tebi, onda si ispunio uslove. Očekuj da ti Bog da sebe jer On je važniji od bilo čega drugog, ali sjeti se da sa Njim dolazi i sve ono što će nam ikada trebati.

## Tri koraka za podizanje nivoa tvojih očekivanja

Možda čitaš ovaj odjeljak i misliš: „*Joyce, to divno zvuči, ali kako treba da očekujem više? Trčim sa jednog sastanka na drugi, jedva plaćajući račune, samo pokušavam da prehramim djecu ili da firma radi. I provodim čitav život radeći koliko mogu da bih stigao ovdje. Kako uopšte mogu da podignem nivo očekivanja?*“

Toliko toga mogu reći o vjeri – hiljade i hiljade knjiga su napisane na tu temu – ali želim da ti dam tri jednostavna koraka koja te mogu pokrenuti još danas. Ova tri koraka će

ti pomoći da podigneš nivo svojih očekivanja:

**Kada si u iskušenju  
da sumnjaš, da  
odustaneš, da sve  
prekineš, umjesto  
toga izaberi da  
vjeruješ.**

### 1. Vjeruj.

Božija djeca se nazivaju „vjernicima“ sa razlogom. Kada si u iskušenju da sumnjaš, da odustaneš, da sve prekineš, umjesto toga izaberi da vjeruješ. Vjerovanje je osnova tvoje vjere. Vjeruj Božijoj riječi. Vjeruj da su

Njegova obećanja istinita. Vjeruj da te On voli i vjeruj da On ima nešto prelijepo za tvoj život. Isus je rekao da kada bismo samo vjerovali, vidjeli bismo slavu Božiju (vidi Jovan 11:40). Slava je manifestacija Božije odličnosti.

## 2. Moli.

Jakov 4:2 glasi: „Nemate, jer ne molite.“ Jednom kada odlučiš da vjeruješ da se Bog može pobrinuti za sve tvoje životne potrebe, idi i moli Boga da se pobrine za te potrebe. Podijeli snove sa Njim. Kao što je Isus rekao Vartimeju: „Šta želiš da uradim za tebe?“ On tebi postavlja isto ovo pitanje. Budi dovoljno odvažan da zamoliš Boga da uradi nešto što samo On može uraditi. Očigledno, svi mi treba da tražimo Božiju volju i da Mu vjerujemo da ako molimo za nešto što nije dobro za nas, Bog nam neće dati to nego će nam umjesto toga dati nešto bolje.

## 3. Gledaj.

Dok ideš kroz dan, očekuj da Bog usliši tvoje molitve, udovolji tvojim potrebama i ispuni tvoj Bogom – dan san. Čak i ako nisi još vidio manifestaciju onoga za čim čezneš ili ako se to nije dogodilo na onaj način na koji si ti želio da se dogodi, to ne znači da Bog ne radi. I dalje zadrži stav očekivanja i primjeti sve što Bog radi. Budi zahvalan za to dok čekaš na sadašnju potrebu.

Čemu god se nadaš danas – dubljem hodu sa Bogom, boljem razumijevanju Božije riječi, snažnijem braku, finansijskom uspjehu, šansi da se vratiš u školu, prilici za službu, novom početku – ako je u tvom srcu (i ako se slaže sa Božjom rječju), vjeruj, moli, očekuj i gledaj.

## Prava promjena koja dolazi sa višim očekivanjima

**Tvoj život će ići onoliko visoko koliko je visok nivo tvojih očekivanja.**

Tvoj život će ići onoliko visoko koliko je visok nivo tvojih očekivanja. Ne na taj način da će tvoja očekivanja momentalno promjeniti okolinu ili okolnosti koje te okružuju, nego će promijeniti način na koji ti reaguješ na tu okolinu i te okolnosti. Tvoja očekivanja mijenjaju *tebe*. Ona te čine kadrim da čekaš promjenu tvojih okolnosti sa sretnim stavom. Čine te smjelim, uvjerenim, vjernikom ispunjenim radošću, koji vjeruje da Bog ima sjajan plan za tvoj život.

Slijedi jedna jednostavna priča na koju sam naišla, koja pokazuje radost koja dolazi uz velika očekivanja:

Jednom su postojali identični blizanci. U svemu su bili slični osim u jednoj stvari. Jeden je bio optimista pun nade koji je u svakoj situaciji video samo svjetlu stranu života. Drugi je bio mračni pesimista koji je video samo nedostatke u svemu.

Njihovi roditelji su bili toliko zabrinuti zbog krajnosti u pesimizmu i optimizmu kod svojih dječaka da su ih odveli kod doktora. Doktor je predložio jedan plan. „Na njihov sljedeći rođendan“, rekao je, „pesimisti dajte nov novčić, a optimisti samo gomilu đubreta.“

Ovo se činilo prilično ekstremno. Ipak, ovi roditelji su se uvijek jednako ponašali prema svojoj djeci. Ali u ovom slučaju su odlučili da probaju doktorov savjet. Kada je došao dječji rođendan, roditelji su

pesimisti dali trkači bicikl, najskuplji i najnoviji od svih koje je ikada imao. Kada ga je ugledao, njegove prve riječi su bile: „Vjerovatno ću pasti i slomiti nogu.“

Optimisti su dali pažljivo umotanu kutiju raznog đubreta. Otvorio ju je i na trenutak je izgledao zbumjeno, a onda je istrčao napolje vičući: „Ne možete me prevariti! Tamo gdje je ovoliko đubreta, mora biti i jedan poni u blizini!“

## Podigni nade

Želim da te podstaknem da danas podigneš nivo svojih očekivanja. Nije važno kako izgleda sve oko tebe; Bog je veći od bilo kakve prepreke sa kojom se možda suočavaš. Nemoj da prepostavljaš da ne može biti bolje od onoga gdje si bio do sada ili gdje si sada. Nemoj da vjeruješ da je tvoja prošlost ujedno i tvoja sudbina. Umjesto toga, izaberि da vjeruješ da će Bog uraditi nešto još bolje u tvom životu. Isus pita: „Šta hoćeš da uradim za tebe?“ To je veoma moćno pitanje, zato kreni i podigni svoje nade. Mora da je poni negdje u blizini!

**Nemoj da  
prepostavljaš da ne  
može biti bolje od  
onoga gdje si bio do  
sada ili gdje si sada.**



## 2. POGLAVLJE

# Prati vođu

*Moja duša veže se uz tebe da te slijedi, tvoja desnica me podupire.*

*Psalam 63:8*

„Nada je riječ koju je Bog napisao na čelu svakog čovjeka.“

– Victor Hugo, *Les Misérables*

Od svih bezvremenskih igara koje djeca igraju, „prati vođu“ je vjerovatno najuobičajenija. Bilo da se igra u vrtiću ili u osnovnoj školi ili sa priateljima u parku, svako dijete se nekada uvrstilo u red vršnjaka da bi se uključilo u ovaj razigran zadatak praćenja vođe. Sjećaš li se ove igre? Sjećaš li se izazova da hodaš stopama osobe ispred tebe, čak i kada oni hodaju stopama osobe ispred njih? Kroz tunel, preko penjačica, uz merdevine, niz tobogan; prošli bi kroz cijelo igralište.

Jedna od stvari kojih se najbolje sjećam u ovoj igri je da je uzbudjenje koje prati igru direktno povezano sa mogućnostima vođe. Ako bismo imali sporog vođu, bez kreativnosti ili sa slabim osjećajem za pravac, igra bi se brzo raspala – djeca bi izgubila interes i našla nešto drugo za igru. Slično tome, ako bismo imali vođu koji je prebrz, suviše vješt akrobata, zapovjednički ili zahtjevan, igra ne bi predugo trajala jer niko ne bi mogao da ga prati. Da bi igra bila uspješna, morali bismo imati pravog vođu – vođu koji bi išao pravim korakom, koji bi učinio igru interesantnom i odveo nas negdje gdje želimo ići.

Vođstvo je ključ. Ovo je jedna istina koja jača kroz djetinjstvo, kroz adolescenciju, pa čak i kada stupimo u „svijet odraslih.“ Ako si imao edukovanog vođu, vjerovatno si imao prilično uspješan tim. Ako si imao dovoljno sreće da dobiješ motivisanog i inspirativnog nastavnika, vjerovatno si naučio više o tom predmetu nego što bi inače. Ako te je šef podstakao da daš sve od sebe i stavio te u poziciju na kojoj možeš da napreduješ, vjerovatno si uživao u svom poslu i dobro obavljaš poslove koji su ti bili dodijeljeni. Koliko uživaš u nekom iskustvu i nivo uspjeha koji postižeš su direktno povezani sa onim koga si izabrao da pratiš.

Ono što čini suštinu na igralištu, u učionici i za konferencijskim stolom, takođe je čini i u dubljim sferama života – a to je vođstvo. Onog ili ono što izabereš da slijediš će odrediti koliko uživaš u svom životu. Ne govorim o slijedenju šefa, nastavnika ili roditelja; govorim o jednoj većoj odluci: izbor da slijediš Boga i Njegov plan za tvoj život.

Ako prolaziš kroz život sa vlastitim planom – pokušavajući da sve sam riješiš, pokušavajući da pratiš svoj vlastiti plan – vjerovatno ćeš biti očajan i nesretan. Ne mora značiti da je tvoj plan potpuno loš; nego je Božiji plan nemjerljivo bolji.

**Ne mora značiti  
da je tvoj plan  
potpuno loš; nego  
je Božiji plan  
nemjerljivo bolji.**

Kada god se odlučiš za svoj plan umjesto da se predaš Božijem planu, odlučuješ se za drugu do najbolje stvari. Takođe, veliki dio stresa proizilazi iz pokušavanja da tvoj plan uspije. Čim naideš na prepreku – škola odbije tvoju prijavu, poslovni plan propadne, osoba s kojom želiš da se vjenčaš te odbije, kuća se ne proda – pritisak raste jer osjećaš da moraš popraviti problem svojim vlastitim snagama. Ako si ti vođa, lako izgubiš nadu jer si svjestan svojih mana, grešaka i ograničenja.

Ali ako želiš da živiš život pun nade, najbolja stvar koju možeš uraditi je da Bogu predaš ulogu vođe. Pusti Njega da bude vođa i odluči da Ga pratiš cijelim srcem, vjerujući da On ima odličan plan koji razrađuje do savršenstva. Prestani čitati na par trenutaka i zapitaj se: „*Da li odlučno slijedim Boga ili tražim od Boga da me prati?*“ U Bogu ćeš naći vođu koji se kreće savršenim korakom i čini stvari interesantnim, i iako će te odvesti i na nekoliko mjesta gdje ne želiš da ideš, ti ćeš čudesno da se nađeš na pravom mjestu u pravo vrijeme. Čekanje na Boga ne znači da treba da sjediš i ništa ne radiš. U stvari, istina je upravo suprotna. I dalje planiraj budućnost, i dalje vrijedno radi da uspiješ u onome što je pred tobom, ali radi te stvari nakon što si proveo vrijeme sa Bogom, moleći za Njegovo vođstvo i smjernice. Kada praviš planove, nemoj ih se slijepo držati. Idi kroz svaki dan sa stavom koji kaže: „*Gospode, vjerujem da imaš plan za moj život. Pokaži mi smjer kojim želiš da idem. Zatvori svaka vrata koja nisu dio tvog plana i otvori svaka vrata onih mogućnosti u koje želiš da uđem. Vodi me i usmjeravaj me danas i svaki drugi dan.*“

Kada stvari krenu loše i okolnosti postanu teške, ljudi koji prate Božije vođstvo ne paniče. Oni vjeruju da će On iskoristiti svaku situaciju – lošu ili dobru – da ostvari svoj plan i svrhu. Svi mi pravimo greške i učimo mnoge lekcije ali ako ostanemo ispunjeni nadom, onda ćemo moći uživati u tom putovanju. Moguće je da ćemo nekoliko puta neplanirano skrenuti sa puta, ali će Božija svrha na kraju izaći kao pobjednik.

## Vjerovati Bogu, ne sebi

Lakše je gajiti nade za duhovni rast, brak, zdravlje, djecu, međuljudske odnose i finansije kada ti je Bog vođa i kada vjeruješ da On ima sjajan plan za tvoj život. Vjerovati da Bog ima plan za tvoj život i izabrati da pratiš Njegovo vođstvo da bi video ispunjenje te svrhe je cijelokupna vježba povjerenja.

To je kao igra povjerenja koju ljudi ponekad igraju. U ovoj igri jedna osoba sebi dozvoljava da bude ranjiva, padajući na leđa gdje nema mreže koja bi je uhvatila niti štitnika da ublaži njen pad, dok druga osoba stoji iza nje da bi je uhvatila

prije nego što dodirne tlo. Kada kažeš: „Bože, biram da pratim tvoje vođstvo. Vjerujem da je Tvoj plan neuporedivo bolji nego što moj ikada može biti,“ to je kao kada vjeruješ da će te neko uhvatiti. Ali postoji jedna bitna razlika: Bog će

uraditi još mnogo više; Bog te uhvati i odvede te mnogo više od onoga gdje si bio prije.

Neko vrijeme sam morala da učim da potpuno vjerujem Bogu i još uvijek to učim svaki dan. Prije sam imala naviku da samo sebi vjerujem. Formirala sam ovu naviku nakon godina pokušaja da vjerujem ljudima, da bih na kraju završila razočarana i povrijeđena. Onda bih odlučila više nikome da ne vjerujem. Zbog ovih bolnih iskustava počela sam da vjerujem: *„Ako želiš da uradiš nešto kako treba, onda uradi to sama. Ako ni od koga ništa ne tražiš ili ako nikome ne otvorиш srce, niko te ne može povrijediti.“* Ali ovaj način razmišljanja je bio nezdrav i spriječio me je ne samo da vjerujem ljudima – spriječio me je da vjerujem Bogu. Trebala mi je Božija pomoć da se ova loša navika slomi.

**Bog te uhvati i  
odvede te mnogo  
više od onoga gdje  
si bio prije.**

Božija Riječ je veoma jasna po pitanju vjerovanja Bogu umjesto vjerovanja nama samima. Izreke 3:5-6 kažu:

Pouzdaj se u Gospoda svim svojim srcem, a ne oslanjam  
se na svoj razum. Na svim svojim putevima priznaj  
Ga, i On će učiniti ravnim tvoje staze.

Vjerovati Bogu znači jednostavno vjerovati da te On voli, da je On dobar, da On ima moć da ti pomogne, da On želi da ti pomogne i da će ti On pomoći. Mi često vjerujemo svima *osim* Bogu ili vjerujemo svima *prije* nego Bogu. Vjerujemo svojim prijateljima, bankama, berzama, vladama ili svojim vlastitim talentima i mogućnostima više nego što vjerujemo Bogu i Njegovoj Riječi. Jesi li ikada čuo da neko kaže: „Uradi sam sve što sam znao, ali ništa od toga nije uspjelo; Izgleda da sad više ništa ne mogu uraditi osim da se molim“? Većina nas je rekla ovo, i ova izjava mnogo otkriva. To je drugi način da se kaže: „Probao sam da pomognem sebi i nisam uspio, probao sam druge ljude, pa ni to nije uspjelo, ništa što uradim ne uspijeva, pa izgleda da nemam izbora nego da vjerujem Bogu!“

Molitva treba da nam bude prva linija odbrane u svakoj borbi, a nikada onaj posljednji jarak kada ništa drugo ne uspije.

Bog želi da ga postavimo na prvo mjesto u našim životima. Želi da Mu predajemo povjerenje i sigurnost...uvijek...u svemu.

**Bog želi da ga postavimo na prvo mjesto u našim životima.**

On želi da stavimo nadu u Njega, da imamo vjere u Njega, jer kada to uradimo nećemo više živjeti razočaravajuće, neplodne živote. On će nas uvesti u nadmoćne, izobilne živote, ispunjene radošću. Isus je umro da bi nam ih dao.

Sjeti se pjesme koja kaže: „Moja nada je izgrađena na Isusu, mojoj pravednosti.“ Stavi svu svoju nadu u Boga i spremi se za najuzbudljivije putovanje koje možeš zamisliti.

## Kako pratiti Božije vođstvo

Ako si odlučio da pratiš Vođu (Isusa), u Rimljanima 8:1 piše da, kao vjernici, ne moramo „živjeti po tijelu, nego po Duhu.“ Jedan od načina na koji možeš vidjeti da li živiš po tijelu (tvoj vlastiti plan) umjesto po Duhu (Božiji plan) je da nemaš mira i da se mučiš. Ako razmišljaš da li da uradiš nešto, ali nemaš mir po tom pitanju, nemoj to uraditi.

**Naprimjer:** Možda tražiš posao, ali jedina ponuda koja ti se daje u twojоj profesiji je na drugom kraju zemlje. Ali ako se nisi molio u vezi s tim i ako donosiš ovu odluku, a da se nisi konsultovao sa Bogom, ubjeđujući sebe da se moraš preseliti na drugi kraj zemlje jer je ovo možda jedina ponuda koju ćeš dobiti, možda se spremаш na godine patnje. Ako niko iz twoje porodice ne želi da ide, a twoja odluka da odeš je uzrok nemira i razdora, treba da sačekaš i da tražiš od Boga da ti da jasnija uputstva.

Evo u čemu je bit: Ako su ti misli zbrkane i nemaš mira, a twoja odluka prouzrokuje nemir, onda nemoj to uraditi! Vrlo često pokušavamo sebe da nagovorimo da uradimo nešto u čemu nemamo mir, a to je otvoren poziv za nevolju. U malopređašnjem primjeru, racionalizovali bismo na sljedeći način: „Pa, ja zaista ne želim da selim i moja porodica je protiv toga, a ni posao nije baš onakav kakav sam tražio, ali moglo bi biti dobro. To je najbolja ponuda koju sam imao. Postajem umoran od čekanja.“ Čuvaj se ovakvih racionalizacija i bez obzira na to koliko si nestrpljiv, ako nemaš mir po pitanju preseljenja, bolje je da sačekaš dok ti Bog ne doneše neku bolju mogućnost.

Shvatam da finansijski treba da izdržavaš sebe i svoju porodicu, ali biće ti bolje da prihvatiš neki drugi posao u svom gradu dok čekaš taj savršen posao, nego da se prihvatiš pre-seljenja po pitanju kojeg nemaš nimalo mira. Pusti da mir bude onaj koji će u tvom životu donijeti krajnju odluku za svaku nedoumicu koju imaš (vidi Kološanima 3:15).

Ovaj princip je isti za svaku situaciju, bilo da se radi o na-laženju bračnog druga, odabiru crkve, kupovini, postavljanju zdravih granica u vezi, i sl. Neka ti uvijek bude cilj da pratiš Božiji mir i mudrost.

Kada nisi siguran kakvu odluku da donešeš – kada nisi siguran da li pratiš sopstvene želje ili Božije smjernice – pogledaj sudiju. Neka mir odluči!

**Kada nisi siguran  
kakvu odluku da  
donešeš.**

**Neka mir odluči!**

Čak i kada odlučiš da pratiš Božije vođstvo u životu, neka-da ćeš praviti greške. Kada se to dogodi, nemoj se obeshra-briti; sve je to proces učenja! Isusovi učenici su pravili greške dok su ga slijedili. Nikada ne treba da se stidiš da izadeš iz nečega za šta si mislio da je od Boga, kada shvatiš da nije od Njega. Jednostavno možeš da kažeš: „Pogriješio sam,“ i na-staviš dalje. Mnogo puta sam promašila savršen Božiji plan, kao što ćeš i ti. U stvari, i na taj način učimo kako da pravilno čujemo Boga. Ponekad ćeš morati da iskoračiš i isprobaš ne-što da bi saznao da li je od Boga. Ako si uradio sve što možeš da bi otkrio Božiju volju u svojoj situaciji, a i dalje nemaš jasnu smijernicu, onda uradi ono što ti je u srcu i vjeruj da će te Bog voditi dok ideš. Često kažem da niko ne može voziti parkiran auto, pa čak ni Bog. Ako smo naše živote stavili u ler, treba da ih ubacimo u brzinu i krenemo u nekom pravcu. Tek kada iskoračimo saznaćemo!

## Bog je s tobom i vodi svaki tvoj korak

Dobro je znati da, kao vjernici, nikada nismo sami. Pojasniću ti ovo: *Ti* nikada nisi sam. Bog te ne vodi sa neke ogromne udaljenosti; On živi u tvom srcu i ide sa tobom korak po korak, bez obzira na to kroz šta prolaziš. Iako ti se može učiniti da nikoga nema pored tebe i možeš se osjećati usamljeno kada prolaziš kroz teškoće, stavi svoju nadu u Boga, jer On je obećao da će biti s tobom i da će te voditi.

Kada se u životu susrećemo sa poteškoćama, a to smo svi nekad iskusili, đavo želi da budemo beznadežni, bez nade. On će pokušati da te usmjeri na probleme umjesto na Isusa i Njegova mnoga obećanja. Dok je Džošua putovao kroz divljinu, Bog mu je rekao da se drži obećanja i da ne skreće od njih ni lijevo ni desno, da bi napredovao na svim svojim putevima (vidi Isus Navin 1:4-7). Kada dođe nevolja, nemoj dozvoliti brigama i tjeskobama svijeta da te obeznade. Budi rob nade i primi dvostruku nagradu od Boga.

Vratite se u tvrđavu (sigurnosti i prosperiteta), vi zatvorenici nade! Već vam danas objavljujem da će vam nadoknaditi dvostruko.

Zaharija 9:12

Skoro sam čitala o čovjeku koji uči da upravlja avionima. Tokom jednog časa, instruktor mu je rekao da obruši avion okomito i da ga zadrži u tom položaju. Student je uradio kako mu je rečeno, ali nije bio spremna na ono što se potom dogodilo. Ubrzo nakon što je započeo ovaj okret, motor je počeo da se guši i avion se otima kontroli. Sa panikom u očima, student je gledao instruktora tražeći pomoć, ali instruktor nije rekao ni riječ. Student se brzo pribrao, ponovo popravio držanje i ispravio situaciju na osnovu svog pređašnjeg treninga – onog koji je sada prvi put bio na provjeri.

Kad je avion bio ispravljen i dok su ponovo sigurno letjeli, student se okrenuo prema instruktoru i počeo da istresa svoje strahove i frustracije. Činilo se kao da je instruktor bio otiašao sa posla, a student nije bio zadovoljan zbog toga. Kada je saslušao sve uvrede od svog studenta, instruktor je smirenio odgovorio: „Ne postoji položaj u koji možeš postaviti ovaj avion, a iz kojeg te ja ne mogu izvući. Ako želiš da naučiš da pilotiraš, idi gore i uradi to još jednom.“ Iako je student prošao kroz teško iskušenje i na nekoliko strašnih trenutaka osjećao da je sam, njegov instruktor je sve vrijeme bio s njim. On ne bi dopustio da se bilo šta desi njegovom studentu. On je zapravo koristio ovu nevolju da svog studenata opremi vještinama koje će mu trebati u budućnosti.

Dijelim ovu priču sa tobom jer možda u tvom životu postoji period kada se osjećaš kao da se bez prestanka obrušavaš, period kada ti se čini da ti se motor guši i da si izgubio kontrolu. Brak se lomi, san umire, dobio si dijagnozu, dijete ti je skrenulo sa puta, izgubio si povjerenje, ili posao. U ovačko teškim vremenima, normalno je osjećati paniku i pitati se da li si potpuno sam. Ali samo zato što se trenutno osjećaš usamljeno, uplašeno i napušteno, to ne znači da i jesi. Bog je tu pored tebe; On te nije napustio.

Ponovljeni zakoni 31:8 kažu da te „Bog nikada neće napustiti ni ostaviti,” a u Mateju 28:20, Isus je obećao: „Ja sam uvijek sa vama.“ Ovo su samo dva od mnogih mjesta u Riječi Božjoj gdje te Gospod uvjerava da te nikada neće pustiti da sam ideš kroz teška vremena. Čak i u našim najgorim daniма, čak i tokom teških okolnosti, znaj da nisi sam.

## Podigni nadu!

Oko čega si najstrastveniji? Šta je ono što te uzbudjuje i kada samo misliš o tome? Pokretanje neprofitne organizacije? Volontiranje u tvojoj zajednici? Otvaranje firme? Podizanje porodice? Dobijanje diplome? Često su želje srca toliko jake jer je Bog onaj ko ih je tamo stavio. Čemu god da se nadaš, predaj to Bogu, moli za Njegove smijernice, i ako osjećaš mir po tom pitanju, preduzmi potrebne korake da to i ostvariš. Slijediti Boga ne znači sjediti i čekati – to znači biti hrabar i ići za tim.

mir po tom pitanju, preduzmi potrebne korake da to i ostvariš. Slijediti Boga ne znači sjediti i čekati – to znači biti hrabar i ići za tim. Kreni i pokreni svoje nade...Bog te vodi ka nečem boljem od onoga što možeš zamisliti.

### 3 POGLAVLJE

## Uoči i eliminiši svaki „Ne mogu“

Neka je blagosloven (slavljen) Bog i Otac našeg Gospoda Isusa Hrista (Mesije). On nas je u svom velikom milosrđu, vaskrsenjem Isusa Hrista iz mrtvih, ponovo rodio za živu nadu...

1. Petrova 1:3

„Još malo upornosti, još malo truda i ono što se činilo kao beznadežan neuspjeh, može se pretvoriti u slavan uspjeh.“

— Elbert Hubbard

Godine 1981. jedan milioner koji je sve sam stekao, Eugene Lang vratio se u gradsku osnovnu školu koju je pohađao prije 50 godina. Došao je tamo da bi održao govor u razredu maturanata ali uznemirilo ga je nešto što mu je direktor rekao baš prije nego što je stao na pozornicu. Direktor je obavijestio ovog uspješnog biznismena da, po statistici, tri četvrtine učenika nikada neće završiti srednju školu – prekinuće školovanje mnogo prije nego što prime diplomu. Lang je planirao da govori učenicima o važnosti vrijednog rada i kako to vodi ka uspjehu, ali kada mu je direktor rekao za ovu zapanjujuću statistiku, on je brzo promijenio sadržaj svog izlaganja. Eugene Lang je odlučio da uradi nešto radikalno.

Dok je stajao pred maturantima u ovoj osnovnoj školi u Harlemu, Lang je rekao razredu kako je prisustvovao slavnom govoru dr Martina Luthera Kinga Juniora „Ja imam san“ na Vašingtonskom Maršu 1963. Svakog studenta je podstaknuo da sanja vlastiti san, a onda im je rekao da želi nešto da uradi da im pomogne da vide ostvarenje tog sna. Tog dana Lang se nešto dogovorio sa tim mladim đacima: Obećao je da će platiti školarinu svakom maturantu koji nastavi školovanje i stekne diplomu.

Životi ovih mladih ljudi su se promijenili tog dana. Imali su nadu – mnogi od njih po prvi put. Kada su kasnije intervuisani, jedan đak je rekao: „Imao sam čemu da se radujem, nečemu što me čeka. Bio je to zlatan osjećaj.“ Obećanje Eugene Langa se pretvorilo u školski program, a školski program u nacionalni pokret. New York Times je vodio priču na naslovnoj stranici, a radio emisija 60 Minuta je emitovala priču o milioneru koji je donio nadu grupi učenika u gradu. Hiljade pisama i poziva je počelo da se sliva, pa je 1986. godine Lang pokrenuo nacionalnu fondaciju pod imenom „Ja imam san“ da bi pomogao izgradnju „Ja imam san“ školskog programa širom zemlje. Od tada radi preko 200 programa u 29 zemalja i preko 15.000 studenata, koji su nazvani Sanjari, je primilo pomoć.

A šta je sa onim 61 maturantom – prvim Sanjarima kojima je Lang održao nepripremljen govor tog ranog ljeta 1981? Preko devedeset posto njih je nastavilo školovanje i završilo srednju školu, a većina njih je nastavila sa visokim obrazovanjem. To se sve desilo zbog velikodušnosti jednog biznismena koji je samo želio da pomogne grupi djece da idu dalje.

**Nada je moćna, ali ona ne uspijeva u atmosferi „Ne mogu“.**

Nada je moćna, ali ona ne uspijeva u atmosferi „Ne mogu“.

Prije nego što je Lang ovo obećao grupi siromaštvo pogodjene, gradske djece, mnoga od njih su živjela pod oblačkom „Ne mogu. *Mi ne možemo ići na koledž, jer ne možemo priuštiti troškove školarine. Pa zašto onda završavati srednju školu ako nam koledž nije ni opcija?*“

Eugene Lang je eliminisao „ne mogu“. Nije za njih išao na časove, nije radio njihove zadaće, nije radio na njihovim projektima, nije izlazio na njihove testove – ipak su oni morali uraditi sve što je neophodno. Ali on je uočio i otklonio najveće „ne mogu“ s kojim su se oni suočavali – i tada se nuda vinula.

## Božiji odgovor kada misliš „Ne mogu“

Kada si počeo da čitaš ovu knjigu, vjerovatno si primjetio da sam naslovila ovaj prvi dio kao „Nadaj se većem“. To je zato što sam ubijedena da Bog želi da uradi veće i bolje stvari u tvom životu – On želi da te odvede više. Bog želi sa iskusniš viši nivo radosti, viši nivo mira, viši nivo zadovoljstva, viši nivo nade, a spisak se i nastavlja. Kološanima 3:1-2 kaže:

Ako ste, dakle, vaskrsli s Hristom (u novi život, dijeleći Njegovo vaskrsenje iz mrtvih), tražite ono što je na nebu, onde gdje Hristos sjedi Bogu s desna. Usmjerite svoje misli na ono što je na nebu (više stvari), a ne na ono što je na zemlji.

Sa Bogom, stvari ne postaju gore i gore, one postaju bolje i bolje – ne toneš dublje i dublje, dižeš se više i više.

Zato u Izrekama 4:18 piše da je staza pravednika „kao svjetlo zore,

**Sa Bogom, stvari ne postaju gore i gore, one postaju bolje i bolje – ne toneš dublje i dublje, dižeš se više i više.**

koje sija sve jasnije i jasnije (svjetlige i čistije), sve do punog dana“ i zato Izajia 40:31 kaže da se oni koji se uzdaju u Gospoda „podiju kao orlovi“. Tvoj život u Hristu može biti život koji svaki dan postaje svjetlij, gdje ćeš se vinuti više nego ikada do sada.

Ali jedna od najjačih i najefektivnijih prepreka koja te spriječava da iskusiš onaj život koji Bog želi da živiš je mentalni sklop *ne mogu*. *Ne mogu* je nemilosrdan kavez napravljen da te spriječi da se uzdigneš do svog punog potencijala. Zamisli veličanstvenog hrabrog orla – pticu koja je stvorena da jedri na krilima – stavljenu u skučen kavez dok gleda druge ptice kako se uzdižu. To je ono što se dešava kada živiš sa mentalnim sklopom *ne mogu*. Umjesto da živiš život za koji si stvoren, ti si okovan ograničenjima. „*Ja ne mogu da kontrolišem svoj bijes. Ja ne mogu naći posao. Ja ne mogu da prebolim tu povredu. Ja ne mogu dalje. Ja se ne mogu slagati sa svojim bračnim drugom. Ja ne mogu opet biti ranjiv. Ja ne mogu ovo da shvatim. Ja ne mogu sam da podižem djecu. Ja ne mogu da vjerujem da se ovo dešava. Ne mogu... Ne mogu... Ne mogu.*“ Možemo ovako nastaviti i dalje. Izgleda da nema kraja stvarima za koje ljudi misle da ne mogu uraditi.

Da li si primjetio važnu činjenicu na prethodnom spisku misli? Ja. Ja ne mogu... Ja ne mogu... Ja ne mogu. Ja... Ja... Ja. *Ne mogu* je razmišljanje koje se fokusira na sebe. Ne uzima u obzir pomoć od drugih, a svakako ni od Boga. *Ne mogu* gleda na naše najslabije dijelove i dolazi do ovog beznadežnog zaključka: ne mogu ovo uraditi.

Ovo nije ništa novo. Ljudi i žene u Bibliji su se borili sa istim stavom. Sara je mislila, *Ne mogu da zatrudnim; Suviše sam stara* (vidi Postanje 18:10-12). Mojsije je mislio, *Ne mogu stati pred Faraona; Ne govorim dobro* (vidi Izlazak 6:30). Gideon je mislio, *Ne mogu voditi Izrael; Ja sam najmanji u svojoj porodici* (vidi Sudije 6:15). Ester je mislila,

*Ne mogu spasiti svoj narod; Nikada neću biti pozvana kod kralja* (vidi Estera 4:11). Izajia je mislio, *Ne mogu prorokovati; Ja sam čovjek nečistih usana* (vidi Izajia 6:5-7). Učenici su mislili, *Ne možemo nahraniti ovaj narod; sve što imamo je pet vekni hleba i dvije ribe* (vidi Matej 14:15-18). U svakoj od ovih okolnosti *ne mogu* je stajalo kao kavez koji je sam sebe postavio da bi spriječio ove ljudе i žene da ispune Božiji plan za njihove živote.

Bog nikada nije namjeravao da Sara, Mojsije, Gideon, Estera, Izajia ili učenici urade bilo šta u svojim vlastitim snagama, prema svojim mogućnostima. On je znao da oni ne mogu...ali to nije bilo važno jer je On mogao. Kroz Hrista možemo uraditi sve što trebada uradimo. Možemo se suočiti sa bilo čim!

Sve mogu u Onome koji mi daje snagu. (spreman sam za sve kroz Onoga koji mi daje unutrašnju snagu; dovoljan sam sebi u svemu Hristovom).

Filipljani 4:13

Istina, Sara je bila prestara da ima djecu; Mojsije nije mogao ništa sam ubijediti Faraona, Gideon nije bio kvalifikovan da vodi vojsku; Estera nije bila pozvana pred kralja; Izajia je bio čovjek nečistih usana; i učenici nisu imali dovoljno hrane da nahrane narod. Ali Bog je namjeravao da prevaziđe svako *ne mogu* da bi ispunio Svoj plan i svrhu. Sve što su ovi ljudi i žene trebali uraditi je da uoče i uklone njihovo *ne mogu*. Umjesto što su se usmjeravali na svoje slabosti, oni su izabrali da se usmjere na Božiju snagu, a rezultati su bili čudesni. Bog je učinio predivne stvari u njihovim životima i kroz njihovu vjeru i poslušnost.

I za tebe je ovo istina. Prepoznajem da u tvom životu danas postoje stvari s kojima se suočavaš i zbog kojih misliš: „*Ja jednostavno ne mogu ovo. Ne mogu se više nositi sa*

*ovom situacijom. Ne mogu više ni dan ovo trpiti. Ne mogu čekati odgovor. Ne mogu naći način da oprostim. Da znaš kroz šta prolazim, razumio bi. Ja prosto ne mogu.*" Ali ja hoću da ti kažem da Bog zna da ne možeš...i to nije važno jer On može.

Isus ih pogleda, pa reče: „Ljudima je to nemoguće, ali Bogu nije, jer Bogu je sve moguće.“

Marko 10:27

## Zauzmi stav „Ja to mogu“

Možda si do sada prolazio kroz život misleći da nešto ne možeš jer su ti to drugi rekli. Možda si toliko puta čuo „ne možeš“ da si počeo da prihvataš i prisvajaš taj stav i negdje usput se to *ne možeš* pretvorilo u *ne mogu*. Tužno je što postoji toliko ljudi koji uživaju u tome da drugima govore šta ne mogu uraditi. A nekada su ti upravo ovo najbliži ljudi. Nastavnik, rođak, vođa crkve, roditelj, priatelj, osoba koju mnogo poštuješ – srceparajuće je kada ovi ljudi previde tvoj potencijal. To nas može razočarati i iznuriti ako dopustimo, ali takođe možemo izabrati i drugi smjer. Možemo izabrati da vjerujemo Bogu kada On kaže da možemo!

Ako ti to niko ranije nije rekao, čuj Boga kako ti govori: „Ti to možeš!“ Ove riječi su moćne kada ih čuješ i povjeruješ u njih, jer, kako ja volim da kažem, „Čuda dolaze upakovana u *ja mogu*. Ti to možeš prevazići. Možeš proći kroz to. Možeš oprostiti. Možeš podići pobožnu djecu. Možeš imati sretan brak. Možeš doživjeti radost. Možeš ostvariti svoj cilj. Možeš biti disciplinovan. Možeš nastaviti dalje. Možeš...možeš... možeš.

Kada se susretneš sa nekim izazovom – bez obzira koliko velik ti se činio – Bog će ti dati svu snagu koja ti je potrebna. Naoružan Božjom moći, možeš pronaći i eliminisati svako

„ja ne mogu“ u svom životu i zamijeniti ga sa „ja mogu.“ „Mogu ovo“ je roditelj od „Uradio sam to“. (Israelmore Ayivor)

U svojoj knjizi naslovljenoj *Anatomija bolesti: viđena očima pacijenta*, Norman Cousins govorio je o tome kako je bio smješten u bolnicu sa dijagnozom rijetke iscrpljujuće bolesti. Doktori su mu rekli da je neizlječiva – biće bolestan i u bolovima do kraja svog života. Cousins se odjavio iz bolnice i uradio nešto neobično. Znajući da negativne misli i emocije imaju štetan uticaj na tijelo, Cousins je odlučio da eliminiše ono negativno i pojača ono pozitivno u svojoj situaciji. Odlučio je da mu trebaju velike doze nade, ljubavi, radosti i smijeha. Cousins je počeo provoditi vrijeme tako što je svaki dan gledao stari film Braća Marks i reprize klasične Slatke kamere. Zvuči priличno jednostavno ali je Cousins odlučio da će radije da se smije tokom svog stanja nego da plače od boli. Otkrio je da mu deset minuta smijanja omogućuje dva sata sna bez boli. Nevjerovatno, vremenom se njegova bolest povukla, a priča o njegovom oporavku se pojavila u New England Journal of Medicine. Hiljade ljudi su pisali Cousinsu, zahvaljujući mu što je podijelio ovaj eksperiment, a Hollywood je čak napravio film o tome.

**Kada se susreteš  
sa nekim izazovom  
– bez obzira koliko  
velik ti se činio –  
Bog će ti dati svu  
snagu koja ti je  
potrebna.**

Zahvaljujem Bogu za doktore i za napredak u medicinskoj tehnologiji koju danas imamo. Ne govorim ti o Normantu Cousinsu da te obeshrabrim, da ne bi išao kod doktora. Dijelim ovu priču kao praktičan primjer o tome kako je moćno eliminisati negativne stavove i ona razmišljanja koja te sputavaju. U slučaju Normana Cousinsa, to je čak uticalo i na njegovo fizičko stanje. Samo pomisli kako se tvoj život može promijeniti kada odbaciš negativnost koja je u „Ja ne mogu“ i prigrliš nadu u „Ja mogu“. Kada izabereš da se usmjeriš na stvari

**Samo pomisli kako se tvoj život može promijeniti kada odbaciš negativnost koja je u „Ja ne mogu“ i prigrliš nadu u „Ja mogu“.**

koje možeš uraditi u Hristu, umjesto na one koje ne možeš uraditi sam, to će promijeniti tvoje misli, tvoje riječi, tvoje poglede – i tvoj stav – to će promijeniti tvoj život. Oni koji se uzdaju u Gospoda, nikada se neće razočarati i osramotiti (vidi Rimljanima 5:4-5).

## Uraditi nemoguće

Uz Božiju pomoć mi možemo uraditi ono što se čini nemogućim, ako se ne plašimo da probamo. Neki od najpoznatijih ljudi na svijetu su imali stav „ja ovo mogu“ i uradili su zapanjujuće stvari. Ovde su neki od njihovih citata:

*Baš je zabavno uraditi nemoguće.*

Walt Disney

*Ništa nije nemoguće onom koji proba.*

Aleksandar Veliki

*Svaki plemenit čin se u početku čini nemogućim.*

Thomas Carlyle

*Jedino mjesto gdje tvoj san postaje nemoguć je u tvojim vlastitim mislima.*

Robert H. Schuller

*Postigli bismo mnogo više stvari kada ne bismo mislili da su nemoguće.*

Vince Lombardi

*Riječ nemoguće se ne nalazi u mom rječniku.*

Napoleon Bonaparte

Prije nego što je nešto gotovo uvijek se čini nemogućim.

Nelson Mandela

Ne dozvoli svom umu da bude prepreka stvarima koje možeš postići u životu. Misli na velike stvari, kao i Bog! Mislićeš o nečemu, pa zašto bi onda mislio o malim stvarima? Vjerujem da se mnogo ljudi plaši da razmišlja o velikim stvarima jer ne žele da budu razočarani, ali ja bih radije rizikovala da ponekad budem razočarana nego da živim razočaravajući život jer nikada ništa nisam ni pokušala. Sve što je ikada bilo urađeno je nemoguće dok neko to ne uradi, pa zašto to onda ne bi bio ti?

Mi imamo uspješnu službu u zatvorima i u posljednjih 16 godina, naš tim koji posjećuje zatvore je bio u preko 3.200 zatvora i podijelio 2.7 miliona mojih knjiga sa neseserima na poklon. Posjetili smo svaki državni zatvor u Americi, a ipak, kada smo prvi put ovo pokušali rečeno nam je da je to nemoguće. U prvom zatvorskom odboru koji smo kontaktirali radi dozvole da odemo u sve zatvore u državi rečeno nam je: „To je nemoguće – niko nikada to nije uradio!“

Usudi se da sanjaš i tvoji snovi bi se zapravo mogli ostvariti! Sanjaj ni o čemu i budi siguran da ćeš dobiti to o čemu si sanjao. Možeš pročitati ovu knjigu i, nadam se, završiti je sa mišlju *To je bila dobra knjiga. Osjećam se kao da imam više nade*. Ali podstičem te da ne nastaviš tek tako sa životom kao inače. Dozvoli riječima u ovoj knjizi da postanu katalizator za veće stvari u tvom životu. Imaj veće nade, sanjaj naveleko i misli navelikoj. Neko će to uraditi, a to bi mogao biti i ti!

## Podigni nadu!

Vjerujem da Bog želi da ti pomogne da se osloboдиš iz kaveza *ne mogu*. Možeš primiti nadu još danas, možda po prvi put. Kakav god izazov ili prilika se nalazili ispred tebe, možeš uspjeti – jer Bog je s tobom, i On će ti dati svu snagu koja ti je potrebna. Negativne riječi od drugih ljudi ne slažu se sa Božijim obećanjima i Njegovim prisustvom u tvom životu. Kada je Bog uz tebe, nije važno ko ili šta je protiv tebe (vidi Rimljanima 8:31).

Kreni i podigni svoje nade. Možda si posrtao u prošlosti, ali danas možeš sve prevazići. Možda si pravio greške u prošlosti ali danas možeš donijeti mudre odluke. Možda si odustajao u prošlosti, ali danas možeš istrajati. Možda si oklijevao u prošlosti, ali danas možeš biti odvažan. Možda su ti ljudi prije govorili da ne možeš, ali danas možeš. Oslobodi se kaveza koji te spriječava da uživaš u onom najboljem što Bog ima za tvoj život. Vini se visoko do planova i svrhe koju On ima za tebe. Ako postane teško, nemoj da brineš i da se plašiš. Ti to MOŽEŠ!

#### 4. POGLAVLJE

## Energija nade

*I neprestano se pred našim Bogom i Ocem sjećamo vašeg  
djela proisteklog iz vjere, truda podstaknutog ljubavlju  
i istrajnosti nadahnute nadom u našeg Gospoda Isusa Hrista.*

### 1. Solunljanim 1:3

„Nada je slatkoumna i slatkovidna. Ona slika slike; ona  
tka fantaziju; ona ispunjava budućnost ushićenjem.“

— Henry Ward Beecherd

Kada sa ljudima razgovaram o nadi, otkrivam da mnogi od njih imaju pogrešnu sliku o tome šta je nada zapravo. Ako ne razumiješ šta je nešto ili kako to funkcioniše, sve se može brzo raspasti.

Ovo me podsjeća na šaljivu priču koju je jedan čovjek podijelio sa mnom, a radi se o izazovima treniranja četverogodišnjeg fudbalskog tima njegovog sina. Rekao je da je bio pomalo nervozan kada se prvi put pojavio na fudbalskom terenu. On nikada ranije nije nikoga trenirao fudbal, a niko od djece nije do tada igrao fudbal. Znao je da ima dosta posla da obavi. Sva djeca su se pojavila na vrijeme, noseći nove kopačke, udarajući u sjajne, šarene fudbalske lopte. Svi su bili uzbuđeni.

Ovaj trener novajlja je skupio četverogodišnje saigrače na gomilu, dok su ponosni roditelji pokazivali na svoju dječju i škljocali sliku za slikom na svojim telefonima, odmah

zatim objavljajući javne statuse na društvenim mrežama: „Prvi trening ove godine!“. Trener je djeci objasnio da će imati „odličnu sezonu“, a na svakom treningu će da igraju „zabavne igre“ da bi svaki od njih naučio fudbalske vještine. Djeca su se radovala na pomen igara, pa je trener odlučio da započne vježbu igrom štafete. Rekao je: „Ovako, djeco. Danas ćemo imati trku sa štafetom!“ Djeca su vikala u isti glas: „Ura!“ Osjećajući se samouvjerenog entuzijastičnog odgovora ovih predškolaraca, trener je uvrstio djecu u dva reda, pokazujući im kako da driblaju loptu do gore i nazad. Rekao je: „To je kao trka sa štafetom, a jedina razlika je u tome što udaraš fudbalsku loptu.“ Djeca su ponovo cičala od uzbuđenja.

„Jeste li spremni, djeco?“ uzviknuo je trener. „Daaaaaaa!“ uzvikivala su djeca u isti glas. „Priprema...pozor...KRENI!“

Kada je trener viknuo: „KRENI!“ nastao je urnebes. Umjesto da jedan igrač sa svake staze počne da trči do štafete, dok ostala djeca čekaju svoj red (normalno ponašanje u štafeti), sva djeca su u isto vrijeme počela trčati na sve strane. Čuli su „KRENI!“ i krenuli su! Bez reda, bez strukture – samo haos. Treneru je trebalo, uz pomoć nekoliko unezvjerjenih ali nasmijanih roditelja, dobrih deset minuta da skupi djecu – skidajući neke od njih sa stativa golova, vraćajući druge sa slobodnog prostora i našao je jedno zbumjeno dijete na drugom polju kako pokušava da se pridruži suparničkom timu.

Kada je trener te večeri stigao kući sa treninga, umorniji nego ikada u životu, rekao je svojoj ženi (nastavnici u osnovnoj školi) o fijasku. „Uvrstio sam ih“, rekao je: „Objasnio sam im da ćemo imati trku sa štafetom. Viknuo sam, „Na svoja mjesta....priprema...pozor...KRENI!“ Zar je to moglo da krene loše?“ Žena se nasmijala i objasnila svom zbumjenom

mužu da su djeca u njegovom timu četvorogodišnjaci; nisu još krenuli ni u osnovnu školu. Ovu djecu niko nije naučio pravilima štafete jer nikada nisu bili u grupnim takmičarskim timovima. Jedino što su oni čuli je „trka“ i „KRENI!“ – i to je upravo ono što su uradili. Nisu razumjeli trku, a rezultati su bili frustracija i nered.

Dok razmišljam o ovoj priči, shvatam da ljudi pogrešno razumiju nadu, isto kao što su djeca pogrešno razumjela trku, a rezultati su frustracija i nered. Postoje mnogi ljudi koji misle da je nada pasivna riječ – pomalo lijena emocija. Oni pogrešno prepostavljaju da, ako pasivno sjede, samo se nadajući da će se nešto popraviti, onda možda i hoće. Ali nada nije osjećaj zbog kojeg sjediš i ništa ne radiš. Ona je više od maštanja i želja. Ako je ovo i tvoje viđenje nade, nećeš biti siguran u vezi sa onim šta želiš i onda vjerovatno to nećeš ni dobiti.

Nada nam daje energiju i motiviše nas na akciju. Kao što sam rekla ranije, to je sretno i uvjereni očekivanje dobrog i to sretno i uvjereni očekivanje dobrog čini da iskoračiš u vjeri i da djeluješ u poslušnosti Božijoj Riječi. Nada je suviše uzbudljiva da bi bila pasivna. Nada odvažno vjeruje, usuđuje se da odlučuje, stalozeno govori i strastveno istrajava.

**Nada je suviše  
uzbudljiva da  
bi bila pasivna.**

Sa nadom nema neaktivnosti, jer sa Bogom nema neaktivnosti. Bog se uvijek kreće i radi u tvom životu i on želi da se ti krećeš u poslušnosti sa Njim. Lijena i pasivna osoba koja odugovlači nikada nije sretna osoba. Kada razumiješ moć nade, postaješ osoba koja je spremna i uzbuđena što će se kretati u vjeri i koja radi ono što treba da bude urađeno kada dođe pravo vrijeme.

Nekada možda čekamo na Gospoda, ali istinsko čekanje nije pasivno, nego je vrlo aktivno u duhovnom svijetu. Mi *očekujemo* da Bog uradi velike stvari. Postoji bezbroj stihova u Svetom Pismu koji govore o čekanju na Boga, a u Proširrenom izdanju Biblije, svaki od ovih stihova kaže „čekati i očekivati Gospoda“. Volim to jer pojašnjava da mi treba aktivno da očekujemo da Bog radi u našim životima. Treba da budemo spremni da krenemo na Božiji znak, a dok čekamo, puni smo nade i uvjerenja da Bog planira nešto veliko i divno za nas. Sve što treba je da pomisliš na trudnu ženu koja očekuje bebu! Ona planira, sanja, priprema se, neprestano govoriti i misli o bebi koja je na putu.

## Trči u bitku, a ne iz nje!

Kada pročitaš knjigu Psalama, jedna od prvih stvari koje primjetiš je da je David bio čovjek pun nade i očekivanja. To možeš čuti i u tekstovima koje je napisao. Ovdje je samo nekoliko primjera:

Budite jaki i neka vaše srce bude hrabro, svi vi, koji se nadate Gospodu, **čekate ga i očekujete!**

Psalam 31:24 (istaknut dodatak)

Svaki koji se god u tebe uzdaje, **nada ti se, čeka te i traži**, neće se osramotiti.

Psalam 25:3 (istaknut dodatak)

I sada, šta čekam, Gospode? Moji nada i **očekivanje** su u tebi.

Psalam 39:7 (istaknut dodatak)

Bilo da je čuvao ovce na poljima, vodio grupu odmetničkih vojnika ili vladao kao kralj nad Izraelom, David je uvijek živio u nadi da će Bog uraditi nešto predivno u njegovom životu. Ali njegova nada mu nije dozvolila da sjedi i ništa ne radi.

Naprotiv, nada ga je podstakla na akciju. David je vjerovao da Bog radi nešto čudesno, ali je znao da je u partnerstvu sa Bogom i da treba da bude poslušno aktivan. Zato mi često vidimo Davida kako traži Božija uputstva i onda odvažno preduzima korake vjere (vidi 1. Dnevnika 14:10, 1. Dnevnika 14:14, 1. Samuelova 23:2, 2. Samuelova 2:1).

Možeš li zamisliti da je David bio pasivan, da mu je nedostajalo entuzijazma i da je bio nedisciplinovan kada se suočio sa Golijatom? Zamisli Davida da govori sebi *Pa, sigurno se nadam da Bog nešto čini. Samo ću da sjedim ovdje u jarku sa ostalim momcima. Nadaćemo se da će Bog poslati munju na ovog diva.* Da je to bio njegov stav, Bog bi upotrijebio nekog drugog da porazi Golijata. Bog je tražio nekoga ko će htjeti da uradi svoj dio zadatka – nekoga čija nada će ga podstaći na akciju. David je bio ta osoba!

Kada se David pojavio na prvoj liniji da svojoj braći donese namirnice, čuo je Filistejskog diva kako psuje Boga i ruga se izraelskoj vojsci i istog momenta je podigao svoje nade. Ljudima oko sebe je rekao: „Šta slijedi čovjeku koji ubije ovog Filistieja i skine sramotu sa Izraela?“ (1. Samuelova 17:26). On nije razmišljaо o porazu; nije razmišljaо o neuspjehu; nije razmišljaо o prilikama koje su mu prkosile – bio je pun nade da će uspjeti i da će osvojiti bitku.

Ta nada je Davida podstakla na akciju. Između trenutka kada je prvi put osjetio nadu i trenutka kad je zapravo osvojio bitku, pogledaj koje korake je preuzeo: David je odolio kriticizmu svog brata koji je pokušao da ga obezvrijedi i obeshrabri (stihovi 28-30); ubijedio je kralja Šaula da ga pusti da se bori (stihovi 32-37); obukao je Šaulov oklop, ali je odlučio da ga ne koristi (stihovi 38-39); izabrao je pet kamenova kao municiju za svoju pračku (stih 40), prkosio je Golijatu predviđajući pobjedu (stihovi 45-47); i otrčao je u bitku (stih 48).

David nije imao stav koji kaže: „*Pa, nadam se da će stvari izaći na dobro. Hajde da sačekamo pa da vidimo.*“ Imao je stav koji kaže: „*Moja nada je u Bogu. Hajde da osvojimo ovu bitku!*“ David nije pobegao iz bitke niti se sakrio od nje kao što su uradili vojnici; trčao je u nju pun nade i vjere da kroz Boga može pobijediti tog diva. David je imao pozitivna očekivanja da će se nešto dobro dogoditi!

## Mogućnost nade

Možeš imati isti stav koji je i David imao. Nadu koja se izgrađuje u tvom srcu dok čitaš ovu knjigu možeš upotrijebiti tako da tražiš Božija uputstva, iskoračiti u vjeri i hrabro uraditi ono što ti je Bog stavio na srce. Bog želi da uradi predivne stvari u tvom životu, ali ih neće uraditi ako si beznadežan ili negativan – Bog želi da učestvuješ u čudu tako što ćeš biti energičan i ispunjen pozitivnim isčekivanjima. Možda raz-

**Nada nije nešto što čekamo da osjetimo, to je nešto što odlučujemo da imamo.**

mišljaš: „*Želio bih da osjetim nadu, Joyce, ali jednostavno ne mogu.*“ Nada nije nešto što čekamo da osjetimo, to je nešto što odlučujemo da imamo.

Namjerno se nadaj! Nada je silna, natprirodna mogućnost koju ne želiš da propustiš! Ogranak dio naše energije je povezan sa našim mišljenjem, pa ako se nadamo, naša energija će da poraste isto kao što će i opasti ako smo beznadežni.

Neki se ljudi *nadaju* da će Bog učiniti nešto da promijeni njihovu situaciju, ali ipak nikada sami ništa ne predizimaju. Naprimjer, onaj ko ne traži posao, neće ga ni naći. Zatim postoje ljudi koji preduzimaju akciju, ali se ne nadaju pozitivnom rezultatu. Ni jedni ni drugi neće dobiti ono što žele.

Ali postoje one rijetke individue koji imaju Bogom – inspirisan san; oni se mole i preduzimaju akciju onako kako ih Bog vodi, i ostaju puni nade koliko god im se činilo dugo da čekaju obistinjenje svojih snova.

Kroz cijelu Bibliju, vidimo Božije ljudе kаkо grabe natprirodne mogućnosti i učestvuju u svojim čudima. Kada je Bog obećao da će srušiti zidove Jerihona, Izraelci su marširali oko grada, pobjednički vičući i borili su se u bici...koraci akcije! Dok je Isus pripremao hranu za 5.000 ljudi, učenici su organizovali gomilu i dodavali su im hranu...koraci akcije! Prije nego što je Isus izlječio ženu koja je krvarila, ona se probila kroz gomilu i dodirnula je skut Njegovog ogrtača...koraci akcije! Kada se Duh Sveti spustio na dan Pentakosta, Petar je stao pred ljudе i propovijedao Jevanđelje...koraci akcije! Ako ljudi i žene Biblije mogu zgrabiti svoje mogućnosti i preduzeti odlučne korake u akciji, ti i ja možemo uraditi isto to.

U tvom životu je možda ovako...

Ako se nadaš novoj karijeri, radiš na polju koje bi moglo biti uzbudljiv i nov izazov za tebe, neka te ta nada pokrene na akciju. Možda možeš uzeti časove da proširiš svoje znanje i na taj način imaš koristi u ovoj novoj profesiji. Možda možeš razgovararti sa ljudima koji su trenutno na istom putu do karijere i pitati ih šta možeš uraditi da bi se pripremio. Onda, kada se valjano pripremiš, svim silama traži posao i radi to sa nadom u srcu i pozitivnim riječima koje ćeš izgovorati.

Ako ti nedostaje energije i ako si često bolestan i nadaš se boljem zdravlju, pusti da te ta nada pokrene na akciju. Možda se možeš učlaniti u obližnju teretanu i početi sa novim programom vježbanja. Vjerovatno imaš određene navike

u ishrani i spavanju koje treba da promijeniš da bi poboljšao nivo energije. Možda je to nešto jednostavno kao što je smanjivanje dnevne količine kafe. Lako je sjediti i čekati da Bog nešto uradi, ali ne propusti da pitaš Boga šta je to što On želi da uradiš.

Ako se nadaš da će se neki težak odnos popraviti, pusti da te ta nada pokrene na akciju. Umjesto što čekaš da ta druga osoba nešto uradi, ti nešto uradi. Možda možeš napisati toj osobi smjernu poruku ili ohrabrujući e-mail. Možda možeš izvesti tu osobu na kafu i izviniti joj se za nešto što si možda uradio, a izazvalo je uvredu.

Ako se nadaš da će se popraviti tvoja finansijska situacija, nadaš se da ćeš živjeti bolje nego od plate do plate, pusti da te ta nada pokrene na akciju. Možda možeš sastaviti svoj budžet ili ga procijeniti, da možeš da pratiš gdje tvoj novac odlazi. Možda se možeš sastati sa svojim šefom i pitati za nekoliko mogućnosti na poslu koje bi podigle tvoju zaradu, a ujedno i profit firme.

Prvo treba da budeš jasan u vezi s onim što želiš i što ti treba. Moli se za te stvari u vjeri i budi pun nade dok čekaš na Gospoda. Uvjeri se da hodaš u blagovremenoj poslušnosti prema bilo kom uputstvu koje ti da Sveti Duh. Neki ljudi se mole i onda sumnjaju da će se ono za što su molili ikada dogoditi. Ovakve molitve nisu uslišene. Bog je rekao da „molimo i ne sumnjamo“ (vidi Jakov 1:6). Jedini način da sačuvamo srce i um od sumnji je da ostanemo ispunjeni nadom i pozitivnim očekivanjima. Nada ne bi trebala biti jednokratna ili povremena stvar. Nada treba da bude konstantna u našim životima!

U molitvi razmatraj korake koje bi Bog želio da preduzmeš da bi video ostvarenje svojih snova. Ako je nešto od Boga, On će te voditi i blagosloviti tvoj trud i rad. Bog mi je u srce stavio poučavanje Njegove Riječi i pomaganje drugim ljudima, i ja iskreno mogu reći da od tada nisam bila neaktivna. Imala sam mnogo obeshrabrujućih dana i teških situacija ali sam vremenom naučila kako da budem ispunjena nadom. To je uvijek poboljšavalo moj život i učinilo me je boljom osobom. Ako preduzmeš akciju ka ispunjenju svojih snova i ciljeva, možeš moliti isto ono što je i Mojsije molio: *I neka dobrota Gospoda, našeg Boga, bude nad nama! I učvrsti nad nama djelo naših ruku; da, učvrsti djelo naših ruku.* (Psalm 19:17) Mojsije nije molio Boga da blagoslovi svoju neaktivnu pasivnost; molio je da njegov rad bude blagoslovljen.

## Bog koristi polomljene posude

Možda čitaš ovo poglavlje i bolno si svjestan vremena kada si zabrljaо preduzimajući neke korake. Možda je bilo prilika kada si se otisnuo sa velikim namjerama, uzbuđen da preduzmeš odvažne korake i zaista ostvariš nešto, ali ti nije uspjelo. Ako se tako osjećaš, sigurno mogu da razumijem kroz šta si prošao. Mnogo puta sam dala sve od sebe, ali umjesto da nešto poboljšam, osjećala sam se kao da sam u stvari sve pogoršala. Mislim da smo svi iskusili ovakve dane. Ali ne treba da dozvolimo neuspjesima iz prošlosti da nas spriječe da ponovo pokušamo u budućnosti.

Bog zna da imamo svoja ograničenja i mane. Naši neuspjesi Ga ne iznenađuju, i ne spriječavaju Ga da radi u našim životima. U stvari, Bog će često iskoristiti naša ograničenja da izloži svoju moć.

**Ali ne treba  
da dozvolimo  
neuspjesima iz  
prošlosti da nas  
spriječe da ponovo  
pokušamo  
u budućnosti.**

Naišla sam na jednu priču koja ilustruje na šta mislim:

Jedan nosač vode u Indiji imao je dvije velike posude koje su visile sa krajeva šipke koju je nosio na vratu. Jedna od posuda je bila savršena i uvijek je nosila punu mjeru vode, tokom duge šetnje od izvora do gospodareve kuće. Druga posuda je imala pukotine, i uvijek bi na kraju puta ostala samo na pola puna. Svaki dan tokom dvije godine, nosač vode bi do gospodareve kuće donosio samo jednu ipo posudu vode. Naravno, ona savršena posuda je bila ponosna na svoja dostignuća – savršena za mjesto za koje je bila napravljena. Sirota napukla posuda je bila posramljena svojim nesavršenostima i očajna zbog toga što je mogla postići samo pola od onoga za šta je bila napravljena. Nakon dvije godine posla koji je nesavršena posuda smatrala gorkim neuspjehom, obratila se nosaču i rekla mu je: „Sramim se sebe i želim da ti se izvinim.“ „Zašto?“ pitao je nosač. „Čega se sramiš?“

„Pa, za ove posljedne dvije godine, mogla sam donijeti samo polovinu vode dnevno, jer ova pukotina u meni pušta vodu cijelim putem do gospodareve kuće. Zbog mojih mana, ne vidiš pune rezultate svog truda i rada“, rekla je posuda.

Nosač vode se sažalio na staru napuklu posudu i u svojoj saosjećajnosti joj reče: „Dok se vraćamo kući, želim da pogledaš prelijepo cvijeće duž puta.“ I naravno, dok su išli uz brdo, stara napukla posuda je primjetila prelijepo poljsko cvijeće uz stazu kojom su išli. Ali na kraju puta, ona se i dalje loše osjećala jer je pola njene sadžine ponovo iscurilo.

Tada je nosač rekao posudi: „Da li si primjetila da je cvijeće samo na tvojoj strani puta, a ne i na drugoj? To je zato što sam uvijek znao za tvoju manu i upotrijebio sam je tako što sam zasadio sjeme cvijeća na tvojoj strani puta. Svaki dan dok smo se vraćali sa izvora, ti si zalivala ovo sjeme i dvije godine sam brao ovo predivno cvijeće da bih ukrasio sto mog gospodara. Da nisi bila to što jesi, ne bismo imali ovu ljepotu kojom smo ukrasili njegovu kuću.“

Kao ona polomljena posuda, i ti možeš postići divne stvari. Nije važno što imaš ograničenja i mane. Ne dozvoli da te ono što smatraš slabostima spriječi da preduzmeš odvažne korake inspirisane nadom. 2. Korinćanima 12:10 kaže: „... Jer, kad sam slab (u ljudskoj snazi), onda sam (istinski) jak (spособан, moćan u Božjoj snazi).“ Nije li utješno to znati? Čak i kada si slab, ti si jak jer je Bog s tobom. On koristi svaki dio tvog života – čak i pukotine – da bi stvorio nešto prelijepo.

## Podigni nadu!

Nada je uzbudljiva jer ti daje da igraš ulogu. Ne moraš samo sjediti čekajući da ti odgovor padne sa neba. Možeš donijeti svoje nade Bogu, tražiti Njegovu mudrost, vođstvo i smjernice, i onda preuzeti prave i praktične korake ka tom cilju. Koliko god se zadatak činio teškim i šta god bilo protiv tebe; pusti da te nada pokreće, dan po dan. Dok sa poslušnošću radiš ono za čim osjećaš da te Bog vodi, možeš sa isčekivanjem zahvaljivati Bogu što radi na tvom životu. Uvijek možeš sačuvati pozitivan stav i izgovarati pozitivne riječi. Možeš se sjetiti i ostalih pobjeda koje si imao u životu i ohrabriti se njima. Pobjeda će zahtijevati odlučnost i disciplinu, ali će rezultati biti dinamični. Pa zato kreni i podigni svoje nade. Bog je pomogao Davidu da porazi diva. On može uraditi isto i za tebe.



## 5. POGLAVLJE

# Upoznati novoga sebe

*I svi mi licem koje nije pokriveno velom odražavamo  
Gospodnju slavu i preobražavamo se u istu sliku –  
iz slave u slavu koja dolazi od Gospoda,  
koji je duh.*

*2. Korinćanima 3:18*

„Postoje tri izuzetno teške stvari: čelik, dijamant i znati samoga sebe.“

— Benjamin Franklin

Promjena nije jednostavna – potrebno je vrijeme da se naviknemo čak i na dobre promjene. Kada nas Bog mijenja, treba nam vremena da se uvjerimo da smo se zaista promjenili. Apostol Pavle je ovo znao. Kada razmišljamo o Pavlu, razmišljamo o duhovnom divu, autoru velikog dijela Novog Zavjeta. Kada neko u crkvi ustane i kaže, „Hajde da pročitamo šta je Pavle napisao u Rimljanima“, ili „Kao što je Pavle rekao u poslanici Galaćanima...“ niko to ne dovodi u pitanje. Ali nekada je Pavle bio momak kojeg su svi dovodili u pitanje. Nije bio veliki apostol; bio je samo čovjek sa novim imenom i lošom reputacijom: *farisej nad farisejima. Progonitelj rane crkve. Neko kome se ne može vjerovati.* Pitam se da li je postojao neki period prilagođavanja – period kada se Pavle osjećao više kao Savle nego kao Pavle. Pitam se da li je Pavlu trebalo vremena da se riješi Savla. Pitam se da li se on nekada rukovao sa nekim i rekao, „Zdravo. Ja sam Savle.....mm.....mislim, Pavle. Ja sam Pavle.“

Većina žena koje su udate znaju da promjena prezime-a zahtijeva neko vrijeme privikavanja. Bila si Mary Smith, a sada si Mary Styborski. Bila si Sally Jones, a sada si Sally Rglestein. Potrebno je neko vrijeme da se privikneš na novo prezime ali imaj u vidu da je Pavle prolazio ne samo kroz promjenu imena – Pavle je prigrlio promjenu srca, kao i pri-rode. Zamisli ga kako govori „*Zdravo. Ja sam Pavle. Ja sada slijedim Isusa. Želio bih da ti govorim o Njemu.*“ Mora da su ljudi posmatrali ovog progonitelja hrišćana, fariseja pre-obraćenog u propovjednika i mislili: „*Sačekaj malo. Ovo je onaj Savle. Čuo sam za njega. On progoni i hapsi hrišćane... ne vjerujem mu, a i teško mi je da povjerujem da se zaista promijenio!*“

Dok mi možemo samo da špekulišemo koliko je ljudi na ulici reagovalo na Pavlov novi identitet, Biblijna nam tačno govori kako su učenici reagovali – oni se nisu primili. Nisu bili uvjereni da je Pavle novi čovjek. Djela 9:26 kažu: „Kada je stigao u Jerusalim, Savle pokuša da se pridruži učenici-ma, ali su ga se svi bojali, jer nisu vjerovali da je učenik.“ Ne bi ni razmotrili da ga prihvate da Varnava nije stao pred njih i garantovao za Pavlov karakter. Naravno, znamo da su ga vremenom prihvatali, a ostatak priče je istorija Biblije. Ali postoji samo jedna klauza u prethodnom stihu na koju želim da ti skenem pažnju: „Nisu vjerovali da je učenik.“ Jedina stvar koja može učiniti ovu klauzu još tragičnijom bi bila da su rekli: Pavle *nije vjerovao da je zaista bio učenik.*

Vidiš, Pavle nije mogao kontrolisati ono na šta su učeni-ci mislili. Varnava je morao pričati sa učenicima, a Bog je morao promijeniti njihova srca. Ništa od toga nije bilo u Pa-vlovim rukama. Jedina stvar na koju je Pavle mogao uticati je njegov vlastiti stav. Kada je istina rečena, vjerovatno nije bilo važno u šta su svi ostali vjerovali. Ono što je zaista bilo važno je u šta je Pavle vjerovao. Da nije prigrlio novu osobu

koja je postao u Hristu, nikada ne bi proživio svoju sudbinu. Možeš li da zamisliš Pavla kako hoda okolo i misli: „*Volio bih da mogu putovati i propovijedati Riječ Božiju. To je ono što mi je na srcu. Ali ja sam bio progonitelj crkve. Uvijek ću biti Savle.*“ Ili: „*Kasno sam počeo u životu. Nema šanse da uradim sve ono što bih želio da mogu uraditi za Boga. Predugo sam bio Savle.*“ Da je ovo bio njegov stav, Pavle bi bio očajan i ne bi postigao sve ono što je Bog imao za njega.

Ali onda kada je Bog počeo raditi u njegovom životu, Pavle je razumio da on više nije Savle, pa je prestao živjeti kao Savle. Nije više razmišljao kao farisej, govorio kao farisej, niti se ponašao kao farisej. Stvari su se promijenile. On je bio promijenjen. Data mu je nada. I izabrao je da djeluje u skladu s tim.

Upravo Pavle je bio onaj koji je nadahnut Svetim Duhom napisao:

Ako je, dakle, neko u Hristu, novo je stvorenje (potpuno novo biće); staro (prijašnje moralno i duhovno stanje) je prošlo, evo, novo (i svježe) je nastalo.

2. Korinćanima 5:17 (istaknut dodatak)

Jer, ni obrezanje (sada) ni neobrezanje nije ništa, nego (samo) novo stvorenje (ishod novog rođenja i nove prirode u Hristu Isusu, Mesiji).

Galaćanima 6:15 (istaknut dodatak)

Pavle je bio pun nade i bio je uzbuđen radi svog života jer je „svježe i novo“ nastalo – sada je imao „novu prirodu“ u Hristu Isusu. Pavle više nije šetao okolo misleći, govoreći, brinući, radeći i ponašajući se kao Savle. Bio je promijenjen. Pavle je prigrlio sve novo što je Bog činio u njegovom životu. Prigrlio je nove prilike koje su ga čekale i novu ličnost za koju ga je Bog predodredio.

## Ostavi starog sebe

Ono što je istina za Pavlov život, istina je i za tvoj. I ti si „novo stvorenje (ishod novog rođenja i nove prirode u Hristu Isusu),“ i ti možeš iskusiti da je „svježe i novo nastalo.“ Nisi više osoba koja si nekada bio. Bog je toliko toga učinio u tvom životu – On te je promijenio. Sigurna sam da si, kao i

**Kada bi zastao da razmisliš o tome ko si bio – o stvarima sa kojima si se borio – bio bi prilično uzbuđen što te je Bog toliko daleko odveo.**

ja, daleko od savršenog, ali sam sigurna da si napredovao i da si prešao dug put do promjene na bolje. Kada bi zastao da razmisliš o tome ko si bio – o stvarima sa kojima si se borio – bio bi prilično uzbuđen što te je Bog toliko daleko odveo.

Moj muž, Dave, jutros mi je govorio o čovjeku s kojim igra golf. Taj čovjek je podijelio sa Daveom da njegova žena, iako hrišćanka, nikada nije prevazišla zlostavljanje u svom djetinjstvu. Godinama je imala mentalne i emocionalne probleme, a sada ima mnogo fizičkih problema zbog unutrašnjeg stresa pod kojim živi. Dok smo Dave i ja razgovarali o tome i raspravljali zašto među ljudima sa potpuno istom prošlošću ima onih koji se potpuno oporave, dok drugi ne uspiju, došli smo do istog zaključka. Da bismo se oporavili od bola iz prošlosti, moramo istinski vjerovati da smo nova stvorenja u Hristu. Moramo potpuno otpustiti ono što smo bili i naučiti da živimo u uskrsnuću koje nam je Isus omogućio. Moramo prestati da se poistovjećujemo sa grešnom, ranjenom ili zlostavljanom osobom koja smo bili i početi da se identificujemo sa novom osobom kakvom nas je Bog stvorio u Hristu.

U životu vjernika, nuda ima korijene u razumijevanju da Bog mijenja stvari. Promjena, novo rođenje, transformacija: Ovo je dobra vijest Jevanđelja. Sam, bio si ostavljen, slobodan, daleko od Boga i bez nade. Ali zbog Njegove velike

Iljubavi, Bog je poslao Isusa da ti možeš biti pronađen, iscijelen, pomiren sa Njim, i da ti može biti vraćena nada. Promjena je u spasenju – promjena koja je sada moguća zbog Božije ljubavi za tebe i za mene.

Promjena nije samo u spasenju nego i u tvom svakidašnjem hodu sa Bogom. Kroz cijelo Pismo, kad god su se pojedinci susreli sa Bogom, desila se promjena. Avram je postao Abraham (vidi Postanje 17:5), Saraja je postala Sara (vidi Postanje 17:15), Jakov je postao Izrael (vidi Postanje 23:28), Simon je posato Petar (vidi Jovan 1:42), Savle je postao Pavle (vidi Djela apostolska 13:9). Nisu se samo imena promijenila – promijenio se smjer ljudskih života. Pastir je postao kralj. Bjegunac je postao narodni vođa. Ribari su postali učenici. Farisej je postao apostol.

Važno je primjetiti da su ovi ljudi i žene, kao i Pavle, kada je Bog donio promjenu u njihov život, prigrilili nove karaktere za koje ih je Bog stvorio. David se nije šetao sa mentalitetom mladog pastira; prigrlio je svoju ulogu kralja. Mojsije se nije više u strahu skrivao od Faraona, nego je odvažno izjavio, „Pusti moj narod da ide!“ Petar više nije bio uplašen; ustao je i propovijedao hiljadama ljudi na dan Pentakosta. Svaka od ovih osoba je prigrnila ono što je Bog uradio – i ono što radi – u njihovim životima...a možeš i ti. Ustvari, ako ne prigliš, uvijek ćeš se boriti i živjeti na niskom nivou u životu, daleko od uzbudljivog, moćnog života koji je tvoj u Isusu.

Da te pitam: Vjeruješ li da te Bog bezuslovno voli? Vjeruješ li da su ti SVI grijesi oprošteni? Vjeruješ li da si novo stvorenje sa novim srcem i duhom? Da li si prihvatio sebe? Da li voliš sebe? Da li vjeruješ da te čekaju uzbudljive stvari?

Ako vjeruješ u ovo, dozvoli mi da ti čestitam jer si na dobrom putu ka neopisivo dobrim stvarima. Ako ne vjeruješ,

onda je vrijeme da proučavaš Božiju riječ dok ne povjeruješ. Vjeruj obećanjima u Božijoj riječi više nego što vjeruješ svojim osjećanjima, i nemoj odustati dok ne osvojiš pobjedu. Obnovi svoj um istinom o novom biću. Vjeruj da si ti Božija pravda u Hristu! Ti si opravdan i posvećen kroz krv Isusovu! Imaš Bogom dane talente i sposobnosti! Bog živi u tebi i On te nikada neće ostaviti niti napustiti! Kada shvatiš da si nova osoba, imaćeš novu nadu.

Osoba koja si nekada bio, greške koje si nekada činio, nepravedne stvari koje su ti se dogodile, borbe kroz koje si nekada prolazio – ove stvari više ne moraju da te koče. Nemoj ići okolo govoreći sebi: "*Imam problem sa bijesom. Jednostavno se ne mogu kontrolisati.*" Ne, ta osoba je ono što si nekad bio. Bog te je promijenio iznutra, i Njegova sila koja je sada u tebi te je izmijenila. Sada si osoba puna mira i Gospodnje radosti. Prigrli tu osobu. Počinjemo tako što vjerujemo u dobru vijest Jevanđelja, a onda obnavljamo svoje umove proučavajući Božiju Riječ, i počinjemo živjeti u svjetlu nove osobe koja jesmo u Hristu.

Umjesto što prolaziš kroz život sa mentalitetom žrtve, govorеći sebi: "*Pa, jednostavno ne mogu nikome da vjerujem. Nikada neću imati zdravu vezu zbog svoje prošlosti,*" ili: "*Ništa ne valjam,*" treba da prigriš iscjeljujuću silu Gospoda u svom životu. Ti si nova osoba. On iscjeljuje svaku ranu i vraća ono što si izgubio. U stvari, On će ti dati dupli blagoslov za stvari koje su ti bile oduzete (vidi Izajia 61:7). Ako si bio povrijeđen u prošlosti, to te ne čini žrtvom do kraja života. Možeš prevazići tu bol i živjeti pobjednički život. Ti si novo stvorenje u Hristu, puno nove snage i nove nade. Zapamti, tvoja prošlost nije tvoja budućnost!

Samouvjereno možeš živjeti svaki dan znajući da si snažniji nego što si bio, jer Bog svaki dan čini velika djela u tvom životu. To ne znači da si postigao sve što želiš da postigneš

i to ne znači da sada sve radiš savršeno, nego to znači da sada možeš imati novu nadu. Ta nada te nadahnjuje da kažeš, kao Pavle: „Nije da sam to već postigao ili da sam postao savršen, nego hitam da lje, ne bih li nekako dohvatio ono radi čega je Hristos Isus dohvatio mene.“ (Filipljanima 3:12).

**Samouvjerenjem  
možeš živjeti svaki  
dan znaajući da si  
snažniji nego što si  
bio, jer Bog svaki  
dan čini velika djela  
u tvom životu.**

Nikada više nemoj govoriti „Ja to ne mogu“, „Neću uspjeti“, ili „Nisam dovoljno dobar.“ Ovo su beznadežne riječi. Možda ove izjave opisuju starog tebe, ali sigurno ne opisuju novog tebe u Hristu. Ti si dijete Božije. Ti si i više nego osvajač. Ti si glava, a ne rep. Ti si Božija pravednost u Hristu Isusu. Veći je Onaj koji je u tebi nego onaj koji je u svijetu.

## Tvoj novi čovjek ima naslijedstvo

Kada si postao vjernik, došao si u novu porodicu – Božiju porodicu. Sada imaš braću i sestre u Hristu koji razumiju kroz šta prolaziš i koji te mogu ohrabriti na tvom putu, i imaš nebeskog Oca koji te nikada neće ostaviti. Jedan od mnogih blagoslova koje primaš od svog nebeskog Oca je naslijedstvo. Efescima 1:18 kaže:

Da vam prosvijetli oči srca, da sazname kakva je nuda na koju vas je pozvao, koliko je bogatstvo njegovog slavnog naslijedstva među svetima (Njegovim odvojenima)... (istaknut dodatak)

Kroz Hrista, naslijedstvo je namijenjeno svakome od nas. To znači da nismo unajmljene sluge koje rade da bi nešto zasadili kod Boga, nego da smo Njegova djeca i da smo naslijednici. Kao sunaslijednici sa Hristom, dobijamo ono što je

**Kao sunaslijednici sa Hristom, dobijamo ono što je On zaradio i žrtvovao za nas. Biblija kaže da sve što je Njegovo, sada je i naše (vidi Jovan 16:15).**

On zaradio i žrtvovao za nas. Biblija kaže da sve što je Njegovo, sada je i naše (vidi Jovan 16:15). A kada shvatiš da imaš naslijedstvo od Boga, to mijenja tvoju perspektivu. Problemi više ne izgledaju tako veliki, budućnost ne izgleda tako zastrašujuća – možeš biti radostan i pun nade, jer je Bog već obezbijedio sve što ti treba!

Mi služimo dobrom Bogu, a on želi da nam preplavi život dobrim stvarima. Ako svaki dan živiš sa brigom kako ćeš platiti račune, bojeći se da nećeš dobiti unapređenje na poslu, ogorčen zbog nečega što ti je neko rekao iza leđa, onda ne živiš kao dijete koje razumije da ima naslijede. Briga, strah i gorčina su osjećanja tvog starog čovjeka. Kao novi čovjek umiješ da vjeruješ, da budeš siguran i da oprostiš, jer vjeruješ da Bog može preuzeti sve što ti se desi i izvesti to na dobro – On dobre stvari čuva za tebe. Ako neko drugi dobije to unapređenje, Bog očigledno ima nešto bolje za tebe. Ne brini se i ne padaj u depresiju. Prigrli novog sebe – shvati da imaš veliko naslijedstvo u Bogu – i podigni svoje nade prema onome što će te Bog naučiti i kako će ti obezbijediti nešto kroz ovu situaciju. Ako neko kaže nešto loše o tebi, umjesto da se ogorčiš, pitaj Boga kako da se izboriš sa tom situacijom. U prošlosti, možda bi izgubio strpljenje i izgrdio tu osobu, ali to si bio stari ti. Bog je od tada prošao sa tobom dugačak put. U Njemu imaš naslijedstvo, i On može tu situaciju da preokrene u nešto dobro.

## Novija i još veća očekivanja

Započeli smo ovu knjigu govoreći o očekivanjima. I dok završavamo ovo poglavje i ovaj prvi dio, želim da te podstaknem da zaista počneš podizati svoja očekivanja. Imaj nade da stremiš ka višem! Što više nade imaš, lakše će ti biti da hodaš u vjeri. Molim se da je Bog gradio tvoju vjeru kroz ovih prvih pet poglavlja – zato mislim da je vrijeme da očekuješ više od Boga. On te tako mnogo voli i želi da blagoslovi tvoj život preko mjere (vidi Efescima 3:20).

Kažemo da trudna žena „očekuje“ dijete. Zato ona počinje da planira. Ona djeluje prema svojim očekivanjima – kupuje odjeću, flašice, sređuje krevetac i priprema jaslice. Treba da se ponašamo kao ljudi koji očekuju. Treba da ustanemo ujutru planirajući da će Bog da uradi nešto veliko. Uz Božiju pomoć, možemo razmišljati: „*Možda je danas taj dan. Danas je dan koji je stvorio Bog i nešto divno će mi se dogoditi.*“ Čak i ako Bog ne uradi tačno ono što si od Njega tražio, pokušaj da proširiš svoju perspektivu. Možda moliš za nešto, a Bog ima na umu nešto mnogo bolje. Nemoj da moliš samo za dobro; vjeruj i nadaj se nečemu odličnom.

**Treba da ustanemo ujutru planirajući da će Bog da uradi nešto veliko.**

Svaki dan kada se probudiš reci „Imam sretno i uvjereni očekivanje da će se danas desiti nešto predivno. Moj bračni drug će me blagosloviti. Moja djeca će se pristojno ponašati. Na poslu ću dobiti sjajne vijesti. Bog će mi dati priliku da nekoga blagoslovim. Neki blagoslov će doći e-mailom. Danas ću doživjeti proboj.“ Ne plaši se da vjeruješ i da izgovaraš blagoslove za taj dan, od momenta kada se probudiš. Odlučila sam da ovu knjigu nazovem „Sretna knjiga.“ Vjerujem da će oni koji je čitaju postati sretniji nego što su ikada bili. Nada je radosno i uvjereni očekivanje da će se dogoditi nešto dobro!

Nada briše granice oko naših očekivanja. Da li od Gospoda očekuješ mnogo ili malo? Možda se polovično nadaš da će Bog uraditi nešto. Možda polovično vjeruješ u nešto dobro, ali želim da te izazovem da potpuno i cijelim srcem vjeruješ u stvari veće nego ikada ranije. Želim da te izazovem da vjeruješ da te Bog može upotrijebiti na bolje načine. Ako pišeš pjesme, zašto ti Bog ne bi dao najbolju pjesmu koja je ikada napisana? Ako propovijedaš Riječ, zašto ti Bog ne bi dao neku tako silnu poruku, toliko fanstastičnu, da svaki put kada se propovijeda ona oslobađa iz ropstva? Ako podižeš djecu, zašto tvoja djeca ne bi stasala u one koji će mijenjati svijet? Zašto ne bi bio unaprijeđen u svom poslu? Zašto ne bi sreo osobu s kojom ćeš se vjenčati pa da imate predivan život? Zašto ne bi prevazišao tu povredu? Zašto ne bi donio dobru promjenu u živote ljudi oko sebe? Vrijeme je da počneš da živiš na višem nivou nade i očekivanja. Vjeruj da ako se bilo šta dobro može desiti bilo kome, onda može i tebi!

**Vjeruj da ako se  
bilo šta dobro može  
desiti bilo kome,  
onda može i tebi!**

## Podigni nadu!

Kada se danas pogledaš u ogledalo, nadam se da ćeš se vidjeti onako kako te Bog vidi. Ti nisi izgubljena, slomljena, poražena i beznadežna osoba. Ti nisi osoba koja ne može da kontroliše svoje misli i emocije, i ti nisi osoba koja se ne može izboriti sa svojom prošlošću. Ti si mnogo više od ovoga! Ti si više nego osvajač (vidi Rimlajnima 8:37). Ti si novo stvorenje u Hristu i Bog radi u tvom životu. Malo po malo, dan po dan, Bog te mijenja. Možeš da živiš drugačije od onoga na šta si navikao jer si ti onaj koji prevazilazi. Vjeruj ovim istinama. Ustani i podigni svoju nadu!

## DRUGI DIO

# Nadati se kad si povrijedjen

.....

*(Sada) tu nadu imamo kao pouzdano i čvrsto sidro duše...*

*Jevrejima 6:19*

Nada nam je potrebna uvihek, ali posebno onda kada smo povrijedjeni. Nada nam se čini nedostiznom kada smo usred neke teškoće ili lične patnje bilo koje vrste. Međutim, najvažnije je ne koristiti se izgovorom: „Prolazim kroz težak period“ da bismo mogli biti obeshrabreni, depresivni i beznadežni.

Dok se borimo sa nečim tada je još važnije da budemo puni nade, iako je tada to i najteže. Bog želi da nas provede, a ne da nas vidi zaglavljene u patnji.

Kada doživimo neki gubitak, hajde da se suočimo sa tim, a ne da se izgubimo u tome. Kada se desi neka tragedija, hajde da tugujemo kako treba, a ne da se predamo duhu žalosti koji će cijeli naš život pretvoriti u tragediju. Kada smo razočarani, hajde da se ponovo očaramo. Kada smo depresivni, hajde da podignemo glave jer bismo se svi osjećali bolje!

Sve što je o Isusu je gore! Došao je sa Nebesa, vratio se u Nebesa kada je Njegov posao ovdje bio gotov, a obećano nam je da će ponovo doći u oblacima i svako će Ga vidjeti. On podiže naše glave, naš duh i naše živote. S druge strane,

imamo neprijatelja po imenu Lucifer, satanu, velikog prevaranta, odnosno đavola i sve što on nudi je dole. On nudi depresiju, obeshrabrenje, odbačenje, očaj, potištenost, razvod, smrt itd.

Objavljujem rat beznadežnosti i zovem te da mi se pri-družiš u borbi protiv nje. Svako od nas ko se obaveže da će širiti nadu gdje god da krene, postaje dio odgovora koji svi-jet traži.

## 6. POGLAVLJE

# Gore glavu

*Podižem svoje oči ka gorama odakle će mi doći pomoć. Moja pomoć dolazi od Gospoda, koji je načinio nebo i zemlju.*

*Psalam 121:1,2*

Nada je ono pernato biće  
 Što prhne na granu u duši;  
 Napjev za napjevom bez riječi sriče  
 I nikad ne presuši.

— Emily Dickinson

Kada imam slobodnog vremena volim da gledam filmove. Dave i ja puno vremena provodimo putujući pa kad dođem kući, raduje me što će se zavaliti u svoju fotelju sa psom u krilu i nekoliko sati uživati u nekom zabavnom filmu. Vjero-vatno je isto i kod tebe – prosto ima nešto ugodno u gledanju dobrog filma.

Bez obzira kakvu vrstu filmova voljeli (ja volim klasike ili dobru misteriju), svi smo prisustvovali istoj sceni. To je jedan holivudski favorit koji se smjestio u akcione filmove, krimi trilere, avanturističke filmove, ratne filmove, pa čak i romantične komedije. Govorim o sceni „strah od visine“. Vidio si je, zar ne? Postavke su različite, ali dilema je ista – VISINA! Glavni lik negdje stoji na vrhovima prstiju na uskom obodu, ili nesigurno prelazi klimav most, ili se nervozno penje na gradski toranj. Čini se da je katastrofa neizbjegna. U svakoj od ovih scena, naš heroj je nerealno visoko, vjetar

duva, on stopalima klizne nekoliko puta, muzika je dublja...a ja sam toliko nervozna da jedva mogu da gledam to!

Ako si vidio ovu scenu isto onoliko puta kao i ja, znaš da postoji ona klasična rečenica koju uvijek neko izgovori u ova-kvoj situaciji. Baš onda kada heroj prelazi nazuži dio oboda, zaobilazi najklimaviji dio mosta ili se penje na najopasniju stijenu na planini, neko izgovori ove riječi: „Šta god radio, ne gledaj dole!“ Čini se kao dobar savjet, zar ne? Samo se skoncentriši, gledaj gdje ideš, nastavi da se krećeš i *ne gledaj dole*. Ali iz nekog razloga naši omiljeni likovi iz filma rijetko kad poslušaju. Vrlo su predvidivi. Prva stvar koju urade je da pogledaju dole, a ishod je uvijek isti: panika.

Možda se danas možeš poistovijetiti sa ovim. Naravno, nisi hiljadama metara iznad tla (bar se nadam da nisi), ali možda si na ivici finansijske borbe i čini ti se da ćeš se okliznuti. Možda si u vezi koja se njiše i trese kao klimav most koji bi se mogao urušiti svakog momenta. Možda pokušavaš preći preko neke prepreke koja je toliko visoka da te čini

**Šta god radio,  
ne gledaj dole.**

nervoznim i uplašenim. Ako je to slučaj, ako ti je teško danas – želim ti dati jedan poznat savjet: Šta god radio, ne gledaj dole.

Kažem „ne gledaj dole“ jer mnogi ljudi gledaju prema pogrešnim stvarima kada se nađu u teškoj situaciji. Fokusiraju se na veličinu problema, na rizike s kojima se suočavaju, na negativne stvari koje drugi govore, na boli iz prošlosti, na svoje sopstvene nezdrave emocije, ili na svoje strahove i neuspjehe. Ali ni u jednoj od ovih negativnih stvari nema nade. Sve ove stvari su „dole“ i gledanje u njih ti neće pomoći da se popneš.

Biblija nam daje bolju opciju kada nam je potrebna pomoć. Umjesto što gledamo dole prema stvarima koje nam ne mogu pomoći, Riječ Božija nam kaže da gledamo gore – da se fokusiramo na Onoga koji će nam uvijek pomoći. Jevrejima 12:2 kaže: „Uprimo pogled u Začetnika i Usavršitelja vjere, Isusa...“, a Izajia 45:22 kaže: „Obratite se meni i spasićete se svi krajevi i zemlje! Jer ja sam Bog i niko drugi.“ Kada je bio u nevolji, David bi pogledao u nebesa jer je znao da njegova pomoć dolazi sa visine (vidi Psalm 121:1-2). Želim da te ohrabrim da uradiš to isto.

Kada prolaziš kroz nešto i nisi siguran šta bi uradio, gdje bi išao, ili čak gdje bi pogledao...pogledaj gore. Potraži Gospoda. On je Onaj koji će ti pomoći. On je Onaj koji će te spasiti. On je Onaj koji neće dopustiti da padneš. Isus je rekao da pogledamo gore, jer je naš spas blizu (vidi Luka 21:28). Naše spasenje ne gleda prema dole. Mi gledamo ka Bogu i očekujemo da nas otkupi.

**Kada prolaziš kroz  
nešto i nisi siguran  
šta bi uradio, gdje bi  
išao, ili čak gdje bi  
pogledao...  
pogledaj gore.**

Fraza “pogledati gore” znači mnogo više nego gledati u nebo. To znači imati stav pun nade, pozitivnu perspektivu, i očekivati nešto od Boga. Bog je dobar i On uvijek planira nešto dobro za nas.

## **Boga ništa ne može zamijeniti**

Tokom perioda u kojima smo nesigurni, obično se oslanjamo na ljude ili stvari i ovo je razumljivo ali neefikasno. Iako znamo da treba da vjerujemo Bogu i iako vjerujemo da nas On voli i da ima plan za naš život, u nama postoji prirodnata težnja da se držimo nečeg opipljivog – nečega što možemo vidjeti golim okom. Boga možemo vidjeti, ali moramo

Ga vidjeti očima vjere. Vidimo Ga očima srca i uvijek bismo trebali staviti svoju nadu u Njega.

Dok sam putovala svijetom, služeći i moleći se sa ljudima, pomažući im da prođu kroz svoje borbe, primjetila sam da postoje mnoge stvari kojima se ljudi okreću kada su povrijeđeni, umjesto da se prvo okrenu Bogu. Ovde je samo nekoliko najčešćih primjera:

## Okrenuti se prijateljima

Divno je imati prijatelje s kojima možeš pričati i povjeriti im se kada si povrijeđen. Posebno prijatelje koji su vjerni, koji će se moliti s tobom i ohrabriti te. Međutim, tvoji prijatelji nemaju sve odgovore. Iako imaju dobre namjere, oni te mogu odvesti u pogrešnom smjeru, ako se njihov savjet ne poklapa sa Božjom Riječju. Naši prijatelji se mogu sažaliti na nas, ali neće uvijek biti dovoljno iskreni da nam kažu ono što treba da čujemo. Sjećam se kada mi je Dave rekao da treba da prestanem da se samosažaljevam. To mi se nije svidjelo i naljutila sam se na njega, ali to što je rekao je bila istina i trebalo mi je da je čujem. Dave me je volio dovoljno da mi pruži ono što mi je trebalo umjesto onoga što sam željela da čujem. Viđala sam situacije kada su prijatelji onemogućavali nekoga da se izvuče iz te situacije umjesto da mu kažu ono što je zaista bilo potrebno.

Nema ništa loše u tome da se osloniš na svog prijatelja u teškim vremenima, ali ne dozvoli da prijatelji zauzmu Božije mjesto u tvom životu. Kada si povrijeđen, prvo idi kod Boga i traži Njegove smjernice za tu situaciju. Nakon što provedeš neko vrijeme u Božjoj Riječi i tražeći Gospoda u molitvi, onda idi kod svojih prijatelja i podijeli sa njima ono što vjeruješ da ti Gospod govori. Zapamti, tvoji prijatelji su ljudi kao i ti.

Njihova mogućnost da ti pomognu je ograničena. Ako se osloniš samo na njih, bićeš razočaran.

## Okrenuti se bračnom drugu

Jedna od stvari koje sam naučila na početku svog braka je da ne mogu očekivati da će Dave biti izvor moje sreće – to može biti samo Bog. Bog je izvor naše radosti (vidi Psalm 43:4), a ne naš bračni drug.

Sjećam se da je bilo dana kada bi me Dave toliko uzrujao jer bi otisao na golf ili da gleda utakmicu umjesto da proveđe jutro sa mnom. Nije da me je Dave zanemarivao – on je divan suprug i voli da provodi vrijeme sa mnom – ali sam ja željela da on stalno bude sa mnom. Bila sam uzrujana jer sam očekivala da on bude izvor moje sreće i zadovoljstva. Željela sam da se zbog njega osjećam sigurnom. Ali Gospod mi je pokazao da svaki put kada tražimo od neke osobe (pa čak i bračnog druga) da uradi ono što samo Gospod može da uradi, bićemo frustrirani u životu.

Onog momenta kada sam prestala da prisiljavam Davea da mi da nešto što samo Bog može da mi da, dobila sam novi mir i novu radost u životu...i u braku. S druge strane, kada sam uznenimirena zbog nečega ili kada mi je potreban razgovor, Dave je uvijek tu za mene da me ohrabri i pomegne mi, ali oboje smo svjesni da nam samo Bog sve može pružiti u svakoj situaciji.

## Okrenuti se sebi

Kada postane teško, u svima nama postoji tendencija da kažemo: „Sam ću se pobrinuti za ovo.“ Nekada je tome razlog što, kada si bio mlađi nije bilo nikoga ko bi ti pomogao,

pa si uvijek morao da budeš nezavisan. Nekada je to zato što si jaka ličnost, vjerovatno veoma talentovana i jednostavno je lakše vjerovati da će te ove sposobnosti izvući iz problema.

**Suočićeš se sa situacijama kroz koje jedino Bog može da te provede.**

Ali nisi stvoren da sam ideš kroz život, a doći će vremena kada tvoje vlastite snage neće biti dovoljne. Suočićeš se sa situacijama kroz koje jedino Bog može da te proveđe. Predlažem da se sada navikneš da se okrećeš ka Njemu. Ne čekaj da dođe tolika prepreka ili toliko dubok bol koji će te iz očaja okrenuti Njemu. Stvari naviku da svako jutro kada ustaneš, kažeš: „Gospode, danas ti vjerujem. Hvala Ti za darove i sposobnosti koje si mi dao, ali ne oslanjam se na svoje vlastito viđenje. Oslanjam se na Tebe. Daj mi mudrost, uputstva i milost koja mi je danas potrebna da živim pobjednički život.“

Koliko god prijatelji mogu biti veliki ili divan vjerni bračni drug i koliko god da je važno prepoznati darove i talente koje ti je Bog dao, ni jedna od ovih stvari ne može zauzeti Božije mjesto u tvom životu. Psalam 37:39 kaže: „Spasenje pravednika je od Gospoda, koji je njihova snaga u vrijeme nevolje.“ Gospod je naše utočište i naše uporište, niko drugi. Zato smo ispunjeni nadom kada se u vrijeme nevolje oslanjamo na Gospoda, a ne na ljudе.

Da li te je neko razočarao ili napustio? Je li te to naljutilo ili ozlojedilo? Da li si ikada razmišljao o tome da si u stvari togriješio što si, umjesto od Boga, od te osobe tražio da ispunis tvoje potrebe? Nije da ne suosjećam sa tvojom bolni niti želim da ovo grubo zvuči, ali je istina koju treba da čujemo često na početku bolna. Ako više nade i vjere posvećujemo ljudima nego Bogu, On će nam otkriti njihove slabosti

i dopustiti im da nas razočaraju da bismo se naposlijetku okrenuli Njemu. Sada nam zbog toga nije ugodno, ali će nas istina oslobođiti!

## Ignoriši oluju – fokusiraj se na Isusa

Matej 14:24-33 slika prilično dramatičnu sliku. Učenici pokušavaju da plove preko Galilejskog mora noću dok bjesni strašna oluja. Ako bi neko mogao s tim da se izbori, to su Petar i učenici. Ipak su ovi ljudi iskusni ribari. Ovo nije bila njihova prva oluja. Ali snaga ove oluje prevazilazi njihovo iskustvo.

Da li si se ikada našao u ovakvoj situaciji? Da li si mislio da možeš da se izboriš sa tom situacijom, da bi shvatio da je ova oluja drugačija od ostalih? Ovo je upravo ono što se dogodilo učenicima; iz ove oluje se nisu mogli sami spasiti.

Vidjeći da je učenicima potrebna pomoć Isus „im priđe, hodajući po moru“ (stih 25). Sviđa mi se kako Biblija ovo nonšalantno bilježi. Nije boldovano; nije napisano velikim slovima; rečenica nema čak ni uzvičnik. Isus je hodao po vodi, i ne treba da budemo iznenađeni. Ovo je kao da nam Bog govori da On može, i da će uraditi šta god je potrebno da dođe do onog mesta gdje nas boli. Ne postoji dovoljno velika oluja koja bi spriječila Boga da te spasi.

Kada je Isus došao do čamca, učenici su bili uplašeni. Mislili su da je Isus utvara. Ali Petar je rekao: „Gospode, ako si to ti, zapovijedi mi da dođem k tebi po vodi“ (stih 28). Čim je Isus rekao: „Dođi,“ Petar je izašao iz broda i, čudesno, počeo je hodati po vodi. Petar ovo nije uradio u svojim

**Ne postoji dovoljno velika oluja koja bi spriječila Boga da te spasi.**

vlastitim snagama (sigurno nije imao moć hodanja po vodi), i on to nije uradio uz pomoć drugih učenika (nisu mu dali savjete kako da se šetka po talasima). Samo je Gospod mogao ovo uraditi. Isus je bio Petrova jedina nada.

Dok je Petar hodao prema Isusu, on je uradio ono što i ti i ja često uradimo – sklonio je pogled sa Gospoda i pogledao dole. Pogledao je u talase i počeo se fokusirati na oluju. Umjesto da misli: „*Hodam po vodi sa Isusom! Ovo je nevjerojatno! Nema granice onome što Bog može uraditi u mom životu!*“ Petar je počeo razmišljati: „*Šta ako se utopim? Kako je ovo uopšte moguće? Može li me Isus zaista spasiti?*“ To je ono što se desi kada pogledaš dole ka svojim problemima umjesto gore ka obećanjima koja imaš. Uzvičnici se pretvaraju u upitnike. Vjera se pretvara u strah. I počinješ da toneš.

Srećom, imamo Spasitelja koji nam pomaže čak i kada nam je vjera slaba. Isus je dosegnuo Petra i spasio ga je. Nisu ga spasili učenici, nego Isus.

Ova priča savršeno opisuje šta se dešava u oluji tvog života. Kolika god da je oluja, ona nije prevelika za Gospoda. On

te vidi, zna tačno gdje si. On dolazi da te spasi. Ako se danas boriš sa nečim, počni da tražиш Gospoda. Nemoj biti kao učenici koji su se iznenadili kada se Isus pojavio; umjesto toga, radosno očekuj da će se Bog pojaviti, da neće zakasniti i da će smiriti oluju. Sve dok

gledaš prema Njemu, možeš hodati iznad stvari koje prijete da unište tvoj život. Možeš živjeti u miru, radosti, zadovoljstvu i sreći jer si fokusiran na Isusa. Ali onog momenta kada počneš da gledaš ka talasima – negativnim izvještajima, zastrašujućim mislima, onome što drugi misle, lažima neprijatelja – ove stvari će te utopiti svaki put. Čak i usred haotične

**Radosno očekuj da  
će se Bog pojaviti,  
da neće zakasniti i  
da će smiriti oluju.**

oluje, kada se čini da se sve u tvom životu trese, pogledaj ka Gospodu. On je jedino što se ne može zatreći.

## Jedina stvar na koju se možeš osloniti

Bog želi da budeš pun nade, a ne pun obeshrabrenja, očaja i depresije. Biblija nam kaže u Rimljanima 5:5 da oni koje stave svoju nadu u Boga nikada neće biti razočarani ni posramljeni. Sjajno! Razmisli o ovome. Možeš uložiti nadu u prijatelje i razočarati se. Možeš uložiti nadu u bankovni račun i razočarati se. Možeš uložiti nadu u nekog političara i razočarati se. Možeš uložiti nadu u posao i razočarati se. Ali ako uložiš nadu u Boga, nećeš se razočarati. Čak ako prolaziš kroz stvari koje ponekad ne razumiješ, On će ih uvijek na kraju izvesti na dobro.

Sve dok imaš nadu, imaćeš i mogućnosti, jer sve osim Boga je podložno promjenama. Koliko god loš izvještaj o nečemu dobio, prva stvar na koju treba da pomisliš je: „*Pa, to se može promijeniti.*“ Tvoje finansije se mijenjaju, tvoja djeca se mijenjaju, tvoj šef se mijenja, tvoja situacija se mijenja, ali se Bog ne mijenja. Bog je stijena – On je stalan. Malahija 3:6 kaže: „Jer ja Gospod ne mijenjam se.“ Ljudi se mijenjaju, vrijeme se mijenja, okolnosti se mijenjaju, mišljenje se mijenja, raspoloženje se mijenja, odanost se mijenja, posao se mijenja, škola se mijenja. Ovo je nešto na šta bismo se trebali naviknuti. Jedina stvar u koju bismo trebali biti sigurni na ovom svijetu je da će se nešto uvijek mijenjati. Zato je veoma važno da nam nada uvijek bude u Gospodu i da gradimo svoj život na Stijeni. Dok god je Bog glavni izvor svega onoga što ti je potrebno – znajući da je On jedini koji se nikada ne mijenja – moći ćeš da se izboriš sa svim onim što se mijenja, jer je Bog temelj tvog života.

Emotivno mnogo propatimo, a ne bismo morali kad bismo stavili našu nadu u Boga i prestali očekivati da će neko drugi uraditi ono što samo Bog može uraditi.

## Podigni nadu!

Nije svaki dan savršen dan, niti je svaki dan prognozirana oluja. Može nas boljeti glava ili srce. Može trajati jedan dan ili duže. Ali s čim god da se suočavaš, želim te ohrabriti da POGLEDAŠ GORE! Ne fokusiraj se na negativne okolnosti, stvari usmjerene protiv tebe, na zastrašujuće misli koje se pojavljuju.

Kada gledaš gore, nada se ponovo rađa. Iako oluja može biti velika, nije veća od Boga. Sve što treba da radiš je da tražiš Njega i da vjeruješ da će On uraditi šta god je potrebno – čak i hodati po vodi – da dođe do tebe. Zato ustani i podigni nade. Izaći ćeš iz ovoga snažniji nego što si bio. Samo ostani fokusiran na Isusa, imaj pozitivan stav, idi naprijed i šta god radio...ne gledaj dole.

## 7. POGLAVLJE

# Broji blagoslove, a ne probleme

*Hvali Gospoda moja dušo,  
i ne zaboravljam sva njegova dobra!*

*Psalam 103:2*

„Samo u tami možeš vidjeti zvijezde.“

— Martin Luther King Jr.

Jednom sam čula priču o čovjeku koji je jedne večeri izgubio ključeve. Očajan, mahnito ih je tražio napolju na uglu ulice ispod ulične rasvjete. Prolaznici su primjetili njegovu mahnitu potragu i zastali su da mu pomognu i da traže zajedno sa njim. Nakon nekoliko minuta marljive potrage, jedan od njih upita: „Reci nam, gdje si tačno ispustio ključeve? Ako znamo gdje su, možda ćemo imati više sreće.“ Ne oklijevajući, vlasnik izgubljenih ključeva je odgovorio, „Ispali su mi kad sam bio kod kuće.“ Zabbezknut ovim odgovorom, ovaj stranac je uzviknuo: „Ako si ih ispustio u kući, zašto ih tražimo ovde pod svjetлом?“ Vlasnik izgubljenih ključeva je odgovorio: „Zato što se ovdje bolje vidi.“

Tvoja prva misao je vjerovatno *Ovo je smiješno. To niko ne bi uradio*. Možda zvuči blesavo da ključeve koje si izgubio u kući tražиш dok stojiš pod banderom, ali ti sa razlogom pričam ovu priču. Mnogo puta u životu, tražimo nešto što nam treba, ali tražimo na pogrešnim mjestima. Jedna stara pjesma kaže da mi „tražimo ljubav samo na pogrešnim mjestima.“

Mislim da je ovo istina. Ali takođe mislim i da nadu tražimo na pogrešnim mjestima.

Ako zaista želimo da uživamo u životu, moraćemo promjeniti mjesto gdje tražimo nadu. Isus uvijek mora biti izvor naše nade. Nije važno kakve su okolnosti. Naše okolnosti ne treba da budu one koje određuju nivo naše radosti. Čak i ako nam je ovo najgori dan u životu, možemo imati siguran stav, ispunjen radošću i nadom ako naučimo da gledamo u ono što nam je ostalo, umjesto u ono što smo izgubili. Uvijek gledaj u ono što Bog radi, a ne u ono što ti misliš da ne radi.

Voljela bih da je neko ovo podijelio sa mnogom mnogo ranije. Mnogo godina sam bila očajna, frustrirana hrišćanka, a jedan od glavnih razloga za to je bio taj što sam uvijek razmišljala o onome što nemam. I ne samo da sam razmišljala o tome, nego sam se i žalila na to. Potrošila bih svo vrijeme molitve govoreći Bogu o svim stvarima koje nemam.” *Bože, nemam dovoljno novca. Nemam iste talente kao neki. Ni sam imala dobro djetinjstvo.*” I to bi išlo u nedogled. Gledala sam oko sebe i pravila dnevni inventar svega onoga što nisam imala.

A Gospod mi je počeo pokazivati da imam mnogo toga, samo da sam tražila na pogrešnim mjestima. Nema pobjede u fokusiranju na stvari koje si izgubio ili ih nemaš. Umjesto da ulažem energiju i trud u to da se žalim što sam nešto izgubila, Gospod je počeo da me uči da se fokusiram na ono što mi je ostalo. Ne moram imati novca da idem na skupo putovanje, ali bar imam novca da platim račune tog mjeseca. Možda nemam sposobnosti kao neko drugi, ali sam dobar govornik i sagovornik, i vremenom je Bog to počeo da upotrebljava da pomogne ljudima. Bila sam zlostavlјana kao dijete, ali me je Bog iscjeljivao. Moj suprug i djeca nisu savršeni, ali sam blagoslovljena porodicom. Moji otac i majka su me napustili, ali me je Bog usvojio (vidi Psalm 27:10).

Što sam se više počela fokusirati na stvari koje imam, nego na one koje sam izgubila, moj stav se sve više mijenjaо. Počela sam da uviđам Božije blagoslove i Njegovu naklonost u mom životu, i moja nada se uzdigla.

Isto ovo je istina i za tebe. Bez obzira kroz šta danas prolaziš, možeš otkriti novu radost u životu. Možda si izgubio nešto; možda postoje neke privilegije koje ti nemaš. Ali umjesto da se fokusiraš na ono što si izgubio, zašto ne pretražiš ono što ti je ostalo? Mogao bi biti iznenađen onim što ćeš tamo naći.

**Ali umjesto da se fokusiraš na ono što si izgubio, zašto ne pretražiš ono što ti je ostalo?**

## Tri novčića i Bog

Jednom sam pročitala da, kada je Majka Tereza započela svoj misijski rad u Indiji, uopšte nije imala novca. Sanjala je o tome da izgradi sirotište i da pomogne ljudima u Kalkutti, ali nije imala fondove. Kada su je pitali koliko ima novca, ona je odgovorila: „Tri novčića.“ Ljudi su sumnjali u njenu misiju, pitajući je: „Šta možeš uraditi sa tri novčića?“ A Majka Tereza bi odgovorila: „Imam tri novčića i Boga, šta bi mi više trebalo?“

Sviđa mi se ovaj stav. Majka Tereza nije bila zabrinuta zbog toga što ima samo tri novčića, jer imala je Boga! Pitam se kako bi se naši životi promijenili kada bismo počeli nabratati sve ono što nam je Bog dao. Možda ne izgleda mnogo u poređenju sa onim što neko drugi ima, pa ni sa onim za što se molimo, ali čak i to malo je sve što Bogu treba. Tri novčića su i više nego dovoljna u Božijim rukama.

nego dovoljna u Božijim rukama. Ako Bog može da nahrani mnoštvo od 5.000 ljudi (plus žena i djece) sa samo nekoliko vekni hljeba i nekoliko riba, samo pomisli šta sve On može uraditi sa ono malo što ti imaš. Možda misliš: „Ali ja nemam ništa, čak ni tri novčića“. Ipak se možeš ohrabriti jer je Bog stvorio čitav univerzum ni iz čega. Počeo je tako što je nad bezdanom izgovarao riječi. Bez obzira koliko malo imamo, svi to možemo uraditi.

Jesi li ikada bio u prodavnici gdje se radi popis robe? Nije li fantastično posmatrati čitavu ekipu zaposlenih kako dolaze i počinju prebrojavati ono što je u radnji. Izvlače svoje ručne spravice, obilježavaju svaki proizvod, zatim pedantno broje i prebrojavaju da bi im se sve poklapalo. Ono što me oduševljava je da ništa nije previđeno. Oni broje čak i najmanje stvari. Svaki paket žvakačih guma, svaku oštećenu konzervu, svaku potamnjelu bananu – generalni popis sve prebrojava.

**Mislim da bi bila sjajna ideja kada bismo mi radili popis naših sopstvenih života i prebrojavali svaki blagoslov koji nam je Bog dao.**

Mislim da bi bila sjajna ideja kada bismo mi radili popis naših sopstvenih života i prebrojavali svaki blagoslov koji nam je Bog dao. To bi ojačalo našu nadu i izgradilo našu vjeru. Umjesto što pokunjeni hodamo okolo govoreći šta još uvijek nemamo, možemo

hodati dignute glave zahvaljujući Bogu na svemu što nam je dao. A treba da nabrojimo svaku, pa i najmanju stvar. Možda izgleda mala, ali svejedno je nabroj i zahvali Mu se na tome. Stvari naviku da primjetiš sve ono što Bog radi za tebe, i što više meditiraš nad Njegovim blagoslovima, više ćeš obilovati nadom. Bog nam je dao Isusa, pa ako je to uradio, neće li nam dati i sve ostalo?

## Vrijeme za popis

Svačiji popis će drugačije izgledati. Nemamo svi iste darove, talente, snage ili primanja – i sigurno nemamo sve ovo u isto vrijeme – ali Bog nikada nije obećao da ćeš imati nešto što neko drugi ima ili da će ta osoba imati ono što ti imaš. Sjećam se kada sam bila u jednoj leproznoj zajednici tokom svoje posjete Indiji, i jedan čovjek koji je bolovao od lepre pozvao me je da vidim njegovu kuću. Činio se vrlo uzbudjenim, pa sam rado pošla sa njim da pogledam. Ispostavilo se da je ono što je on nazivao kućom bila rupa dugačka 3 i duboka dva metra, iskopana na padini jednog prljavog brda. Od namještaja je imala jednu ležaljku, nekoliko oštećenih šerpica i nekoliko posuda. Moram priznati da sam do srži bila osuđena kada sam shvatila koliko je on sretan sa tako malo toga i koliko sam ja često nesretna sa ovako mnogo toga.

S ovim na umu, evo spiska prijedloga za šta sve možemo zahvaljivati Bogu. Možda nemaš sve što je na ovom spisku (sada), ali možda ćeš razumjeti mnoge od njih. Bolesnik kojeg sam srela bio bi lud od sreće da ima bilo koju od ovih stvari.

- Krov nad glavom
- Prijatelja koji te pokriva na poslu
- Člana porodice koji te voli
- Auto koji može da vozi (da, čak i ako samo vozi)
- Pun stomak
- Hladnu i toplu tekuću vodu
- Smisao za humor
- Mjesečnu platu
- Udoban krevet
- San u srcu
- Mogućnosti obrazovanja za tvoju djecu
- Lokalnu crkvu koja te ohrabruje

- Zdravo tijelo
- Orman pun odjeće
- Bibliju za čitanje
- Nadu za budućnost

A ovo je samo nekoliko stvari koje su mi pale na pamet. Kladim se, da ako bi razmislio i molio se, mogao bi napraviti deset puta duži spisak od ovog.

Neke od ovih stvari koje sam spomenula možda su osnovne, ali ako razmisliš, postoje ljudi na ovom svijetu koji nemaju čak ni najosnovnije stvari koje ti imaš. Vodu, hranu, krov – ove stvari ne treba uzimati zdravo za gotovo. Treba da zahvaljujemo Bogu za ove osnovne potrebe i nikada ih ne uzeti zdravo za gotovo.

## Uvijek postoji nada

Popis Božije dobrote je važan jer, pošteno govoreći, lako je pogledati borbe u životu i obeshrabriti se. Ako samo gledamo na prepreke, lako ćemo izgubiti nadu. Pogledaćeš svoj bankovni račun i postati beznadežan. Nekada ćeš možda pogledati svoju djecu i poželjeti da odmahneš rukom i kažeš: „Nema nade.“ Pogledaćeš sebe i reći isto to! Vozićeš se na posao i misliti: „*Nema nade.*“ To je upravo ono što đavo želi da uradiš. On zna da, ako nas drži beznadežne, ne možemo se kretati odvažno u vjeri i promašićemo Božiji dobar plan za nas.

Odoli iskušenju da gledaš ono što si izgubio ili nemaš i izaberi da gledaš u sve ono što je Bog uradio, radi i radiće. Kada se ovako postaviš, nada će oživjeti, radost će porasti, vjera će ojačati, a ti ćeš početi da djeluješ. Sjeti se da kada živiš u vrtu nade, nešto uvijek cvjeta.

Umjesto da kažeš: „Nema nade,” zašto ne kažeš: „Uvijek ima nade!” Odluči da napraviš popis onoga što ti je Bog dao i izaberi da se nadaš još većem. Napravi spisak blagoslova koje imaš od Boga i bilo bi dobro da ih svaki dan pročitaš naglas. Što se više fokusiraš na ono što imaš, više će te oduševiti Božija dobrota u tvom životu.

**Umjesto da kažeš:  
„Nema nade,”  
zašto ne kažeš:  
„Uvijek ima nade!”**

Efescima 1:3 kaže:

Blagosloven Bog i Otac našeg Isusa Hrista, koji nas je na nebesima blagoslovio svakim duhovnim blagoslovom u Hristu.

Ovo bi ti trebalo dati nadu. Bez obzira sa čim se suočavaš danas, bićeš blagoslovljen sa svim što će ti ikada trebati. Ako ti treba snaga, ako ti treba vjera, ako ti treba nada, ako ti treba prijatelj, ako ti treba razumijevanje, ako ti treba mir ili radost ili pravednost, ili novac, ili zdravlje, ili iscjeljenje, ili pobjeda, Bog će ti sve obezbijediti. Filipljanima 4:19 kaže: „A moj Bog će, po bogatstvu svoje slave u Hristu Isusu, zadovoljiti svaku vašu potrebu.”

Kada sumnjaš da će se Bog zaista pobrinuti za ove stvari danas ili sutra, samo se osvrni na ono što je On već uradio. Osvrni se na svoj popis blagoslova i pusti da ti ojača vjeru za budućnost. To je ono što je David uradio. Kada su kralj Šaul i Davidova braća sumnjala da David može poraziti Golijata, David je samo zastao i uzeo spisak Božjih djela u svom životu. Rekao je: „Kako lava tako i medvjeda ubio je tvoj sluga; ovaj neobrezani Filistejin biće kao jedan od njih, zato što je sramotio vojske živog Boga!” (1. Samuelova 17:36). David je bio uvjeren da će Bog, zbog toga što je sve ovo za njega već uradio, uraditi i veće stvari u ovoj situaciji. Spisak blagoslova Davidu je dao nadu koja mu je potrebna da proživi svoju sudbinu.

## Bog voli da te blagosilja

Više nego išta, kada počneš praviti spisak Božije dobrote u svom životu – kada počneš brojati svoje blagoslove – to će ti ispuniti srce radošću. Primjetila sam da je nemoguće biti zahalan i obeshrabren u isto vrijeme. Ne funkcioniše tako. Ako ćeš svaki dan izdvojiti neko vrijeme da se fokusiraš na Božije blagoslove i Njegovu naklonost, nećeš moći u sebi spriječiti prelivanje radosti Gospodnje.

**Primjetila sam  
da je nemoguće  
biti zahalan  
i obeshrabren  
u isto vrijeme.**

Riječ Božija nam govori da je radost Gospodnja naša snaga (vidi Nehemija 8:10). Mnogi ljudi su letargični, umorni, i jedva se miču sa svoje stolice na poslu do kauča u kući, a to je zato što imaju be-

znađen stav. Neki ljudi su potpuno izmoreni kada dođu kući sa posla, a to nije zbog njihovih poslova – to je zato što imaju loš stav prema svojim radnim mjestima i ljudima koji tamo rade. Negativan stav utiče na svaku oblast naših života – čak i na naše zdravlje. Ali ako odlučimo da budemo sretni zbog onoga što nam je Bog dao i ako se fokusiramo na dobre stvari u životu, ne samo da ćemo biti sretniji, nego ćemo biti i zdraviji.

Svaki dan vodim dnevnik tokom vremena provedenog sa Gospodom. Zapisujem stihove koji me ohrabruju, neke od molitvi koje molim taj dan, stvari koje vjerujem da mi Bog stavlja na srce i posebne stvari koje Bog radi za mene. Imam ove dnevničke godinama unazad i s vremenom na vrijeme ih volim prelistati. Kada prolazim kroz stare dnevničke, zanimljivo je da me Bog nekoliko puta godišnje podsjeti da treba uporno da iščekujem nešto dobro. Mora da je to onda veoma bitno. Kada sam puna nade – kada očekujem da Bog uradi nešto veliko u mom životu – to mi gradi duh i ispunjava me radošću. Redovno uzimam vitamine, a mislim da

je nada „sretni vitamin“. Treba dnevno da uzimamo nadu u velikim dozama! Mislim da je zato jedan od mojih omiljenih stihova sljedeći:

Zato će Gospod čekati (očekivati, tražiti i čeznuti) da vam pokaže milost, i zato će se visoko podignuti da bi se sažalio nad vama; jer Gospod je Bog suda: „Blaženi (sretni, oni kojima se zavidi) su svi koji se pouzdaju u Njega ( u Njegovu pobjedu, Njegovu milost, Njegovu ljubav, Njegov mir, Njegovu radost i Njegovu nemjerljivu, nesalomljivu podršku)!“

Izajia 30:18

Bog zapravo „očekuje, traži i čezne“ da ti pokaže svoju dobrotu. Zato sretno možeš iščekivati dobro u svom životu. Ovo nije nešto na šta je Bog nevoljno pristao – ovo je nešto što On voli da radi. Isus je umro da bi ti mogao imati „život i da ga imaš u izobilju“ (Jovan 10:10). Zato nemoj ići kroz život sa lošim stavom. Odluči da imaš dobar stav, očekujući dobre stvari od Gospoda. Ne očekujemo ih zato što ih zaslužujemo, nego zato što je Bog dobar! Izaberि da slaviš Boga sa zahvalnim srcem za sve stvari koje ti je dao.

**Bog zapravo  
„očekuje, traži  
i čezne“ da ti  
pokaže svoju  
dobrotu.**

## Podigni nadu!

Dok završavaš ovo poglavlje, zapitaj se: „*Koliko imam nade?*“ Da li si svaki dan uzbuden i očekuješ da će Bog uslijiti neku tvoju molitvu, ispuniti san, pobrinuti se za neku potrebu i uraditi nešto divno u tvom životu? Ako nisi pun nade onoliko koliko bi želio da budeš, možeš to promijeniti. To nije komplikovan proces – sve počinje okretanjem prema onome što ti je ostalo, umjesto prema onome što si izgubio.

Uzmi popis blagoslova u svom životu. Mnoge stvari na tom spisku će biti velike stvari koje su očigledne, ali će mnoge stvari biti male. Posveti vrijeme gledajući na svaki dio tvog života i vidi male stvari kojima te je Bog blagoslovio. Kada tako uradiš, primjetićeš potpunu promjenu u načinu na koji vidiš svoj život. Tvoj brak, tvoja porodica, tvoja karijera, tvoje težnje – tvoj pogled na ove stvari se mijenja kada imaš zahvalno srce.

Zato se pokreni i podigni svoje nade još danas. Bog te je blagoslovio u prošlosti – imaš čitav spisak koji to dokazuje – a to je samo početak. On ima još mnogo toga za tebe. Samo razmisli da li tražiš na pravom mjestu.

## 8. POGLAVLJE

# Riječi nade

*Zašto si klonula moja dušo i zašto si nemirna u meni?*

*Gledaj na Boga! Jer ču ga još slaviti,  
koji je spasenje mog lica i moj Bog.*

*Psalam 43:5*

„Nada se smiješi na pragu godine koja dolazi, šapčući  
- ova će biti sretnija....“

— Alfred, Lord Tennyson

Na isti način na koji hrana koju jedemo na nas utiče fizički, tako i riječi koje izgovaramo utiču na nas duhovno, mentalno i emocionalno. Vjerujem da one takođe i fizički utiču na nas, jer što su naši razgovori ispunjeniji nadom i srećom, to se mi osjećamo energičnijima. Pozitivan i pun nade stav otpušta stres, koji je uzročnik mnogih bolesti i oboljenja.

Prije nekoliko godina, odlučila sam da se ozbiljnije postavim prema svom zdravlju. Nedostajalo mi je energije, lako bih se razboljela i stalno bi me mučili neki fizički problemi. Ranije sam probavala razne dijete i vježbe, ali posao bi mi se nagomilao svaki put kada bih morala pripaziti na sebe. Završila bih ponovo na svom radnom mjestu, mada sam znala da to nije dobro za mene. Vremenom, odlučila sam da stavim tačku na ovo. Moglo bi se reći da mi je bilo dosta toga da sam stalno umorna.

Jedna od prvih stvari koje sam shvatila dok sam proučavala pravilnu ishranu i program vježbi je da sve što jedemo utiče na stanje našeg tijela. Svi znamo da je pravilna ishrana veoma važna, ali mislim da ne shvatamo koliko izbor onoga što jedemo utiče na naša tijela. Ono što danas jedeš će odrediti ono kako se osjećaš, koliko postižeš i kakav ćeš imati stav. Dobar ili loš – salata ili krofne – hrana koja ulazi kroz tvoja usta utiče na tvoje tijelo. Ona takođe može da utiče i na tvoje emocije i tvoje misaone procese.

Na isti način – optimistične izjave ili negativna priznanja – riječi koje izgovaraš utiču na tvoj život na mnogo načina. Riječi imaju silu. Ono što kažeš mijenja stvari. Čim nešto kažeš, te riječi dopiru do tvojih ušiju i ulaze direktno u tvoju dušu. Ako su te riječi ispunjene životom, bićeš sretniji i energičniji. Međutim, ako težiš ka tome da govoriš šta nije u redu u tvom životu i da se žališ na okolnosti, ove riječi će imati negativan uticaj na tebe, iscrpiće ti energiju i učiniće te obeshrabrenim pa čak i depresivnim. Ne odlaži nadu jer „nada koja se odlaže čini srce bolesnim“ (vidi Izreke 13:12).

Riječi pune nade su veoma važne, posebno onda kada se suočavaš sa nekim poteškoćama. Jedna od najbitnijih stvari koje možeš uraditi kada si povrijeđen je da govoriš pozitivne, nadom ispunjene riječi. Ne kažem da same naše riječi mogu promijeniti situaciju – samo Bog to može – ali tvoje riječi imaju silu u duhovnom svijetu, i kada se slože sa Božijim, Njegov plan brzo može početi da se razvija u tvom životu. Tvoje riječi mogu promijeniti stav o nekoj negativnoj situaciji i pomoći ti da je brže savladaš. Izraelci su se žalili dok su bili u divljini, i ostali su тамо. Jedanaestodnevno putovanje se odužilo na 40 godina, a većina njih nikada nije ni stigla na željeno odredište.

Konstantno se žaliti na ono što mislimo da nije dobro u našim životima je veći problem nego što većina shvata. To je zlo u Gospodnjim ušima! Pitam se koliko ljudi prolazi kroz život žaleći se, i dok to rade nemaju onakav život kakav bi željeli imati. Vidiš, sama želja nije dovoljna da donese dobre stvari. Potrebna nam je živa nuda i jaka vjera u Boga. Takođe su nam potrebne snažne misli i riječi ispunjene nadom. Potrebno nam je djelovanje kada nas Bog pozove na to, i zahvalno srce dok čekamo.

**Takođe su nam potrebne snažne misli i riječi ispunjene nadom.**

Prvih 45 godina svog života sam provela uništavajući svoje dane i sabotirajući svoju budućnost zbog nedostatka znanja o sili sopstvenih riječi. U mnogim poljima mi je nedostajalo znanja, ali u ovom najviše. Ako imaš znanja o sili riječi, onda će ti ovo poglavje poslužiti samo kao podsjetnik koji će te držati na ispravnom putu, ali ako je ovo sve novo za tebe, onda će ti možda promijeniti život.

Možda ne shvataš da si ti onaj koji komanduje svojim riječima. Ti možeš odabratи šta ćeš reći i vjeruj mi kad ti kažem da je ono što govoriš veoma važno. Budi dobar upravitelj svojih riječi! Mudro ih biraj i vjeruj onome što Božija Riječ kaže, da od njih zavise i život i smrt.

Smrt i život u vlasti su jezika i oni koji to vole će jesti njegov rod.

Izreke 18:21

## Prestani da pričaš o svojim problemima

Da li si ikada primjetio da Isus nikada nije pričao o svojim problemima? Mogao je; Morao se boriti sa mnogo istih onih stvari sa kojima se ti i ja borimo. Isus je imao pretrpan raspored. Isus se susretao sa grubim i mrskim ljudima. Isus se suočavao sa teškim situacijama. Da ne spominjemo činjenicu da je znao da će strašno patiti i umrijeti na krstu za grijehu cijelog svijeta.

Ali kada čitaš Jevanđelja, nikada nećeš čuti da se Isus žali ili da mrmlja ili kritikuje nešto.

Očigledno je poznavao silu riječi. Kada se približilo vrijeme njegove patnje i smrti, rekao je svojim učenicima da od tada neće mnogo govoriti sa njima (vidi Jovan 14:30). Zašto bi On to rekao? Zato što je znao silu riječi i znao je koliko je primamljivo reći loše stvari kada prolazimo kroz teške i bolne situacije. Znao je da Njegov Otac ima plan spasenja čovječanstva i da taj plan zavisi od Njega. Zato je bio odlučan da uradi sve što je potrebno da bude složan sa Gospodom, pa i kada je u pitanju izgovaranje riječi koje Bog može upotrijebiti, a ne onih koje đavo može upotrijebiti.

Neću više mnogo s vama govoriti, jer dolazi vladar (zli duh, princ) svijeta. On mi ne može ništa (on nema ništa sa mnom, ništa u meni ne pripada njemu, i on nema moć nada mnom), ali svijet treba da sazna (da bude uvjeren) da ja volim Oca i da činim onako kako mi je Otac zapovjedio (ja djelujem potpuno prema Njegovim uputstvima). Ustanite, hajdemo odavde.

Jovan 14:30, 31

Naravno, Isus je govorio o mnogim stvarima, uključujući grijeh. Isus je znao ukoriti fariseje i ispraviti svoje učenike. Dok čitaš Jevanđelja, otkrivaš da je Isus govorio o mnogim stvarima, ali ne i o svojim problemima. Luka 4:22 kaže da su

se ljudi „divili umilnim riječima koje su izlazile iz njegovih usta.“ Isus je bio u misiji i nije bio smeten fokusirajući se na svakodnevne životne probleme. Rekao je da su Njegove riječi duh i život (vidi Jovan 6:63).

Da li su tvoje riječi duh i život ili tijelo i smrt? Dobra vijest je da, ako ima potrebe, možeš to da promjeniš upravo sada. Priznajem da je usta nemoguće kontrolisati bez mnogo pomoći od Boga. Međutim, ako doneсemo ispravnu odluku i uskladimo se sa Božijom voljom u ovom polju, On će nam sigurno pomoći da unesemo pozitivne promjene.

## Prođi tjesnim putem

Isus nas upućuje na uzak put koji vodi u život i na to da izbjegavamo širok put koji vodi u propast (vidi Matej 7:13-14). Očigledno je da je uskim putem teže hodati. Uvijek ponavljam da na uskom putu nema mjesta našim tjelesnim težnjama. Možemo ići kroz život govoreći ono što nam se govori, ne obraćajući pažnju na silu naših riječi. Ali, to nas vodi na širok put za koji je Isus rekao da vodi u propast, a sumnjam da bilo ko od nas to želi.

Lako je fokusirati se na stvari koje ne idu kako treba. Čini se da se mnogo naših razgovora fokusira na ono što nije dobro umjesto na ono što jeste. Takvi razgovori nisu puni nade nego su bez nade! *“Djeca su bolesna. Saobraćaj je grozan. Bole me stopala. Ekonomski situacija je nikakva. Možeš li da vjeruješ šta je rekla za mene? Ne mogu to da priuštim.”* Što više pričamo o onome što nije dobro, više mu sile pripisujemo u našim životima.

Da li ti je ikada palo na pamet da činiš problem još gorim tako što pretjerano pričaš o njemu? Jesi li ikada uzeo u obzir da ne napreduješ u životu zato što se žališ? Ja svakako nisam

razmišljala o ovim stvarima dok me Sveti Duh nije suočio sa tim. Drago mi je što jeste, jer mi ne možemo promijeniti nijednu oblast svog života ako nam nedostaje znanja.

**Kada prolaziš kroz iskušenje, najbolja stvar koju možeš uraditi je da prestaneš pričati o tome koliko je velik tvoj problem, i da počneš pričati o tome koliko je Bog velik.**

Kada prolaziš kroz iskušenje, najbolja stvar koju možeš uraditi je da prestaneš pričati o tome koliko je velik tvoj problem, i da počneš pričati o tome koliko je Bog velik.

Svakoga dana posveti neko vrijeme meditiranju nad Božjom Riječju i izgovaraj Njegova obećanja nad svojom situacijom. Sila se preliva kada se fokusiraš na ono što se može dogoditi kada je Bog uz tebe, umjesto na ono što se događa sada.

## Namjerno uradi ispravnu stvar

Nećeš uvijek biti pozitivan i nećeš uvijek željeti da izgovaraš pozitivne riječi. Biće dana kada ćeš se već od buđenja osjećati potpuno grozno. Ovo su dani kada je zaista lako biti ogorčen, žaliti se i biti pesimističan. Ali ne moraš živjeti prema svojim osjećanjima. Osjećanja su promjenljiva – ona se brzo mijenjaju u zavisnosti od mnogo faktora.

Jedna od glavnih stvari koje želim da razjasnim u ovoj knjizi je da mi treba namjerno da se nadamo. Ne možemo samo sjediti želeći da osjetimo nadu, ili čak samo da se molimo da imamo nadu. Mi svaki dan biramo da budemo puni nade. Jedna od najboljih stvari koju nam slobodna volja pruža je što možemo izabrati svoje stavove, misli, riječi i djela.

Ja sam sigurna, da ako si i ti kao ja, prva stvar na koju pomisliš kada uradiš nešto loše je: “*Ne mogu protiv sebe*,” i onda je to praćeno nekom vrstom obrazloženja zašto nešto nisi uradio kako treba.

To možda ovako izgleda: “*Volio bih da se nadam, ali jednostavno ništa veselo mi se sada ne dešava u životu. Ne može se od mene trenutno očekivati da imam pozitivnu perspektivu kada vidim problem svuda oko sebe. Da imam neke privilegije, koje mnogi imaju, onda bi moj stav bio drugačiji.*” Ali moglo bi izgledati i drugačije: “*Moje okolnosti trenutno nisu baš najbolje, ali biram da budem pun nade. Očekujem da će se danas nešto divno desiti u mom životu! Da, nešto divno će se desiti i meni i kroz mene!*”

Ako ovo radiš namjerno svaki dan čak i kada ti se ne radi, to će potpuno promijeniti tvoje stanje. Ubrzo će se tvoja osjećanja pokloniti pred tvojim odlukama. Bez obzira na to kakve su okolnosti, dan sa Isusom je bolji od dana bez Isusa. Uvijek možemo biti puni nade jer nas On voli, On je uz nas, On bilo šta može promijeniti! On je Bog pravde, i On loše stvari mijenja u dobre!

Danima kada se osjećaš obeshrabreno, odluči da nećeš dopustiti da ova osjećanja kontrolišu tvoj život. Umjesto da imaš negativnu perspektivu i da izgovaraš negativne riječi, izgovaraj ono što je u skladu sa Božjom Rječju!

- Znam da me Bog voli (vidi Efescima 3:19)
- Vjerujem da će vidjeti Božiju dobrotu u svom životu (vidi Psalam 27:13)
- Ja sam više nego pobjednik kroz Hrista koji me voli (vidi Rimljanima 8:37)

**Ne čekaj da te neko  
drugi razveseli;  
pokreni se  
u Gospodu.**

Propovijedam već skoro 40 godina i još uvijek meditiram nad Božijom Rječju i izgovaram je skoro svaki dan. Bez obzira na to kako se osjećam, podsjećam sebe ko sam u Hristu Isusu – ti možeš da radiš to isto. Ne čekaj da te neko drugi razveseli; pokreni se u Gospodu.

Volim da razmišljam o ovome kao o ličnom bodrenju. Ako si ikada u srednjoj ili osnovnoj školi prisustvovao bodrenju nekog sportskog tima pred utakmicu, onda znaš o čemu govorim. Bodrjenje je kada navijačice bodre tim, bend svira, a studenti se spremaju za veliku utakmicu. To je veselje zbog očekivane pobjede. Iako tim još nije pobijedio, veselje je već počelo.

Sigurno imaš čemu da se veseliš u svom životu. Sa kakvim god protivljenjima da se suočavaš, Bog je na tvojoj strani, a On je nepobjediv. Zato kreni u bodrjenje – uzbudi se zbog pobjede koju ti Bog donosi u život.

## Nada pronađena u slavljenju

2. Dnevnika, poglavljje 20 govorio o vojsci koja je išla protiv kralja Jozafata i Judine armije. Ljudi su bili uplašeni jer su znali da ih je mnogo manje (vidi 2. Dnevnika 20:15). Da li si se ikada osjećao tako ili se sada tako osjećaš? Misliš li da su tvoji problemi jednostavno preveliki da bi ih ikada mogao pobijediti?

Jozafata su obavijestili da bitka nije njegova nego Božja. Naoružani sa ovom Rječju Božijom, Jozafat je pripremio svoju vojsku za bitku. Ali uradio je nešto neobično za svoju bitku. Umjesto da je postrojio svoje najluće vojnike na čelo

kao što su svi očekivali, Jozafat je predao svoj položaj pjevačima slavljenja. 2. Dnevnika 20:21 kaže:

...i postavio pjevače za Gospoda koji će ići pred naoružanim, govoreći: „Hvalite Gospoda jer njegova ljubav traje zauvijek.“

Jozafat je bitku započeo slavljenjem. Kakva slika – cijela vojska maršira u bitku pod barjacima slave.

Biblija kaže u stihu 22 da kad su „počeli sa klicanjem i hvalospjevom“, Bog je zbunio suparničku vojsku. Umjesto da se bore protiv Judeja, ovi ljudi su se, zbunjeni, okrenuli jedni protiv drugih. Dok je Jozafat sa vojskom stigao na lice mjesta, neprijatelj je već bio uništen. Bog je osvojio bitku, kao što je i obećao.

Vjerujem da se đavo zbuni kada slavimo Boga usred nečega čega bismo se trebali plašiti ili na šta bismo se trebali žaliti. Slavljenje i zahvaljivanje ga zapravo pobjeđuju.

Slavljenje je silno oružje. Ono objavljuje tvoje povjerenje u Boga i da se potpuno oslanjaš na Njega. Ne čekaj da se okolnosti promijene prije nego što izgovoriš svoje riječi nade. Dopusti mi da pojednostavim: bez obzira na to šta se trenutno dešava u tvom životu, ne dozvoli nijednoj bolesti, problemu, gubitku ili strahu od neke predstojeće nevolje da te spriječi da slaviš Boga. Pažljivo biraj svoje riječi, otvor svoja usta, i odvažno objavi da je Bog vjeran i da očekuješ da se nešto dobro dogodi u tvom životu.

Rimljanima 4:20 kaže da se Avram „osnažio u vjeri i dao slavu Bogu“. Ista se stvar događa u tvom životu kada izgovaš riječi slave – osnažuješ se u vjeri da bi prevazišao svaku prepreku s kojom se suočavaš. Stavi slavljenje na prve linije fronta u svom životu!

## Reci ovo, ne ono

Kada su ljudi puni nade, očekuju da će im se nešto dobro dogoditi, a to se vidi po onome što govore. Oni vjeruju da će se njihove okolnosti poboljšati, uzbuđeni su jer je promjena blizu, očekuju proboj – o tome vole da govore. Pozitivni ljudi su optimistični i vedri. Zabavno je biti s njima. Nada je zaražna! To je jedan od najboljih darova koji nekome možemo pokloniti. Zašto ne bi video sebe kao dostavljača nade? To je nešto što je današnjem društву očajnički potrebno. Posebno suosjećam sa tinejdžerima i mladim ljudima danas. Njima je potrebno svo moguće ohrabrenje!

Svijet, naše škole i naši univerziteti često prenose poruku da je Bog mit ili, u najboljem slučaju, neko o kome nema potrebe razgovarati niti razmišljati. Čini se da svijet želi da gurne Boga u čošak, kao da ga se treba sramiti. Kao tinejdžer, sjećam se da se o Bogu otvoreno razgovaralo u svim sektorima društva. On je bio dio svakodnevnih razgovora. Viđali smo Deset Zapovijesti po školskim zidovima, a javna molitva je bila uobičajena pojava. Moji roditelji nisu bili po-božni, ali sam ipak slušala o Bogu u školi ili od komšija. Naši mladi danas nemaju ovu prednost i oni lako mogu postati beznadežni.

Mnogi roditelji su zauzeti pokušavajući da sastave kraj s krajem i imaju malo ili nimalo vremena za svoju djecu. Zbog stresa u porodici roditelji često kritikuju svoju djecu zbog oblaženja ili frizure, izbora prijatelja, ocjena, nedovršenog posla i mnogih drugih stvari. Svakako vjerujem da roditelji treba da koriguju svoju djecu, ali kada bi djeca imala više nade, ne bi im trebalo toliko korigovanja! Ako te ne razumiju, svaki dan izlaze iz kuće beznadežni prije nego što se i suoče sa ostatkom svijeta, koji će sigurno samo pojačati njihovo beznadežno stanje. Svakome, a pogotovo mladima govorи ohrabrujuće riječi, ispunjene nadom.

Odluči da budeš onaj koji govori o nadi. Odluči da budeš pozitivan uticaj u svijetu. Budi osoba s kojom drugi ljudi žele da provode vrijeme. Živi svoj život sa vjerom i nadom da će se danas desiti nešto dobro.

**Odluči da budeš  
onaj koji govori  
o nadi.**

## Podigni nadu!

Ono što danas izgovoriš umnogome određuje život koji ćeš živjeti sutra. Ne dozvoli pritisku svijeta i lažima neprijatelja da te obeshrabre, da bi video samo negativne strane u životu. Okreni se Božijoj riječi, stani na Njegova obećanja i izgovaraj život za svoju situaciju.

Svaka riječ koju izgovoriš utiče na tebe, zato izaberi da govoriš zdrave riječi, one koje nude život. Neka te riječi popločaju stazu dok koračaš kroz bilo koju tešku situaciju. Umjesto da govoriš o svojim problemima, počni govoriti o Božijim obećanjima, i pusti da ove objave nade razbuktaju tvoju vjeru.

Ustani i podigni svoje nade danas. Čak i ako si slab, čak i ako se to čini nemogućim, čak i ako te bitka čini nesigurnim i uplašenim, stavi slavljenje na prve linije fronta. Kada tako uradiš, shvatićeš da se Gospod bori za tebe – i nećeš izgubiti.



## 9. POGLAVLJE

# Nastavi dalje

*I ne samo to, nego se radujemo i u nevoljama,  
jer znamo da nevolje donose strpljivost,  
strpljivost prekaljenost, a prekaljenost nadu.*

*Rimljanima 5:3,4*

„Najveća slava u životu ne leži u tome da nikada ne padneš nego da ustaneš svaki put kada padneš.“

— Nelson Mandela

Različite životinje imaju različite instinkte kada su u opasnosti ili kada se suočavaju sa strahom. Medvjedi napadaju, vjeverice se penju na drvo, antilope trče, a krtice kopaju. Svaki od ovih instinkta je aktivan. Ali postoji jedna životinja čija reakcija je dosta drugačija: oposum. To je životinja koja ne trči, ne penje se, ne bježi, niti kopa. Oposum se samo ukoči. Umjesto da postane aktivan, on postaje pasivan. Pravi se da je mrtav – i nada se da će postići nešto ako ostane miran.

Primjetila sam da mnogo puta kada su ljudi povrijeđeni ili uplašeni, oni postaju duhovni oposumi. Umjesto da postanu aktivni, oni postaju pasivni. Kada dođu teška vremena, kada se suočavaju sa strahom ili razočaranjem, oni se ukoče. Jednostavno prestanu da se miču. Da li ti ovo zvuči poznato? Jesi li se ikada našao u ustaljenom kalupu zbog neočekivanih iskušenja ili razočaranja koje te slama? Jesi li ikada bio u situaciji da ne znaš šta da radiš, pa si odlučio da ne radiš ništa?

Ako si se ikada borio sa povredom zbog koje si se ukočio na svom putu, ne pokušavam da umanjim tvoju bol. Vjeruj mi; prošla sam kroz mnoštvo iskušenja koja su toliko jako boljela da sam mislila da ne mogu dalje. Razumijem kroz šta prolaziš, jer su me i samu teškoće paralisale. Ali želim da te ohrabrim u tvom bolu da najbolja stvar koju možeš da uradiš je da nastaviš dalje.

Možda još uvijek nemaš sve odgovore. Možda si još uvijek šokiran zbog okolnosti. Možda čak osjećaš da se svijet oko tebe pretvara u kavez. Ali u jeku ovih nedaća, ako samo nastaviš dalje, to će ti pomoći da ne budeš beznadežan. Vjerovalno nećeš odmah vidjeti svjetlo na kraju tunela, ali ako prebacis̄ brige na Gospoda i vjeruješ da je On s tobom u tvojim nedaćama, osjetićeš iscjeljenje dok hodaš sa Njim. Vremenom, ne samo da ćeš naći svjetlo na kraju tunela, nego će svjetlo otjerati svaki mrak iz tvog života.

Razumijem da, u zavisnosti od ozbiljnosti situacije u kojoj si se našao, biće dana kada ništa nećeš željeti da radiš. Sa teškim gubitkom prirodno je da dolazi i period tuge koji se sastoji iz različitih faza. Ali dok ideš kroz proces iscjeljenja, znaj da konačan odgovor nije da se izoluješ i da provedeš život nepomičan zbog bola. Bog želi da nastaviš da hodaš u vjeri, vjerujući da će te On provesti kroz tu povredu do nečeg boljeg.

Gospod utvrđuje korake čovjeka, i uživa u njegovom putu; ako i padne, neće ostati tako, jer Gospod podupire njegovu ruku.

Psalam 37:23,24

Privilegija koju imamo kada vjerujemo Bogu je absolutno predivna. Zbog nje imamo nadu kada se čini da ne postoji nijedan razlog za to. Kada sve izgleda izgubljeno, možeš vjerovati Bogu da će usmjeriti tvoje korake.

Skoro sam se čula sa prijateljicom koja je prošla kroz strašnu nedaću sa kancerom. Ona je sada pri kraju terapije i spremna je da ponovo nastavi svakodnevni život. Rekla je: „Teško mi je da znam kako da idem naprijed, jer moj život više nikada neće biti onakav kakav je bio.“ Vjerovatno se možeš poistovijetiti sa ovim. Možda ti je umrla voljena osoba i ne možeš zamisliti život bez nje. Možda si izgubio dugogodišnji posao na kojem si mislio da ćeš zaraditi penziju. Šta sada? Budi siguran da čak i ako ti ne znaš, Bog zna. On će voditi svaki tvoj korak.

## Sila neodustajanja

Sjećam se kada sam primila potresne vijesti baš kada sam trebala započeti trodnevnu konferenciju. Bilo je teško nastaviti, ali znala sam da moram. Osjetila sam da mi Duh Sveti govori: „Samo nastavi da koračaš, korak po korak. Nastavi dalje!“

**Nastavi dalje!**

To nije odnijelo sav bol i razočaranje koje sam osjećala ali me je sačuvalo da ne potonem u jamu očaja. U roku od nekoliko sedmica, situacija se riješila. Jedan od simptoma duhovne zrelosti je imati disciplinu za obavljanje svojih obaveza, čak i kada ideš kroz veoma teška vremena. Bila sam povrijeđena, ali trebalo je da nastavim sa službom drugima koji su bili povrijeđeni i, s obrizom da jesam, Bog me je iscjelio i riješio moj problem.

Iako je teško sjetiti se ovoga kada smo povrijeđeni, stvari ipak prolaze i imaju svoj kraj. Proljeće uvijek dolazi poslije zime. Poslije oluje sunce opet sija. Juče je cijeli dan bilo oblačno a onda je počela grmljavina, pa jaka kiša, ali danas je nebo plavo i sija sunce. Mislim da, po prirodnim vremenskim prilikama i smjenama sezona, možemo vidjeti da su

dobre stvari uvijek nadmoćne u odnosu na one loše i da ih uvijek nadvladaju. Ako je sada u tvom životu oblačno i olujno, raduj se suncu koje će vjerovatno sijati već sutra ili prekosutra. Oluja neće trajati zauvijek!

**Oluja neće  
trajati zauvijek!**

Biblija nam daje primjer bolesne žene (one koja je krvarila) koja se morala probiti kroz mnoštvo ljudi da bi stigla do Isusa (vidi Marko 5:25 – 34; Luka 8:43 – 48). Ova žena je bila bolesna 12 godina i sve što je imala potrošila je na doktore koji joj nisu mogli pomoći. Uprkos tome nije htjela da odustane i pasivno da čeka da njena patnja sama prođe. Dozvolila je nadi da je podstakne da nastavi dalje kroz bilo kakvu poteškoću. Ništa je nije moglo spriječiti da dođe do Isusa – ni mnoštvo ljudi, ni bolest, ni što je dugo čekala, ni sumnje, ni bol. Ponavljala je samoj себi: „*Ako samo Njegov ogrtač dotaknem, ozdraviću*“ (vidi Matej 9:21). Sa nadom i vjerom u srcu, ona je nastavila dalje.

Ti možda danas imaš neko svoje mnoštvo kroz koje moraš da se probiješ. Možda je to mnoštvo negativnih misli. Možda je to mnoštvo bola i povreda iz prošlosti. Možda je to mnoštvo neodobravanja kod ljudi oko tebe. Možda je to mnoštvo finansijskih neprilika. Možda je to mnoštvo bola u tvom tijelu. Ali ako izguraš kroz ove stvari i ne dozvoliš razočaranju da te drži obeshrabrenim i očajnim, doći ćeš do proboga.

Filipljanima 3:13,14 kaže:

Ja, braćo, ne smatram da sam to već dohvatio. Ali jedno činim (to je jedino za čim težim): zaboravljujući ono što je za mnom, a pružajući se ka onom što je pred mnom, hitam ka cilju, da dobijem nagradu radi koje me je Bog u Hristu Isusu pozvao na nebo.  
(naglašen dodatak)

Volim ovaj odjeljak iz Svetog Pisma. Pavle je rekao da će zaboraviti ono što je prošlo – greške i bol iz prošlosti – i da će nastaviti prema svojoj sudbini. Ti možeš da uradiš isto. Možeš izgurati kroz sve ono što pokušava da te uspori. Danas možeš odbiti da imaš stav poraženosti. Danas možeš odbiti da se praviš mrtav. Možeš izabrati da nastaviš dalje – možeš izabrati da izguraš.

## Bog je u pokretu

Moguće je da čitaš ovo i misliš: “*Joyce, ne znam da li mogu dalje. Prolazim kroz nešto zaista teško, i mislim da ne mogu ni korak dalje.*” Ako se ovo danas odnosi na tebe, insistiram da se ne predaješ tim osjećajima. Ako ćemo pratiti Boga, treba da nastavimo da se krećemo u vjeri. Dok proučavam Riječ Božiju, ne mogu da ne primjetim da se Bog uvijek kreće. Ne samo to, nego On uvijek poziva svoje ljude da se kreću...čak i u najtežim okolnostima.

Kada su Izraelci napustili Egipat, i kada ih je progonila egipatska vojska satjerujući ih uz Crveno More... *Bog im je rekao da nastave da se kreću!*

Nakon 40 godina provedenih u pustinji, kada su djeca Izraela došla na rijeku Jordan, ne znajući da li da pređu u Kanan... *Bog im je rekao da nastave da se kreću!*

Kada je izraelska vojska došla do utvrđenog Jerihona i kada nisu znali kako će osvojiti bitku, rečeno im je da marširaju kroz grad. Drugim riječima... *Bog im je rekao da nastave da se kreću!*

Kada je Božiji narod ušao u Kanan, nalazeći zemlju naseljenu divovima, Bog ih je uputio da osvoje zemlju... *Bog im je rekao da nastave da se kreću!*

U svakoj od ovih situacija ljudi su bili u iskušenju da se „prave mrtvi“. Zbog poteškoća s kojima su se suočavali željeli su da se sakriju i čekaju, a ne da ustanu i da nastave dalje. Ali svaki put ih je Bog usmjeravao da nastave dalje i da vjeruju da će ih On izvesti iz nevolje u pobjedu. Da su ostali ukočeni od straha i neizvjesnosti, nikada ne bi iskusili obilje koje je Bog imao za njih. Iako im je tada bilo teško da to urade, izabrali su da ustanu i nastave dalje. Na kraju, to se više nego isplatilo.

Biblijski primjeri nisu samo u Starom Zavjetu. Dok čitaš odjeljike Jevanđelja o Isusovom životu, vidiš da je On bio u stalnom pokretu. Nije se ukočio kao duhovni oposum svaki put kada se suočio sa teškoćama. Nastavio je da ide iz jednog grada u drugi, od jedne osobe do druge, odlučan da ispuni ono zbog čega je bio na ovom svijetu. Čak i kada Ga ljudi nisu prihvatali, čak i kada su fariseji pokušali da ga uhvate u zamku, čak i kada se narod okrenuo protiv Njega, Isus je nastavio dalje.

Vjerujem da je jedan od razloga što je Bog uvijek držao svoju djecu u pokretu – protiv neprijateljske vojske, preko rijeka, u Obećanu zemlju – taj što je u pokretu sadržana nada. Ako ne hodaš, nemaš nadu da ćeš negdje stići.

Bez pokreta naprijed, nema nade za promjenu!

## Koraci poslušnosti

Jedan od načina na koji možeš da se krećeš je da budeš poslušan Bogu – jednostavno uradi ono za čim te On vodi. Koraci na koje te On navodi mogu biti mali ili veliki, mogu čak biti i neočekivani, ali jedino ako pratimo Boga stići ćemo na pravo odredište.

I dalje razmišljam o Izraelcima i o tome kako ih je oblak Božije prisutnosti vodio kroz pustoš. Ovaj oblak je prekrio kovčeg, a Biblija kaže da kada se oblak pomjerao, Izraelci su putovali, a kada je oblak stao, i oni su stali. Nikada nisu znali kada će se pomjeriti, ali morali su biti spremni da se kreću kada se Bog kretao (Brojevi 9:16 – 23). Da li si spreman za to? Sigurna sam da im se nije kretalo svaki put kada ih je Bog pozvao, ali ako su htjeli da prođu kroz pustoš, morali su da vjeruju Božijem vođstvu.

Moramo živjeti spremni, kao vojnici koji su u stanju pripravnosti. Kada su u tom stanju, oni znaju da svakog momenta mogu biti pozvani po dužnosti. Kada su doktori dežurni, svakog momenta moraju biti spremni da idu i pobrinu se za pacijenta. Nije važno koji su im planovi ili šta u tom trenutku rade. Kada stigne poziv, oni idu.

Na jednoj od mojih konferencija, tokom slavljenja sam gledala svoju Bibliju i od jednom mi je došlo na srce da treba da je dam jednoj ženi koja je nekoliko minuta prije toga podijelila svoje svjedočanstvo. Snažno sam osjetila da moram to uraditi čim završim sa propovijedi. Sada ti moram reći: Uopšte to nisam očekivala i zaista sam voljela tu Bibliju; U njoj sam imala mnogo bilješki. U stvari, ta Biblija je sadržala bilješke o 7 najvažnijih stvari koje sam naučila u životu. Ali sam snažno osjećala da me je Bog upućivao na to da joj je dam. Nisam znala zašto me je Bog vodio u tom pravcu. Možda je to trebalo zaista da ohrabri tu ženu ili je Bog samo htio

da vidi hoću li biti poslušna. Ali koji god da je razlog, morala sam da izaberem: kreći se u poslušnosti ili budi neposlušna. Tada sam donijela ispravnu odluku, ali bilo je drugih situacija kada nisam, i uvijek bih poslije žalila zbog toga.

Jedini način da živimo bez žaljenja je taj da odmah uradimo ispravnu stvar!

Šta je ono što ti je Bog stavio na srce da uradiš? Da li te je zamolio da oprostiš nekome ko te je povrijedio? Da blagosloviš nekoga ko se muči? Da se riješiš neke štetne navike? Ostaviš iza sebe neki disfunkcionalan odnos? Ohrabriš prijatelja? Suočiš se sa problemom? Šta god da te Bog vodi da uradiš, ne okljevaj više ni trenutka. Kreći se u poslušnosti i gledaj kako će Bog blagosloviti svaki tvoj korak. Duboko vjerujem da beznadežnost dolazi sa neaktivnošću, ali naša nuda cvjeta kada se krećemo u korak s Bogom.

Skoro sam čula da, fizički govoreći, što se više krećeš, to više možeš da se krećeš, a što se manje krećeš, to manje možeš da se krećeš. Kada se ljudi penzionišu, pa onda samo odmaraju i ništa ne rade, njihovo zdravlje obično počne da slabi i u mogućnosti su da urade sve manje i manje. Međutim, izgleda da godine ne igraju ulogu kod onih ljudi koji ostaju aktivni i odbijaju da odustanu od života. Isto tako, vjerujem da što se spremnije krećemo uz Boga bez odlaganja, lakše nam je. Ako si već dugo ukočen od straha, možda će ti trebati neki dodatni napor da se ponovo pokreneš, ali vrijediće.

Ako osjećaš da treba da se krećeš u nekom pravcu, ali nisi siguran šta ti Bog govori da uradiš i osjećaš da si se zaglavio, postaviću ti ova dva pitanja: (1) Šta je posljednja stvar za koju osjećaš da ti je Bog rekao da uradiš? (2) Jesi li uradio to? Nekada Bog čeka da poslušamo Njegovo poslednje upuštstvo, da bi nam dao sljedeće. Sa Bogom, ne možeš preskakati korake – uvijek treba da ideš jedan po jedan.

Možda ti je Gospod stavio na srce da...

- Se vratiš u školu
- Promjeniš način na koji pričaš sa suprugom
- Imaš radostan stav
- Se bolje pobrineš za sebe
- Provedeš više vremena proučavajući Riječ Božiju
- Kreneš u biblijsku školu
- Pokloniš dar nekome ko je u potrebi
- Više ohrabriš svoju djecu
- Volontiraš u svojoj zajednici
- Služiš u svojoj crkvi
- Podijeliš svoje svjedočanstvo sa prijateljem.

**Nekada Bog čeka da poslušamo Njegovo poslednje upuštvstvo, da bi nam dao sljedeće.**

Ne možemo preskakati korake samo zato što nam se ne sviđa onaj na koji nas Bog sada poziva. Šta bi se desilo sa kolačem ako stavimo sve sastojke osim mlijeka? Izostavili bismo samo jedan korak, ali to bi bilo dovoljno da se uništi čitav kolač. Svi drugi sastojci bi bili uništeni samo zato što smo odlučili da preskočimo jedan korak u procesu pravljenja kolača.

Mnogo godina Bog mi je govorio da treba da imam ponizniji stav prema svom suprugu, ali nisam bila spremna da napravim taj korak. Stalno sam govorila sebi da jednostavno ne mogu to da uradim, jer su me u prošlosti zlostavljali muškarci koji su pokušavali da me kontrolišu. Ali, u stvari je to bio samo izgovor za neposlušnost. Zapela sam i ništa se nije dešavalo ni u mom životu ni u službi jer sam izostavila jedan korak. Kada sam konačno zakoračila i pratila oblak Božije prisutnosti, opet su se počele događati dobre stvari.

## Desni zaokret, lijevi zaokret

1987. godine The Los Angeles Times je izdao priču o pedesetrogodišnjem skijašu po imenu Ed Kenan. Kenan je bio biznismen koji je volio da skija i trenirao je za takmičenje u vele-slalomu tokom predstojećih Zimskih olimpijskih igara. Ali nešto je bilo neobično u vezi sa Edom Kenanom: Bio je slijep.

Sedam godina prije toga, Kenan je izgubio vid, na jedno, pa na drugo oko. Ni dvije operacije nisu mogle da zaustave odvojene mrežnjače da ga liše vida, a uzrok je bio dijabetes. Boreći se sa neopisivom nedaćom, Kenan je morao odlučiti: Mogao je sjediti u mraku i sažaljevati se, bijesan što mu je život podijelio loše karte, ili je mogao da nastavi da se kreće. Kenan je odlučio – šest mjeseci nakon što je oslijepio, skijao je niz padinu u Vailu u Koloradu. „Natjerao sam se da se oporavim“, rekao je. „Shvatio sam da ako mogu skijati niz planinu, onda mogu sve što poželim.“

1983. godine Kenan je osvojio zlatnu medalju u vele-slalomu na takmičenju nazvanom Američko Udruženje Slijepih Sportista Alpi, održanom u Alti, Juta. Tokom narednih nekoliko godina, na tu medalju je on dodao još nekoliko zlatnih i srebrnih medalja osvojenih na raznim takmičenjima. Čak ni sljepoča nije mogla spriječiti Kenana da živi svoj život punim plućima.

Kada su ga pitali kako je moguće skijati niz padine planina i manevrirati kroz razne kapije u vele-slalomu, Ed je objasnio da je imao vodiča koji vidi i koji bi skijao ispred njega. Vodič bi ga glasno upućivao: „Idemo, idemo, idemo“ kada je trebalo ići brže, a onda bi naglasio: „Desnoooo“, „Lijevoooo“, kada se približavao kapijama. Sve što je Kenan trebalo da radi je da nastavi dalje i da vjeruje uputstvima svog vodiča. Kada je tako radio, bez greške bi se spustio niz stazu i sigurno došao do cilja.

Tvoje nevolje s kojima se boriš su vjerovatno drugačije od Kenanovih, ali možda se na neki način možeš poistovijetiti sa njim. Možda znaš šta znači neočekivano izgubiti nekoga. Možda razumiješ kako je boriti se sa teškim razočaranjem. Možda se suočavaš sa zastrašujućom dijagnozom. Možda je iznenada otišao neko za koga si mislio da će uvijek biti tu. A možda se pitaš: „*Da li da odustanem sada ili da nađem način da nastavim dalje?*“

Sa kakvom god tamom da se suočavaš, dozvoli da te podsjetim da nisi sam. Bog vidi kroz šta prolaziš, i On je upravo pored tebe. Izajia 30:21 kaže: „I ako skrenete na desno ili na lijevo, tada će čuti tvoje uho riječ iza sebe: „Ovo je put, njim hodite!“ To znači da je Bog obećao da će biti tvoj vodič. Kada ne možeš da vidiš gdje ideš, ne boj se. Ne pravi se mrtav!

Nekada kretanje jednostavno znači da ustaneš iz kreverte i spremаш kuću, ili ideš na posao; nekada to znači pratiti neku određenu smjernicu od Boga. U oba slučaja, bilo to jednostavno ili izazovno, Bog želi da budemo aktivni da ne bismo duhovno atrofirali! Bog će te voditi i čućeš Ga kad kaže: „Desnooooo“, „Lijevooooo.“ Što više vidiš sopstvenu vjeru, više ćeš je imati! Isus je rekao: „Jer, onom ko ima, daće se još, pa će imati u izobilju; a onom ko nema, oduzeće se i ono što ima“ (Matej 25:29). On je govorio o vjeri koja vodi u akciju, a ne skriva se u strahu. Nastavi dalje – to je jedna od najmoćnijih stvari koju možeš uraditi!

## Podigni nadu!

Ako si se zaglavio u životu zbog bola, nesigurnosti ili razočaranja, želim te ohrabriti da ustaneš i nastaviš dalje. Neće biti lako, ali ti to možeš. Proguraj se kroz ono zbog čega si se zaglavio. Radije odluči da uradiš nešto nego ništa. Budi poslušan onome što ti Gospod kaže da uradiš.

Bog želi da te oslobodi iz živog pijeska razočaranja i bezna-dežnosti! Zato ustani i podigni nade. Bog ima predivan plan za tvoj život, čak i ako ga sada ne vidiš. Nećeš patiti zauvijek; ispred tebe je svjetla budućnost. Ni trenutka više nemoj se praviti mrtav.

Probudi se ti koji spavaš, ustani iz mrtvih i Hristos će te obasjati.

Efescima 5:14

## TREĆI DIO

### Nada i sreća

• • • •

*Blago (sretan je, zavidi mu se) onome koji ima Boga  
Jakovljeva za svoju pomoć (posebno otkrivenje),  
koji se nada u Boga, Gospoda, svog Boga.*

*Psalam 146:5*

Molim se da počinješ da uviđaš moć nade i da shvataš da su nada i sreća usko povezane. Bez nade ne možeš imati vjeru, jer nada je pozitivno iščekivanje da će se nešto dobro dogoditi. Godinama sam pokušavala da praktikujem nešto što sam mislila da je vjera, ali imala sam negativan stav prema životu, a to svakako nije nada.

Takođe sam dosta vremena bila nesretna, mada sam bila hrišćanka, imala sam sretnu porodicu i punovremenu službu. Nisam razumjela šta nije bilo u redu i pravila sam greške koje mnogi od nas prave, a to je da sam mislila da kada bi se „stvari“ promijenile, mi bismo bili sretniji. Pokušavala sam da koristim svoju vjeru da bih pridobila Boga da mijenja *stvari*, ali nisam shvatala da je On želio da mijenja *mene* mnogo više nego što je želio da mijenja moje okolnosti.

Želio je da naučim da budem sretna u svakoj situaciji, a to je moguće samo ako odlučimo da budemo puni nade – da živimo u sretnom iščekivanju da će se nešto dobro dogoditi nama, kroz nas i oko nas.

Kao što sam spomenula, ovu knjigu nazivam „Sretna knjiga“! Istinski vjerujem da, ako se principi spomenuti na ovim stranicama primjene u tvom životu, to će oslobođiti svaku prikrivenu radost koju do sada nisi mogao otkriti.

Nastavi da ponavljaš: „Nešto dobro će mi se dogoditi danas“ i: „Nešto dobro će se dogoditi kroz mene danas.“

## 10. POGLAVLJE

# U svemu traži nešto dobro

*Znam misli koje mislim za vas, govori Gospod, misli mira, a ne nesreće, da vam dadem izlaz i nadu.*

*Jeremija 29:11*

„Ne razmišljam o bijedi, nego o ljepoti koja još uvijek ne prolazi.“

— Anne Frank

Postoji priča o tri čovjeka koja su radila na jednom prilično posebnom poslu. Ovi ljudi su bili obični radnici unajmljeni da pomognu da se izgradi predivna londonska katedrala. Ovu katedralu je dizajnirao renomirani arhitekt Sir Christopher Wren i predviđalo se da će postati arhitektonsko remek-djelo. Pišući o katedrali u izgradnji, jedan londonski novinar postavio je ovoj trojici ljudi jedno jednostavno pitanje: „Šta radite ovdje?“ Prvi čovjek je odgovorio: „Tešem kamen za deset šilinga dnevno.“ Drugi čovjek je odgovorio: „Deset sati dnevno posvećujem ovom poslu.“ Ali treći čovjek je potpuno drugačije odgovorio: „Pomažem Sir Christopher Wrenu da napravi jednu od najvećih katedrala u Londonu.“

Nije li divno kako tvoj stav može da utiče na tvoju perspektivu u životu? Ono što izabereš da vjeruješ igra veliku ulogu. Prvi radnik je vjerovao da je novac najbitnija stvar. Kada su ga pitali koji je njegov posao, novac je bio prva stvar koju je spomenuo. Drugi radnik je vjerovao da njegovo vrijeme igra najvažniju ulogu. Kada je od njega traženo da opiše

šta radi, on je, naravno, pričao o tome koliko sati utroši radeći na ovom poslu. Ali treći radnik je izabrao da zanemari novac i uloženo vrijeme. On nije na ovaj projekat gledao kao na samo još jedan posao. On ga je vidoš kao divnu mogućnost – šansu da izgradi jednu veliku katedralu. On je vidoš najbolje u ovoj situaciji i zbog toga je bio uzbudjen i radostan na ovom zadatku.

Da bi živio radostan i pobjednički život pun nade, vjerujem da je jedna od najvrjednijih stvari koje možeš uraditi da vjeruješ u ono najbolje u svakoj situaciji. To nije uvjek lako. Prirodno je da tražiš greške i mane - naše tijelo to radi

**Umjesto da  
pretpostavljaš ono  
najgore, vjeruj  
najboljem.**

automatski. Ali imaš izbor da vidiš najbolje i da u to vjeruješ. To je odлуka koju donosiš da bi promijenio početno stanje iz negativnog u pozitivno. Umjesto da pretpostavljaš ono najgore, vjeruj najboljem. Vjeruj u najbolje o svom kolegi. Vjeruj u najbolje o svojoj crkvi. Vjeruj u najbolje o svom bračnom drugu. Vjeruj u najbolje za svoje zdravlje. Vjeruj u najbolje za svoju djecu. Vjeruj u najbolje za svoju budućnost. Bićeš oduševljen kako se cijela tvoja životna perspektiva mijenja samo zbog jednostavnog vjerovanja u najbolje za ljude i situacije u tvom životu.

Isus nam je dao novu zapovijest, a to je da volimo jedni druge onako kako nas On voli. Božija nas Riječ uči da ljubav uvijek vjeruje u najbolje (1. Korinćanima 13:7). U stvari, Pismo kaže da je ljubav „uvijek spremna da vjeruje u najbolje“ u svakome. Svako jutro se sjeti da čitav dan vjeruješ samo u najbolje. Mislim da je to nešto što moramo uraditi namjerno!

Možeš biti kao ona prva dva radnika, koja bi se svaki dan pojavila na poslu samo zbog male plate i dana pred njima. Oni su imali nenađane stavove i tup pogled na život. Ili možeš biti kao treći radnik koji je video priliku, a ne obavezu. Vjerovao je da je ono što radi važno i svaki dan je bio uzbudjen zbog svog zadatka. To je jednostavno pitanje perspektive. Sva trojica su imala isti posao, ali samo je jedan od njih uživao u tom poslu.

Svaki put kada mi je teško da zadržim pozitivan stav prema onome što radim, ogromna mi je pomoć kada se prisjetim da služim Hristu.

Što god činite, činite iz duše, kao da je za Gospoda, a ne za ljude, znajući da ćete zauzvrat od Gospoda dobiti naslijedstvo. Gospodu Hristu služite!

Kološanima 3:23-24

## Stav nadanja

Nada i cinizam ne mogu živjeti zajedno. Zato je jako važno vjerovati u najbolje o ljudima u svom životu, kao i zadacima koje imaš iz dana u dan – kada se tako postaviš, nada buja, a cinizam umire. Ako se pozdraviš sa duhom kritike i stavom prigovaranja, otkrićeš novi i uzbudljiv nivo nade. Počećeš da cijeniš ljude koje si nekada uzimao zdravo za gotovo, a na svoje svakodnevne zadatke ćeš početi da gledaš kao na mogućnosti, a ne kao na obaveze. Predivno je kako samo jednostavna promjena perspektive – biranje Božije perspektive – može da promijeni tvoj život.

Većina ljudi koji su nesretni u životu, nesretni su jer se fokusiraju na nesretne stvari. Oni vide najgore u drugima, oni govore o svemu što ne valja u životu i uopšte imaju negativno gledište. Ali nada radi nešto suprotno od toga – nada vidi

**Nada vidi najbolje,  
a ne najgore.**

najbolje, a ne najgore. Zato nada donosi sreću. Kada očekuješ da Bog uradi nešto dobro, ne možeš da ne budeš sretan. Mnogi ljudi koji su obeshrabreni ili frustrirani u životu, osjećaju se tako samo zato što ne očekuju da će im se išta dobro desiti.

Rano u mom životu mi se dogodilo mnogo tragično bolnih i nasilnih stvari. Zbog toga nikada nisam znala kako je biti sretan. Kada sam imala 23 godine, udala sam se za Davea, i nakon nekoliko sedmica, sjećam se da me je pitao: „Šta nije u redu s tobom? Zašto prema svemu imaš tako negativan stav?“ Rekla sam mu: „Ako ne očekuješ da se desi nešto dobro, onda nećeš biti razočaran kada se ne desi.“ Možeš li da zamislиш da je to neko rekao? Pa, ja sam to rekla, a tada sam to i mislila.

Ove riječi su postale moja životna filozofija. Mislila sam da štitim sebe od povreda i razočaranja tako što ne očekujem da se bilo šta dobro desi. U svakoj situaciji bih primjetila nešto negativno, jer je to ono na šta sam navikla. Zahvaljujući Bogu, tokom godina sam mnogo od Njega naučila o nadi. On je promijenio moj stav i pokazao mi je koliko je važno da se fokusiram na Njega i Njegovu riječ. Ja više nisam osoba koja očekuje da se dese loše stvari. Radim ono što i tebi savjetujem da uradiš. Namjerno tražim i očekujem dobre stvari. Takođe i redovno odvajam neko vrijeme da pomislim na sve dobro što je Bog uradio za mene i kroz mene. Što više postaješ svjestan Božije dobrote, svaki dan ćeš živjeti sa više uzbudjenja i očekivanja.

Nada najviše ima veze sa stavom. Ja mislim da, uz Božiju pomoć, i ti i ja možemo imati pozitivan stav o svemu što se dešava u životu...bez obzira kakva je situacija. Ako želiš da

budeš osoba puna nade i sreće, bez obzira na to šta se desi tokom tvog dana, izaberi da vjeruješ Bogu i imaj pozitivan pogled tako što ćeš u svakoj situaciji vjerovati onom najboljem.

- Ako se tvoje dijete probudi prehlađeno i ne može ići u školu, izaberi pozitivnu perspektivu. Zahvali Bogu što je u pitanju samo prehlada, a ne nešto gore.
- Ako ti procuri sudopera, a voda se razlije po kuhinjskom podu, zahvali Bogu što si bio kod kuće kada se to desilo jer si spriječio veću štetu.
- Ako mašina za sušenje veša uništi neki komad garderobe, izaberi pozitivnu perspektivu. Sada imaš izgovor da ideš u kupovinu.
- Ako izgubiš posao, izaberi da budeš pozitivan. Sada imaš priliku da dobiješ bolji posao.

Sa kakvim god neočekivanim izazovom ili frustracijom da se suočavaš, unaprijed odluči da im nećeš dozvoliti da ti ukradu radost. Ako si nesretan, to će te učiniti samo još očajnijim, tako da nemoj da gubiš vrijeme na takvo stanje. Ne dopusti svakodnevnim događajima da ti odrede način života koji ćeš živjeti. Izaberi da se smiješ čak i u najiritantnijim okolnostima i ne dopusti nečemu tako blesavom kao što je gužva u saobraćaju ili loša frizura da te spriječe da uživaš u životu.

**Sa kakvim god  
neočekivanim  
izazovom ili  
frustracijom da se  
suočavaš, unaprijed  
odluči da im nećeš  
dozvoliti da ti  
ukradu radost.**

## Ljepota umjesto pepela

Jedino zbog obećanja u Božijoj Riječi moguće je vidjeti najbolje u svakoj situaciji i zadržati pozitivan stav. U Rimljanim 8:28, apostol Pavle kaže: „Znamo da Bog u svemu radi za dobro onih koji ga vole, onih koji su po njegovom naumu pozvani.“ Primjećuješ li da ovaj stih ne kaže da Bog radi *ponešto* za tvoje dobro; kaže *u svemu*. Svaku situaciju, svaki susret, svako iskušenje, svaku frustraciju – Bog će sve izvesti na dobro za tebe.

Bog čak može uzeti i najteže stvari kroz koje si prošao i upotrijebiti ih za tvoje dobro. Izaja 61:3 kaže da će ti On dati „ljepotu umjesto pepela“ i „ulje radosti umjesto žalosti.“ Bog nije izazvao bol ili nepravdu kroz koju si prošao, ali On može iscijeliti tvoje rane i iskoristiti ono kroz šta si prošao da bi postigao nešto lijepo – za tvoj život i za živote drugih ljudi.

Lično sam otkrila da kada vjerujem da će Bog izvesti na dobro bilo koju nedoumicu kroz koju prolazim, onda mi je lakše da prođem kroz to sa pozitivnim stavom. To je predivno obećanje koje sam svaki put gledala kako se obistinjuje, baš kao što je Bog i obećao. To se ostvarilo kada sam imala rak dojke, kada sam prevazilazila zlostavljanje iz djetinjstva, kada su mi okrenuli leđa prijatelji kojima sam vjerovala i u brojnim drugim situacijama. Kroz šta god da trenutno prolaziš, vjeruj i reci: „Bog će ovo izvesti na dobro za mene!“ i osjetićeš poboljšanje raspoloženja.

## Uživaj u čekanju

Kada bih te pitala: „Kada je najteže da budeš sretan i pun nade?“ – prilično je vjerovatno da ćeš odgovoriti da je to kada čekaš da Bog odgovori na tvoje molitve ili da ti ispuni neku potrebu. Možda je to i kada čekaš u saobraćaju ili kada

čekaš suprugu da se spremi da idete negdje zajedno, a kasnite. Možda je to kada čekaš u redu u prodavnici, a tamo radi novi kasir i treba mu puno vremena da otkuca sve tvoje namirnice. Možda je to kada čekaš na promjene kod ljudi za koje si se molio ili čak neki proboj u navikama sa kojima si se borio. Nikada nije lako čekati, ali to je nešto što svako od nas ponekad mora uraditi. Znam mnogo ljudi koji su čekajući izgubili sav mir i svu radost. Jednu od njih poznajem veoma dobro, jer sam ja ta osoba! Srećom, napredovala sam tokom godina, ali još uvijek moram da raštem u „čekanju.“

Vjerujem da možemo iskusiti Gospodnju radost čak i u trenucima dok čekamo. Sve zavisi od toga koji način čekanja ćemo izabrati. Izajia 40:31 kaže: „Ali koji se uzdaju u Gospoda (koji očekuju, traže Ga i nadaju Mu se), stiču novu snagu...“ Možeš ojačati u procesu čekanja, ali samo ako čekaš sa nadom – očekujući Ga, tražeći Ga i nadajući Mu se. Dok čekaš na Boga, nema koristi od toga da budeš frustriran, nestrpljiv i očajan. Ali ako imaš stav iščekivanja, onda period čekanja u stvari može biti odličan period u tvom životu. Čak i kada čekamo u redu u prodavnici, možemo izabrati da vjerujemo u najbolje tako što ćemo vjerovati da je naše vrijeme u Njegovim rukama, kao što On kaže u Svetom Pismu. Vjerovatno nas Gospod čuva od neke nesreće tako što odlaže naš polazak ili možda koristi „božansko odlaganje“ da bi nam pomogao da duhovno sazrimo.

**Vjerujem da  
možemo iskusiti  
Gospodnju radost  
čak i u trenucima  
dok čekamo.**

Možda se moliš i čekaš neku finansijsku dobit, fizičko ili emotivno iscjeljenje, brak, poslovnu priliku ili da se dijete vrati kući. Šta god da je, možeš se radovati dok čekaš ako vjeruješ najboljem...čak i prije nego što se dogodi. Sviđa mi se ovaj dječak:

Jedan čovjek je prišao utakmici male lige bejzbola jednog popodneva. Pitao je dječaka u bazi koji je rezultat. Dječak je odgovorio: „18 prema ništa – mi smo u zaostatku.“

„Sigurno si obeshrabren“, reče posmatrač. „Zašto bih bio obeshrabren?“, odgovori dječak. „Nismo još stigli ni da udarimo lopticu!“

Volim ovu jednostavnu priču i nadu koju ima ovaj dječak. Pretpostavljaljalo se da bi ovaj mladi igrač trebao biti uzneniran i obeshrabren. Njegov tim je već poražen, a tek je prvo poluvrijeme. Situacija ne izgleda baš najbolje dok on i njegovi saigrači čekaju svoj red na udarac.

Ali umjesto da postane negativan i depresivan zbog toga kako sve izgleda dok on čeka, ovaj mladi igrač je izabrao drugačiji stav. Vjerovao je najboljem, pretpostavljajući da će njegov tim osvojiti više od 18 poena kada se čekanje završi. Umjesto da se obeshrabri dok čeka, on je bio uzbudjen.

Ako danas nešto čekaš, ne dozvoli da ti izgled situacije ukrade nadu i uništi radost. Možda ne izgleda da neki odnos može biti obnovljen, možda ne izgleda da ćeš doći do nekih finansija, možda ne izgleda da će ti se stanje promijeniti, možda ne izgleda da će stvari izaći na dobro – ali umjesto da se obeshrabriš dok čekaš, osnaži se. Još nisi došao na red za udarac. Vjeruj najboljem. Vjeruj da će Bog obezbijediti upravo ono što ti treba baš u onom momentu kada ti to treba.

**Umjesto da se obeshrabriš dok čekaš, osnaži se.**

Ako odlučiš da vjeruješ najboljem čak i prije nego što vidiš rezultate, vrijeme čekanja može biti uzbudljiv period iščekivanja punog nade.

## Kako vjerovati najboljem

Prva poslanica Korinćanima 13:7 kaže da ljubav „sve štiti, sve vjeruje, svemu se nada, sve trpi.“ Kako divan stih – ljubav uvijek vjeruje u najbolje o ljudima i nikada ne odustaje od nade. Ne bi li to bio divan način života? *Uvijek spremna da vjeruje najboljem u svakoj osobi i ima nadu koja ne blijedi ni u kakvim okolnostima?* Ovo je vrsta života ispunjenog radošću i nadom, kakav Bog želi da živiš.

Ako nisi vjerovao u najbolje o nekim ljudima u tvom životu, to više povrjeđuje tebe nego njih. Danas može biti dan kada ćeš se pozdraviti sa ciničnim stavom i poželjeti dobrodošlicu nadi. Evo nekoliko praktičnih načina na koje to možeš uraditi.

**Danas može biti  
dan kada ćeš  
se pozdraviti  
sa ciničnim  
stavom i poželjeti  
dobrodošlicu nadi.**

### Pogledaj bolje

- Zamoli Boga da ti pokaže nešto dobro u vezi s tom osobom, a onda se zagledaj u to više nego ikada prije. Već znaš šta ti se ne sviđa; otkrij nešto što ti se sviđa.
- Umjesto da tražиш mane, traži vrline. Nađi omiljenu stvar u vezi sa tom osobom – nešto što si možda ranije previdio. Umjesto da gledaš na njen problem, pogledaj njen potencijal.

### Prepostavi nešto dobro

- Često prepostavimo nešto najgore u vezi sa nekom osobom. „*Ova osoba će me razočarati, oni su me najmerno povrijedili, znam da će me s vremenom ostaviti.*“ Ali umjesto da prepostavljamo najgore, nuda uvijek prepostavlja najbolje. Možda je ta osoba ranije zabrljala, ali moguće je da je naučila iz svojih grešaka.

Prepostavi da će te blagosloviti i ostaviti odličan utisak na tebe i onda joj daj šansu da to i uradi.

### *Vidi ljude na isti način na koji ih Bog vidi*

- Postoji velika razlika između onoga kako Bog vidi ljude i kako ih mi vidimo. Na primjer, kada su gomile ljudi prilazile Isusu, učenici su ih vidjeli samo kao hrpu, dok ih je Isus gledao sa suosjećanjem. Zamoli Gospoda da ti otvori oči da vidiš Njegov narod onako kako ga On vidi – očima ljubavi, razumijevanja i suosjećanja.

### *Imaj mentalitet „Nadam se,“ a ne „Mrzim“*

- Ovo zahtijeva malo vježbe, ali je to zanimljiva vježba. Počni se nadati dobrim stvarima u nekoj osobi umjesto da mrziš ono što te iritira u vezi s njom. Izrazi riječima jezik nade. Pokušaj reći stvari kao što su: „Nadam se da će ovo izaći na dobro“, „Nadam se da si u pravu,“ i „Ulažem nade u ovaj odnos,“ umjesto: „Mrzim da sklapam nova prijateljstva,“ „Mrzim što imam posla s ovom osobom,“ ili „Mrzim kada kažu to.“

Ovo su neki od koraka kojima bi mogao da počneš, ali to nije sve. Ako zaista želiš da znaš kako da budeš ispunjen nadom, vjerujući najboljem o drugima i o okolnostima u svom životu, proučavaj Isusov primjer. Čitaj Jevanđelja i gledaj kako je Isus služio, iscijeljivao, ohrabrivao, poučavao i volio. Isus ne samo da je želio najbolje za ljude. On je u njima video najbolje. Kako odličan primjer da se slijedi. Nije li ti drago što je Isus video najbolje u tebi? Video je nešto vrijedno spasa! Ti i ja možemo donijeti odluku da uradimo isto ovo za druge ljude. Hajde da počnemo danas!

**Isus ne samo da je želio najbolje za ljude. On je u njima video najbolje.**

## Podigni nadu!

Postoji radost koja dolazi kada tražimo i vjerujemo u najbolje. To je kao kada kopaš u rudniku zlata i vjeruješ da samo što nisi naišao na pravo bogatstvo. Kada ljudima i okolnostima u životu pristupiš sa stavom punim nade, sigurno ćeš naći nešto dobro.

Ne dopusti dnevnim frustracijama da ti ukradu radost. Budi dovoljno pozitivan da se smiješ kroz dnevne nezgode. A ako se boriš sa nečim većim od nezgode, sjeti se da Bog obećava da će izvesti sve na dobro. Tako da, kreni i podigni nadu. Dobre stvari će se dogoditi danas...i sutra...i prekosutra. Sve što treba da radiš je da ih potražiš.



## 11. POGLAVLJE

# Zatvorenici nade

*Vratite se u tvrđavu, vi zatvorenici nade! Već vam danas objavljujem da će vam nadoknaditi dvostruko.*

*Zaharije 9:12*

„Nada je san budnog čovjeka“

— Aristotle

Priča govori o školskom sistemu u jednom velikom gradu koji ima poseban program, napravljen da pomogne učenicima sa gradivom tokom dužih boravaka u gradskim bolnicama. Jednog dana je nastavnica koja je radila u tom programu primila rutinski poziv i pozvana je da odnese zadatak jednom djetetu. Kratko je razgovarala sa djetetovim nastavnikom i zapisala je njegovo ime i broj sobe u bolnici. „Trenutno u njegovom razredu učimo imenice i priloge“, objasnio je redovni nastavnik. „Bio bih zahvalan ako biste mu pomogli da razumije ove pojmove da ne bi suviše zaoštalo za gradivom.“

Nastavnica koja je radila u bolničkom programu je kasnije te večeri otisla da vidi dječaka. Međutim, kada su joj dodjeliivali zadatak, niko nije ni pomislio da joj kaže kakve opektine to dijete ima i kakve bolove trpi. Uznemirena od samog pogleda na dijete, nastavnica je mučno zamucala: „Poslali su me iz tvoje škole da ti pomognem sa imenicama i priložima.“ Kada je te večeri otisla iz bolnice, osjećala je da je vrlo malo postigla.

Ali narednog dana, kada se vratila u bolnicu, sestra joj je pritrčala i pitala je: „Šta ste uradili tom dječaku?“ Osjećajući da mora da je uradila nešto loše, nastavnica se počela izvinjavati. „Ne, ne“, rekla je optimistično sestra, „ne znate na šta mislim. Brinuli smo se za tog malog dječaka, ali od juče se kompletan njegov stav promijenio. On se bori i reaguje na terapiju. Kao da je odlučio da živi.“

Nakon dvije sedmice, dječak je objasnio šta se dogodilo. Prije nego što je stigla bolnička nastavnica, on je potpuno digao ruke od nade. Ali sve se promijenilo kada se ona pojavila u njegovoj bolničkoj sobi. Jednostavno je nešto shvatio, a to je objasnio na ovaj način: „Oni ne bi poslali nastavnicu da radi na imenicama i prilozima sa dječakom koji umire, zar ne?“

Sila nade je zadržala dječaka. Zaglavljena u bolničkoj sobi, okružen bolešću, obeshrabrenjem i lošim vijestima, dječak je bio spreman da odustane. Ali samo jedna nastavnica sa dobrim stavom i domaćim zadatkom je donijela dovoljno nade da dječak promijeni svoj pogled na život i dala mu je razlog da nastavi da se bori. Ako jedna osoba može donijeti toliko nade, zamisli šta bi se dogodilo kada bi se svaki dan okružio takvima ljudima. Šta bi moglo uraditi 5 ili 10 ili 20 takvih ljudi?

Pomisli kako bi to izgledalo u tvom životu. Istina je: Na tebe će duboko uticati ono što je oko tebe. Ako ispunиш život ljudima, događajima i aktivnostima koji njeguju nadu, bićeš ispunjen nadom i optimizmom. Ali ako ispunиш život beznadežnim ljudima i izabereš da učestvuješ u aktivnostima koje su negativne i obeshrabrujuće, bićeš isfrustriran i očajan svaki dan. Samo je u pitanju ono čime izabereš da se okružiš.

Ovo ne znači da u životu možemo izbjegći svu negativnost.

Neke od onih stvari koje nas okružuju ne moraju biti naš izbor, ali mi treba da izaberemo najbolje što možemo.

## Nada koja te okružuje

Zaharije 9:12 koristi interesantnu frazu kada govori o našem odnosu sa nadom. U ovom stihu Svetog Pisma, Bog govori o svom narodu kao o „zatvorenicima nade.“ On kaže: „Vratite se u tvrđavu, vi *zatvorenici nade*.“

Sviđa mi se ovaj opis - „zatvorenici nade.“ Razmisli o ovome. Ako si zatvorenik nade, onda nemaš izbora. Ne možeš biti negativan, ne možeš da brineš, ne možeš da budeš beznadežan. Kada dođu teška vremena i kada se boriš sa razočaranjem, nada koja te okružuje će te podići u vjeri. Sve oko tebe ti govori da će te Bog izvesti iz toga, a kada to čuješ, nešto te podigne u Duhu. Ti si ohrabren da vjeruješ i izjavljuješ: „Dobre stvari se dešavaju meni i kroz mene!“

Moj prvi izbor za naslov ove knjige je bio „Zatvorenici nade“, ali brinuli smo se da ljudi ne bi ovo mogli razumjeti bez objašnjenja, pa smo se odlučili za *Podigni nadu!* Sviđa mi se pomisao na to da sam tako puna nade, kao da sam njom zarobljena. Da li si spreman da živiš svoj život zatvoren u zatvor nade?

Bog želi da budemo zatvoreni u nadi, vjerujući da On može da promijeni ono što treba da bude promijenjeno. Naša nada je u Bogu! On sve može! Bez obzira na to kako se osjećamo ili kako stvari izgledaju, vjerujemo da Bog radi i da ćemo vidjeti pozitivnu promjenu u pravo vrijeme. Zato je nada odlučna i ne odustaje. Kada dođeš na kraj svojih snaga – kada snaga počne da popušta – priča još nije gotova. Božijoj snazi nema kraja. Njegova snaga je neiscrpna.

Ako si nepokolebljiv u svojoj nadi, ne možeš izgubiti... jer Bog ne može izgubiti. Obzirom da je Bog za tebe, pobjeda je neminovna.

Bog me je prije mnogo godina pozvao u službu, ali biću iskrena prema tebi i reći će ti da uspjeh nije došao preko noći. Trebalo je puno rada i bilo je puno noći kada sam se pitala da li sam dobro čula šta mi je Bog govorio. Ljudi nisu uvijek bili otvoreni za mene i bilo je mnogo sastanaka kada sam se pitala da li će se iko pojaviti. Dave i ja smo prošli kroz godine i godine priprema i vjerovanja Bogu da će izgraditi ono što je danas svjetska služba. Tokom tih godina, mnogo puta sam bila u iskušenju da odustanem. Ali moje svjedočanstvo je: Još uvijek sam ovdje! Čak i kada imam sumnje i pitanja, čak i kada nisam mislila da imam snage da nastavim, znala sam da će Bog prokrčiti put tamo gdje je izgledalo da puta nema. Dave i ja smo položili nade u Njega, a On je premašio naša najburnija očekivanja.

Ako odlučiš da budeš zatvorenik nade – da živiš okružen sretnim iščekivanjem da će Bog uraditi nešto dobro – isto ovo se može dogoditi i tebi. Koji god ti je cilj ili san Bog stavio na srce, vidjećeš ga kako se obistinjuje. Možda se neće desiti onda kada si mislio, i možda se neće desiti onako kako si mislio, ali će Bog to uraditi tako da prevaziđe sva tvoja najburnija očekivanja. Nećeš morati

da ga ostvaruješ u svojim vlastitim snagama. Sve što treba da uradiš je da istraješ – samo nemoj da odustaješ. Okruži se nadom i gledaj kako te Bog blagosilja na one načine za koje nikada nisi ni mislio da su mogući.

**Okruži se nadom  
i gledaj kako te  
Bog blagosilja na  
one načine za koje  
nikada nisi ni mislio  
da su mogući.**

Ono što oko ne vidje i uho ne ču, i u ljudsko srce ne uđe, to je Bog pripremio za one koji ga vole (koji Ga poštuju, poslušni su mu i sa zahvalnošću prepoznaju privilegije koje im daruje).

1.Korinćanima 2:9

Vjerujem da Bog ima mnogo prijatnih iznenađenja koja te čekaju, stvari koje je pripremio za tebe. Drži svoje nade budnima!

## Stvari koje ne možeš ponijeti sa sobom

Kada zatvorenik uđe u ćeliju, on ne može ponijeti sa sobom ništa što nije odobreno. Nije dozvoljeno unijeti stvari koje se smatraju opasnim.

Ali ti si drugačija vrsta zatvorenika – ti si zatvorenik nade. Ti nisi okružen ciglama i željezom; Bog želi da te okruži svojom dobrotom, svojom milošću, svojom nadom. Gdje god se okreneš, gdje god pogledaš, možeš iskusiti radost, mir, pouzdanje i blagoslove od Gospoda. Isus je umro da bi ti dao ovakav život.

Ali važno je da razumiješ da postoje neke stvari koje ne možeš ponijeti sa sobom kada uđeš u okružje nade, jer su opasne. Ako ćeš biti okružen nadom, pruža ti se prilika da ostaviš iza sebe stvari sa sljedećeg spiska:

- Negativne riječi
- Mentalitet žrtve
- Poređenje sebe sa drugima
- Mrgudan pogled na život
- Gundjanje i kukanje
- Stav samosažaljenja
- Obeshrabrenje i očaj

**Možeš izgraditi svoj život na istinitosti Božije Riječi, a ne na lažima neprijatelja.**

Život vjernika nije osmišljen da bude pod pritiskom ovih neprijateljevih tereta. Ne moraš živjeti depresivan i beznadežan. Uz Božiju pomoć, možeš se riješiti svake obeshrabrujuće, sebične i negativne laži od neprijatelja i živjeti okružen nadom. Možeš izgraditi svoj život na istinitosti Božije Riječi, a ne na lažima neprijatelja. Stihovi koje često citiram iz 1. Poslanice Petrove 5:7 su:

Svu svoju brigu prebacite na njega, jer on se brine o vama.

Mi treba da prebacimo svoje brige. Dakle, da ih bacimo! Nije li ovo odlična slika? Ne da ih skinemo i stavimo na stolicu pored nas odakle možemo kasnije opet da ih uzmemo; treba da ih potpuno izbacimo. Bacimo ih što dalje možemo, da ih nikada više ne pokupimo. Prebacimo ih na Boga i On će se brunuti za nas!

Odbaci laž koja kaže: „*Niko me ne voli. Niko neće htjeti da ruča sa mnjom. Nikada se neću riješiti ove bolesti. Neću biti unaprijeđen na poslu. Vjerovatno se nikada neću udati.*” Nemoj se okružiti ovakvim beznadežnim mislima. Prebac svaku brigu na Gospoda onog momenta kada osjetiš njen prisustvo i stvari u tvom životu će početi da cvjetaju. Tjeskoba i briga koje su te pritiskale će odjednom izgubiti silu nad tobom. Sada možeš da iskusiš ono što Isus naziva „odmorom“ za dušu (vidi Matej 11:29).

## Vrt nade

Već sam spomenula da ako živimo u vrtu nade, nešto će uvijek da cvjeta. Obično je u baštama zasađeno mnogo različitih vrsta cvijeća i uvijek je nešto prepuno života. Čim jedna biljka potpuno procvjeta, neka druga tek počinje. Vlasnicima bašte nikada ne nedostaje cvijeća. U našoj kući postoje tri vrste grma sa različitim cvjetovima. Jedan cvjeta u rano proljeće, drugi u kasno proljeće, a treći u rano ljeto. Sve vrijeme imamo cvijeće!

Shvatila sam da neću uživati u cvijeću, koliko god da ga ima, ako nemam vremena da ga posmatram. Isto tako, treba da odvojimo neko vrijeme da posmatramo dobre stvari koje se stalno događaju oko nas. Mediji izvještavaju o svemu lošem što se događa u svijetu, ali postoje dobre stvari svuda oko nas, ako ih namjerno potražimo.

Ponekad smo toliko zauzeti svojim problemima da nemoćemo vremena da tražimo ono što je dobro u životu. Mislim da je za nas važno da uradimo ono što svaka kriza zahtijeva od nas tokom perioda poteškoća i da odvojimo vrijeme da sagledamo ono dobro u životu. Možemo reći da je dobro suprotnost od teškoće. To je kao kada dodajemo začine i so blagom jelu. Nekako, nalazimo veću snagu da se izborimo sa našim izazovima u životu kada odvojimo vrijeme da pogledamo šta svakog dana cvjeta u našem vrtu nade.

Odlučila sam da ostavim pisanje na par minuta i zagleđam se u ono što danas cvjeta u mom vrtu. Vidjela sam da se osjećam jako dobro, sjetila sam se da sam sinoć odlično spavala, sunce sija, već sam razgovarala sa troje, od svojih četvoro djece, a tek je 10 sati ujutru i jutros me je muž zagrlio. Međutim, jedno od mojih unučadi prolazi kroz težak period, jedna dobra prijateljica ima rak, ove sedmice imam

mnogo posla, a telefon mi je pokvaren. Ako uvijek gledamo na ono što cvjeta u našem vrtu nade, nijedan problem nije dovoljno velik da se ne možemo s njim izboriti sa radošću.

Možda nisi primjetio, ali sigurna sam da nešto cvjeta u tvom životu. Podstičem te da potražiš to.

## Poboljšaj svoje okruženje

Nekada se moramo boriti za nadu. Moramo odbaciti glasove u svijetu koji pokušavaju da je uguše. Važno je okružiti se ljudima koji nisu negativni i sumorni. U životu nam trebaju bar oni ljudi koji su puni nade i koji šire nadu. Kada patimo i kada prolazimo kroz bolne periode, lako je naginjati ka ljudima kojima možemo izložiti svoje probleme. Nema ništa loše u tome da podijelimo svoju bol sa prijateljem ili da tražimo molitvu, ali tada ne treba da izaberemo ljudе koji su i sami beznadežni. Nekom negativnom prijatelju možeš reći o ponoru u kojem si se našao, a on će ti reći: „Ne znaš ti šta je ponor dok ne pogledaš u kakvom sam ja.“ Znaš o kakvom tipu osobe govorim.

**Isključi negativne komentare i okruži se nadom.**

Želim da te ohrabrim da danas poboljšaš svoje okruženje. Isključi negativne komentare i okruži se nadom. Zamoli Boga da ti u život dovede ljudе koji će te svakodnevno ohrabrivati. Umjesto da se družiš sa ljudima koji te samo podsjećaju na tvoje probleme, nađi ljudе koji će ti reći da ćeš uspjeti i da je Bog na tvojoj strani. Lako je opravdati beznadežnost govoreći: „Okružen sam sa toliko negativnih ljudi koji me obeshrabruju. Moj posao je depresivan, i svi se žale po cijeli dan.“ Tada treba da se boriš za nadu. Preuzmi odgovornost da nađeš neke ljudе koji nisu negativni i ne slušaj

kancelarijske tračeve. Izađi u šetnju umjeto da ručaš sa gunđalima. Ako u kući postoji neko sa negativnim uticajem i ne možeš ga izbjegići, bar pokušaj parirati tom uticaju tako što ćeš imati pozitivne odnose koji će te s vremena na vrijeme odmoriti od beznadežnih ljudi.

Neka ti proučavanje Božije Riječi bude prioritet u životu. Riječ ima moć da nam podigne glave i da nam da nadu u svakoj situaciji. Još jedna stvar koju možeš uraditi da bi se okružio nadom je da slušaš slavljenje i neko dobro poučavanje Biblije. Sa danas dostupnom tehnologijom, više je prilika nego ikad da gledamo i slušamo poruke pune žive riječi i ohrabrujuću muziku. Bilo da je CD, podcast, aplikacija na telefonu ili video – šta god da ti je zgodno i pogodno za tvoj raspored – izdvoji vrijeme da se svakodnevno okružiš Riječu Božijom.

Neprijatelj će nas okružiti ljudima koji kuju zlo ili bolnim situacijama, ali Božija Riječ nas uči da nas On okružuje svojom prisutnošću i mnogim dobrim stvarima.

Ti si zaklon meni; čuvaš me od nevolje; okružavaš me  
pjесмама spasenja.

Psalam 32:7

Jeruzalem – gore su oko njega: tako je Gospod oko  
svog naroda, od sada pa do vječnosti.

Psalam 125:2

## Podigni nadu!

Ako si okružen negativnošću, sumnjom, nesigurnošću, brigom ili razočaranjem u životu, vrijeme je za promjenu. Ne moraš više dopuštati ovim stvarima da vladaju nad tvojim životom. Možeš promijeniti svoje okruženje – možeš živjeti u nadi. Čak i prije nego što se tvoja situacija promjeni, promijeniće ti se duša. Možeš izabrati da budeš zatvorenik nade i da se raduješ što će ti Bog duplo nadoknaditi sve što si izgubio u životu.

## 12. POGLAVLJE

# Budi odgovor na nečiju molitvu

*Ne starajte se samo svako za svoje,  
nego svako i za ono što se tiče drugih.*

*Filipljani 2:4*

„Ne postoje beznadežne situacije; samo postoje ljudi koji su zbog njih postali beznadežni.“

— Clare Boothe Luce

Ako želiš da istinski doživiš nadu i sreću u životu, najbolje što možeš uraditi je da pomogneš nekom drugom. Znam da ovo zvuči suprotno od onoga što bi pomislio, ali zaista funkcioniše. Prebacivanje fokusa sa sebe i traženje načina da blagosloviš druge skreće misli sa tvojih vlastitih problema, i dok drugima pružaš nadu i ohrabrenje tako što ćeš im služiti, ti žanješ ono što si dao, ali još mnogo puta više.

Kada farmer zasadi vrt, on u zemlju polaže sitno sjeme i nakon nekog vremena on dobije čitav vrt biljaka koje daju hranu za njega i njegovu porodicu. Božije obećanje da ćemo žnjeti ono što posijemo me još uvijek oduševljava. Ako nešto želimo, sve što treba da radimo je da to damo!

Gary Morsch, osnivač Heart to Heart International u Kanzasu, je fizičar koji je mnogo uradio da obezbijedi medicinsku opremu i namirnice za siromašne u svim siromašnim

zemljama svijeta. U svojoj knjizi *Moć služenja drugima*, on govori o svom volontiranju u Domu Majke Tereze za napuštenu djecu na samrti, u Kalkuti u Indiji.

Dom za napuštenu djecu na samrti je mjesto gdje su dovođeni slabi kada je smrt već bila izvjesna. Ako nisu imali nikoga da brine o njima ili nimalo novca kojim bi platili pomoć, oni su bili smješteni u ovaj dom, gdje bi im Majka Tereza i njeni volonteri pomagali. Neke od najgorih bolesti koje se mogu zamisliti bile su viđene ovdje i tu se brinulo o najsirošnjima.

Znajući za očajničku potrebu i naoružan pouzdanjem i medicinskom stručnošću, Morsch je stigao ovdje pun entuzijazma. Optimistično je mislio: „*Ovo mjesto više neće imati posla. Zbog moje pomoći, moraće promijeniti ime.*” Njegovo srce je bilo na ispravnom mjestu i njegove namjere su bile dobre, ali nije bio spremna na ono što se dogodilo.

Kada se pojavio u službi sa svojim timom od 90 volontera, Sestra Priscilla, ljubazna kaluđerica sa nježnim britanskim akcentom je počela da im zadaje zadatke. Morsch je pažljivo stavio svoj stetoskop oko vrata u ne tako pažljivom pokušaju da da do znanja Sestri Priscilli da je on doktor. Naravno, da bi mu ona dala važan zadatak prikidan njegovim profesionalnim sposobnostima i zaslugama.

Nakon što je sve ostale poslala da rade razne poslove, Sestra Priscilla je pogledala posljednjeg volontera koji je stajao ispred nje, a to je bio Gary Morsch. „Pratite me, molim vas”, uputila ga je. Ušli su u mušku bolničku sobu, punu poljskih kreveta sa bolesnicima i onima na samrti. „*Pa, prepostavljam da će ovo biti moj zadatak,*” mislio je Morsch, ali Sestra Priscilla je prošla kroz ovu sobu i ušla u sobu preko puta. Kako su ulazili u žensku bolničku sobu – punu oslabljenih

žena u svojim posljednjim danima života – Morsch je pomislio: „*Mora da su ovde najveće potrebe. Ovdje će me postaviti da radim,*“ ali sestra Priscilla je nastavila da hoda. Kada su ušli u kuhinju, gdje se riža pripremala na otvorenoj vatri, on se zabrinuo. „*Zašto bi željeli da doktor radi u kuhinji?*“ pitao se, ali sestra Priscilla je užurbano prošla i kroz kuhinju.

Izlazeći iz kuhinje i vodeći Morscha u uski vanjski prolaz, sestra Priscilla je pokazala na ogromnu gomilu trulog smeća. Sam smrad je bio dovoljan da natjera Morscha na povraćanje. „Treba da iznesete ovo smeće niz ulicu do smetlišta“, objasnila mu je. „Smetlište se nalazi nekoliko ulica dole na lijevo. Ne možete ga promašiti.“ Dala je doktoru dvije kante, lopatu, osmijeh umjesto pozdrava i ostavila ga je da radi.

Morsch je tamo stajao zbumen i pomalo uvrijeđen. Pitao se šta da radi. Da li da odbije ovaj zadatak? Da li da razgovara sa nekim o drugom zadatku? Nakon minut, dva razmišljanja, odlučio je da uradi jedinu stvar koju je mogao uraditi – da prione na posao. Cijeli dan je ovaj uvaženi doktor nosio pune kante trulog smeća na gradsko smetlište. Do kraja dana, on se pretvorio u znojavi, smrdljivi nered, ali je premjestio cijelu odvratnu gomilu.

Uznemiren i ljut zbog događanja toga dana, Morsch se vraćao kroz kuhinju, kroz žensku bolničku sobu, kroz mušku bolničku sobu, tražeći svoj tim, da se vrate tamo gdje su bili smješteni. Dok je hodao kroz ove sobe, nije mogao da ne primjeti da su njegove usluge mogle biti bolje upotrijebljene. Čak i pomaganje u kuhinji bi bilo bolje od tegljenja smeća. A onda je ugledao nešto. Dok je čekao da se malodušno pozdravi sa sestrom Priscillom, Morsch je primjetio mali znak, ispisan rukom, na kojem je su bile napisane riječi Majke Tereze: „Nema velikih stvari koje možemo učiniti, samo malih stvari učinjenih sa velikom ljubavlju.“

To je bio ključni momenat za Garija Morscha. Rekao je: „Srce mi se istopilo. Potpuno sam promašio poentu. Trebala mi je ova lekcija. Služenje drugima nije u vezi s tim koliko ja znam, koliko sam diploma zaradio, niti koje su moje zasluge. Radi se o stavu i raspoloživosti da se uradi ono što je potrebno – sa ljubavlju.“

Gary Morsch je postao drag prijatelj Majke Tereze i našao je posebnu svrhu života u pomaganju drugim ljudima. Još mnogo grupa je doveo u Kalkutu da služe najsiromašnijima u Indiji i svaki put je uživao kada vidi kako je njegov tim volontera obogaćen iskustvom. Objasnio je: „Često volonteri dolaze sa istom dozom uvjerenosti, puni sebe, kao što sam i ja bio. Ali svaki od njih se oblikuje djelom služenja drugima.“

## Daj nadu da bi dobio nadu

Djela apostolska 20:35 kažu:

Svime što sam činio, pokazao sam vam da tako – mukotrpnim radom – treba pomagati slabima, sjećajući se riječi koje je izrekao Gospod Isus: „Veća je sreća davati nego primati.“

Isus je rekao da sreća dolazi kada pomažeš drugima. Ovo je suprotno od onoga što bismo mi prepostavili. Mi mislimo da, ako se fokusiramo na sebe i vrijedno radimo da bismo pronašli sreću, onda ćemo je nekada i naći. Ako zaradimo više novca, skupimo dovoljno stvari, ostvarimo dovoljno ciljeva, izgubimo nekoliko kilograma, osvojimo neka priznanja – tada i samo tada ćemo biti sretni. Zbog ovoga radimo više i više da bismo jednog dana dostigli sreću.

Mogu ti reći da ima mnogo umornih ljudi. Potraga za srećom može biti iscrpljujući poduhvat. Znam, jer sam dugo

živjela u tome. Provela sam mnogo godina u životu kao očajan hrišćanin. Voljela sam Boga, ali rijetko kad sam bila sretna. Malo je bilo potrebno da se uz nemirim i da mi se pokvari dan. Ako bi auto čudno zvučao, ako bi Dave otisao na golf umjesto da provede subotu ujutru sa mnom, ako bi se neko od moje djece posvađao sa mnom, ako ne bih uspjela da uradim sve sa svog spiska – ako bi se samo jedna od ovih stvari desila, digla bih ruke od toga dana. Što sam se više trudila da dostignem sreću, sreća bi se činila sve nedostiznjom.

Ali tokom tog perioda Bog mi je pokazao mnogo o tome kako da uživam u svom životu. Što sam više proučavala Riječ, više sam uviđala koliko misli koje imam, riječi koje govorim i stavovi koje prihvatom imaju značajan uticaj na moj život. Naučila sam da me ne moraju kontrolisati moja osjećanja. Uz Božiju pomoć, mogu ih nadvladati i uživati u životu za koji je Hrist umro.

Provela sam mnogo godina pišući i poučavajući o principima iz Božije riječi na svaku od ovih tema ali jedna od najjednostavnijih i najmoćnijih stvari koje mi je Bog pokazao je ova: Ako želimo da imamo nadu i sreću, treba da *damo* nadu i sreću. Kada skreneš misli sa svojih problema i misliš na to kako da pomogneš drugima u njihovim problemima, nevjerovatno je ono što će Bog tada uraditi.

Svaki put kada bih sklonila svoje frustracije i probleme na stranu i koncentrisala se na to da pomognem nekome, čitav moj stav bi se promijenio. Umjesto da se molim: „Bože, treba mi ovo....“ ili „Gospode, zašto nemam ono?“ – Počela bih se moliti: „Kako mogu pomoći nekome danas?“ i „Bože, daj mi priliku da nekome ispunim neku potrebu.“ Otkrila sam da je neizreciva radost kada te Bog upotrijebi kao odgovor na nečiju molitvu.

Vjerovatno si isto ovo primjetio u svom životu. Zaista je blagoslovijenje davati nego primati. Nikada nećeš zaraditi, skupiti ni dostići dovoljno da ispunиш prazninu srećom. Sujeta nikada ne može biti zadovoljena. Ali onog momenta kada prestaneš gledati u sebe i počneš gledati oko sebe, otkrićeš sreću i nadu za kakve nisi znao ni da postoje. Kao Gary Morsch i njegovi volonteri bićeš „transformisan djelom služenja.“

**Ali onog momenta  
kada prestaneš  
gledati u sebe i  
počneš gledati oko  
sebe, otkrićeš sreću  
i nadu za kakve nisi  
znao ni da postoje.**

Svaki dan tražim od Boga da mi pokaže nekoga kome mogu pomoći. Nekada me vodi ka nečemu velikom, ali najčešće je to nešto malo. Tako malo da se čini neprijetnjim. Danas je došao čovjek da mi popravi toalet i kada je završio

pitao je može li razgovarati sa mnom. Kada sam pristala, rekao je da ima ženu i petoro djece i želio je znati koja od mojih knjiga bi bila dobar poklon njegovoj ženi za Dan majki. Malo sam popričala sa njim o njegovoj porodici i onda sam ga odvela do svoje police i rekla mu da izabere dvije knjige za poklon njegovoj ženi. Za ovo je trebalo samo nekoliko minuta i nije me ništa koštalo, a njemu je mnogo značilo. Na neki način, mislim da ću danas biti sretnija samo zbog ovog sićušnog čina ljubavnosti. Žao mi je što mi je tako dugo trebalo da naučim ovaj divan princip, ali zahvalna sam što ga sada znam. Svaki dan u našim životima se možemo boriti protiv beznadežnosti, kroz razna djela ljubavnosti!

## Čak i najveći služe

Tokom Američke Revolucije, čovjek u civilu je projahao pored grupe vojnika koji su popravljali malu odbrambenu ogradu. Njihov nadređeni je

vikao dajući im uputstva, ali nije ni pokušao da im pomogne. Kada ga je ovaj jahač pitao: „Zašto?“, nadređeni je dostojanstveno odgovorio: „Gospodine, ja sam desetar!“

Stranac se izvinio, sišao sa konja i prišao da pomogne iscrpljenim vojnicima. Kada je posao bio gotov, on se okrenuo prema desetaru i rekao: „Gospodine desetaru, kada sljedeći put budete imali sličan posao i nedovoljno ljudi, idite kod svog glavnog komandira i ja ću doći i ponovo vam pomoći.“ Stranac je bio niko drugi nego George Washington.

Koliko god važan da postaneš, nikada ne dozvoli sebi da misliš da si suviše važan da pomogneš nekom drugom. Možda već dugo radiš, možda si mnogo postigao i u poslovnom i u privatnom životu ili možda imaš bitnu titulu ispred imena ili impresivne inicijale iza njega, ali nikada ne možeš biti suviše bitan da se ne poniziš i da ne pomogneš drugima. Isus je sišao sa visokog i uzvišenog mjesa i ponizio se uzevši obliče sluge. Pismo nas uči da Isus treba da nam bude primjer poniznosti. (Filipljani 2:5)

**Koliko god važan  
da postaneš, nikada  
ne dozvoli sebi da  
misliš da si suviše  
važan da pomogneš  
nekom drugom.**

Imam tu privilegiju da budem predsjednica ove, širom svijeta rasprostranjene službe. Svaki dan treba da donesem mnogo odluka i da budem na mnogo mjesta. Zahvalna sam na prilikama koje mi Bog daje, ali neki od najradosnijih momenata u mom životu nisu oni koje provedem u sali za sastanke ili propovijedajući na bini. Koliko god da uživam u ovim stvarima, neki od najradosnijih momenata su kada služim ljudima kroz našu Ruku Nade. Svaki dan koji stojim sa

našim volonterima i provedem neko vrijeme blagosiljajući druge – dijeleći hranu gladnima, nabavljujući bunare čiste vode žednima, dajući školsku opremu siromašnima – to me podsjeti zašto radimo to što radimo. Pružajući ruku nade drugima, ja sama primam svježu nadu i sreću. Mnogo puta sam iscrpljena ostavila misijsko putovanje u zemljama trećeg svijeta, ali nikada se nisam vratila sa puta žaleći što sam imala priliku da služim.

Prije 20 godina smo započeli misiju u našoj službi i mislila sam da treba da je nazovemo Ruka Nade, jer je pružanje nade beznadežnim ljudima bio naš cilj. Mislim da bi se moglo reći da je nemoguće da se osoba osjeća beznadežno ako pruža nadu drugome!

Isus je Božiji Sin koji je došao da ponese grijehu svijeta, ali i On je izdvojio vrijeme da služi. U Markovom Jevanđelju 10:45, Isus je rekao da On „nije došao da mu služe nego da služi i da svoj život da kao otkupninu za mnoge.“ U Jevanđeljima stalno vidimo Isusa kako pomaze drugima: hrani mase, iscjeđuje bolesne, provodi vrijeme sa djecom, čak pere noge učenicima. Mora da je Isus nalazio ogromno zadovoljstvo da služi drugima jer je to radio sve vrijeme. Nama je ostavio ovaj primjer da bismo mogli da

**Mora da je Isus  
nalazio ogromno  
zadovoljstvo da  
služi drugima  
jer je to radio sve  
vrijeme.**

pratimo Njegove korake.

Kako sjajan primjer. Nemoj postati suviše važan ili suviše zauzet da ne možeš pomoći nekome ko je u potrebi. Svakidan potraži nekoga koga možeš blagosloviti. To može biti samo jednostavan čin ljubaznosti, a može biti i bitan čin velikodušnosti – šta god možeš da uradiš da pomogneš nekome ko je u potrebi, ohrabrujem te da to i uradiš. Ne samo da će

ta osoba biti blagoslovljena tvojim služenjem, nego ćeš i ti biti blagoslovlijen.

## Najbolji način da drugima govorиш o Isusu je da im pokažeš Isusa

Poslanica Rimljanima 2:4 nas uči da je Božija dobrota ono što čovjeka vodi ka pokajanju. Bio bi iznenađen da znaš koliko bi tvojih prijatelja, komšija i kolega željelo prihvatići Isusa, kada bi ti bio dobar prema njima. Nekada treba da prestanemo da propovijedamo svakome i da počnemo biti ljubazni prema ljudima u našem životu – da se zaista zainteresujemo za njih i blagoslovimo ih, molimo se za njih i zamolimo Gospoda da nam pomogne da vidimo kako im možemo služiti. Drugim riječima, treba da „pokažemo“ ljudima Isusovu ljubav!

Jakov 2:15,16 kaže:

Ako neki brat ili sestra nemaju šta da obuku ili nemaju da jedu svakog dana, a neko od vas im kaže: „Idite u miru, utoplite se i najedite, a ne da im ono što im je potrebno za tijelo, kakva je korist od toga?“

Nemojmo biti ljudi koji kažu: „Idite u miru, utoplite se i najedite.“ Ako je neko u potrebi, a ti mu možeš ispuniti tu potrebu, onda to i uradi. Često nam se desi da ignorišemo neku potrebu, govoreći: „Moliću se za tebe,“ a da i ne pitamo Boga šta možemo uraditi da pomognemo toj osobi. Naučila sam da ne moram moliti Boga da ispuni neku potrebu koju lako i sama mogu ispuniti, ali vjerovatno prosto ne želim to da uradim. Ako ćeš se moliti da Bog nekome pomogne, budi spremjan da te On pošalje da sam to uradiš.

**Ako ćeš se moliti  
da Bog nekome  
pomogne, budi  
spreman da te On  
pošalje da sam to  
uradiš.**

Jedan čovjek je ispričao da je sa nekom grupom išao u Rusiju da dijeli Biblije tokom veoma teškog perioda, kada su tamo ljudi gladovali. Tim je ponio svoje Biblije u red za supu, gdje je mnogo ljudi čekalo da dobije mali komad hljeba i činiju supe. Kako je jedan čovjek pokušao da doda Bibliju nekoj ženi, ona se naljutila i rekla: „Tvoja Biblija neće napuniti moj prazan stomak.“ Kao da je zazirala od ovih hrišćana jer su im govorili o dobrom Bogu, a nisu im dali nikakvu opipljivu, praktičnu pomoć. Ovi vjernici koji su dijelili Biblije nikada to nisu zaboravili. Vjerujem da su neki ljudi u takvim bolovima da ne bi bili u stanju ni da čuju Jevanđelje dok im prvo ne ublažimo bol.

Ne kažem da ne treba da dajemo ljudima Biblije, ali kažem da pored toga što im dajemo Riječ, prvo moramo da ispunimo njihove potrebe. To je ono što je Isus radio. Isus je ljudima davao Riječ i On je ispunjavao njihove potrebe. On ih je hranio; On ih je liječio; On ih je učio; i On ih je slušao. Nije samo govorio o Očevoj dobroti; On je *pokazivao* tu dobrotu na stvarne načine.

Ako danas u tvom životu postoje ljudi kojima je potrebno da upoznaju Isusa, predložiću ti novi metod širenja Jevanđelja. Umjesto da im samo govariš o nadi koja je u Isusu, daj im tu nadu. Saznaj koje su im potrebe i zamoli Boga da ti pomogne da ih ispuniš. Možda su im potrebne namirnice, benzin za auto ili novac da odu kod doktora. Možda im je potreban neko da im čuva dijete, da bi mogli da se opuste jednu noć. Možda im je samo potreban neko da ih sasluša. Šta god možeš da uradiš da im pokažeš Isusovu ljubav, uradi to. Kada ljudima pomogneš u njihovim fizičkim potrebama, bićeš iznenaden kako se oni brzo otvaraju prema svojim duhovnim potrebama.

**Kada ljudima pomogneš u njihovim fizičkim potrebama, bićeš iznenaden kako se oni brzo otvaraju prema svojim duhovnim potrebama.**

## Podigni nadu!

Važno je sjetiti se da se u ovom životu ne radi samo o nama. Možemo prolaziti kroz neku ličnu poteškoću u svojim životima i tada je lako potpuno se fokusirati na to da tražimo od Boga da pomogne *nama*, da ispunи naše potrebe, da nam obezbijedi stvari za koje mislimo da nam nedostaju. Ali u borbi sa nekim stvarima koje utiču na tebe, nemoj zaboraviti na ljude oko sebe. Gdje god pogledaš, vidjećeš prijatelje, rođake, kolege, komšije i nepoznate koji su u potrebi – u potrebi koju bi ti mogao ispuniti.

Najbolji način da primiš nadu je da je daš. U Božijem domaćinstvu, posljednji su prvi (vidi Matej 20:16), najmanji su najveći (vidi Luka 9:48), slabi su jaki (vidi Joel 3:10) i kada daješ, ti primaš (Luka 6:38). Ustani i probudi svoje nade. Možeš otkriti potpuno novi način uživanja u svom životu, jednostavno tako što ćeš pomoći drugima da uživaju u svom. Pogledaj oko sebe i vidi kome možeš pomoći – obećavam da se nećeš morati previše truditi da ih nađeš. Neko koga poznaješ se moli za neku pomoć upravo sada. Možda možeš biti odgovor na tu molitvu!



## 13. POGLAVLJE

# Nada je naše sidro

*Tu nadu imamo kao čvrsto i pouzdano sidro duše  
koje ulazi iza zavjese.*

*Jevrejima 6:19*

„Blesavo je ne nadati se.“

— Ernest Hemingway, Starac i more

Vjerujem da Bog želi da budemo stabilni i da uživamo u životu šta god se događalo oko nas. On želi da budemo čvrsto usidreni u Njemu i da sve vrijeme budemo puni nade. Vjerujem da je radost jedno od najboljih svjedočanstava nas vjernika. Imamo toliko toga da slavimo! Nama je oprošteno, iscijeljeni smo i oslobođeni. Isus ne samo da je umro da bi nam napravio put do vječnosti u Raju, nego je i obećao da možemo uživati u svakom danu ovdje na zemlji. Hrišćani treba da budu naj-sretniji ljudi na planeti!

**Hrišćani treba da  
budu najsretniji ljudi  
na planeti!**

Iako smo Božija djeca, imamo iskušenja i probleme i često im dopustimo da kontrolišu naše misli, raspoloženja i stave. Dopuštamo im da nam ukradu osmijeh, a to je strašno jer vjerujem da je Gospodnja radost na našim licima odlična objava Isusa! Kako nas bilo kakva poteškoća može unesrećiti na duže vrijeme kada imamo obećanje da Bog sve izvodi na dobro onima koji traže Njegovu svrhu za svoj život?

Radost i sreća nisu luksuz niti samo puke opcije – one su suštinski aspekti naših života u Hristu. Nehemija 8:10 kaže: „...I ne žalite, jer radost u Gospodu, vaša je snaga...“ a Rimljanim 14:17 kaže da je Božije carstvo „pravednost, mir i radost u Svetom Duhu.“ Radost je od vitalne važnosti ako želiš da živiš pobjednički život.

## Nada: Prirodni lijek za nezadovoljstvo

Radost i nada idu ruku pod ruku. Kada zaista počneš da živiš u nadi – vjerujući da će Bog uraditi divne stvari u tvom

**Nada je  
prirodni lijek za  
nezadovoljstvo.**

životu – radost užurbano stupa na scenu. Ne možeš biti depresivan i obeshrabren čak ni ako to želiš. Nada je prirodni lijek za nezadovoljstvo.

Hajde da napravimo eksperiment da vidimo da li je ovo moje vjerovanje tačno i da li će biti tačno i za tebe. Sljedeći put kada ti je dan tužan ili depresivan, izdvoji nešto vremena da misliš: „*Bog će izvesti sve moje probleme na dobro i očekujem da će mi se nešto dobro desiti.*“ Sada pokušaj da isto ovo kažeš glasno i tako ponavljam ovo cijeli dan. Možda se nećeš tako i osjećati, ali to je istina! Božija istina ima silu da prevaziđe naša osjećanja, ako joj damo priliku za to.

Nada u Božiju dobrotu nam ukroćuje divlje misli i osjećanja. Smiruje nas i razvedrava nas. Naša duša (um, volja i osjećanja) nalazi svoje mirno mjesto u Božjem obećanju. Kada ljudi nemaju nade, za njih je nemoguće da ostanu stabilni u vremenima životnih oluja. Nemaju ništa što bi ih usidrilo na čvrsto tlo. Ako nemamo vjere u Boga, postoji li u svijetu neko trajno utočište u koje bismo se mogli pouzdati? Iskreni odgovor je: „Ne postoji!“

Umjesto da samo „pokušavaš“ da se osjećaš bolje ili da misliš da se ne možeš osjećati bolje dok se ne promijene tvoje okolnosti, daj Bogu šansu da radi u tvom životu.

Život može da bude jako zabavan. Prije mnogo godina sam odlučila da ću uživati u svom životu jer nikada prije toga nisam. Čak i u službi sam većinom radila i radila i mučila se i borila, osjećajući krivicu većinu vremena, jer sam se fokusirala na svoje mane i zato sam bila očajna. Napokon sam shvatila da Isus želi da se radujem i da uživam u životu (vidi Jovan 10:10). Kao i sve ostalo u Božijem carstvu, i radost je na raspolaganju, ali da bismo je zadržali, treba da budemo uporni. Neprijatelj će dati sve od sebe da te spriječi da uživaš u životu. Kroz svoje laži i obmane, on će se pobrinuti da ti ukrade mir, da živiš pod teretom osude i da ne vjeruješ da te Bog voli. Svaki put kada si beznadežan ili kada nemaš radost, odmah shvati da to đavo radi, a ti treba da mu se odupreš!

Možeš odlučiti da uživaš u životu – u svakom njegovom aspektu. Čak i usred loših okolnosti ili kritike od ljudi do kojih ti je stalo. Možeš biti sretan jer tvoje nada i sreća potiču od Božije dobrote u tvom životu, a ne od okolnosti oko tebe. Kada živimo sa nadom i iščekujući da se nešto dobro dogodi, radost postaje naš prirodan stav.

**Možeš biti sretan jer  
tvoje nada i sreća  
potiču od Božije  
dobrote u tvom  
životu, a ne od  
okolnosti oko tebe.**

Istina je da se tvoje okolnosti vjerovatno neće promijeniti, sve dok tvoja radost zavisi od njihove promjene. Hajde da se radujemo zbog nade koju imamo u Isusu, a ne da budemo nesretni zbog okolnosti koje nam se ne sviđaju.

Okolnosti u svijetu se uvijek mijenjaju. Lako je vidjeti zašto su ljudi toliko nestabilni – jer sve oko njih je nestabilno. Stvari su jedan dan dobre, ali sljedeći dan nisu. Jednog dana imaš dovoljno novca, a onda imaš neočekivani izdatak zbog kojeg ti poslije zafali novac. Djeca se jedan dan fino ponašaju, ali sljedećeg dana zaborave sve što si ih ikada naučio. Ako se vodimo time kako se osjećamo ili kako stvari oko nas izgledaju, bićemo neraspoloženi i nestabilni. Apostol Jakov kaže da nas vjetar često podiže i nosi (Jakovljeva 1:6). Apostol Pavle je rekao da nas nosi svaki vjetar učenja (Efežani 4:14). Ali možemo biti stabilni i nepokolebljivi u nevoljama i razočaranjima, ako imamo nadu kao sidro za naše duše.

Jedna od prvih stvari koje brod uradi u oluji je da baci sidro. Brod je privezan za nešto što se ne pomjera. Sve oko mornara se miče, ali ne i oni. Oni su usidreni za dno okeana. Naša nada u Boga nam služi na isti ovaj način. Sve oko nas se pomjera, ali mi smo čvrsti u Njemu.

## Neka nada uzleti

Želimo da nam nada u Boga bude sidro za dušu, a ne da nas brige i tjeskobe svijeta pritisnu na dno. Nada u Boga je nada bez okova; nije pritisnuta brigama i teretima svijeta. Razmisli o letećem balonu. Dok god se balon drži nekim teretom ili je vezan konopcima, ne može letjeti za šta je i napravljen. Isto je i sa tvojim životom. Ako dozvoliš teretima brige da te pritisnu i užadima tjeskobe da te vežu, nećeš iskusiti život koji ti je Bog namjenio. Želim te ohrabriti da se otarasиш tereta koji te usporava; dvije različite stvari su kada si usidren u nadi i kada si pritisnut brigom.

Evo nekoliko stvari koje te pokušavaju pritisnuti.

### *Potreba da budeš kao drugi ljudi*

Kada sam otkrila da ne moram biti kao drugi ljudi, to je za mene bila tako oslobođajuća lekcija. Ne treba da budemo neko ko nismo da bismo bili prihvaćeni. Bog me nije stvorio da budem kao što su oni. Stvorio me da budem ja!

Ali prije nego što sam ovo shvatila, provela sam godine pokušavajući da se uklopim u tuđi kalup. Pokušala sam da budem ležerna kao Dave, ali to nije dugo trajalo. Pokušala sam da budem tiha i prijatna kao pastorova žena u mojoj crkvi, pa je i to bila katastrofa. Bila sam toliko isfrustrirana pokušavajući da budem kao drugi ljudi. Ali ja i ne treba da budem nečija kopija...kao ni ti.

Bog te je stvorio da budeš ti. Ako želiš da uživaš u svom životu, neophodno je da budeš zadovoljan i da se ugodno osjećaš u onome kakvim te je Bog stvorio. Ako pokušaš da budeš kao svoj komšija ili kolega sa posla ili djevojka koja pjeva u crkvi ili holivudski glumac, to će ti samo ukrasti radost. Nemoj da se porediš sa nekim drugim – uživaj u tome da budeš onakav kakvim te je Bog stvorio.

Shvatao to ili ne, ti imaš jedinstvene darove i talente. Biblija kaže da si „čudesno i divno sazdan“ (Psalam 139:14). Bog te je oblikovao u osobu kakva želi da budeš. Niko na svijetu nije isti kao ti – ti si unikatno remek-djelo. Svaki put kada si u iskušenju da misliš: „Čovječe, volio bih da sam kao ova osoba“ ili: „Kad bih bar imao talente ove oso-be,“ samo se sjeti da i oni vjerovatno govore isto to za neku drugu osobu – čak možda i za tebe. Svi se mi suočavamo sa ovakvim mislima, ali ne moraš im dopustiti da te pritisnu. Izaberi da budeš sretan sa onim kakvim te je Bog stvorio, i neka tvoja duša bude usidrena u nadi i neka tvoja radost

**Niko na svijetu nije  
isti kao ti – ti si  
unikatno  
remek-djelo.**

uzleti.

### *Neoproštenje*

Kada izabereš da oprostiš osobi koja te je povrijedila ili uvrijedila, to je kao da presječeš uže koje te veže za dno. Radost se obnavlja u tvom životu kada odlučiš da oprostiš. Kada te neko povrijedi, predlažem da uradiš ove dvije stvari:

1. Odluči da budeš poslušan Božijoj zapovijesti i da oprostiš.
2. Nadaj se u Gospodu da će doći pravda za tvoj život. Bog obećava da će nam dati dvostruko za svaku našu raniju nedaću (Izaija 61:7). Stavi svoje nade u ovo i očekuj nagradu!

Kada se držimo gunđanja i neoproštenja, sami sebe povređujemo. Ljudi koji su nas povrijedili samo nastavljaju sa svojim životima, ne razmišljajući o tome šta se dogodilo, a sve vrijeme mi dozvoljavamo otrovu ogorčenja da nam uništava život. Ni momenta više nemoj da dozvoliš nekoj ranijoj povredi da te usporava. Oprosti osobi koja te je povrijedila, daj tu ranu Gospodu, i zamoli Njega da ti pomogne da se uzdigneš iznad te boli koju je tako teško bilo otpustiti.

### *Užurban način života*

Ako će nada biti sidro tvoje duše, a radost tvoj stil života, moraćeš se malo orezati. Treba da uprostiš svoj život, tako što ćeš odbaciti ono što ne donosi plod. Moraćeš naučiti da odbiješ neke stvari i da ne osjećaš krivicu zbog toga. Neka ti život bude dovoljno lak da radost može da uzleti!

Govorim iz iskustva. Prije bih se stalno žalila, govoreći: „Kako bilo ko može da održi ovaj korak? Potreban mi je odmor. Nikada nemam mira!“ Jednog dana, osjetila sam da mi Gospod govori: „Ako nemaš želju da radiš sve to što radiš,

onda nemoj. Ti si ona koja sebi pravi raspored.“ To je bio oslobođajući momenat. Nisam više morala pokušavati sve da stignem, a nisam se više osjećala krivom zbog toga. Razmisli o ovome: Da li bi Bog radije bio zauzet ili radostan? Mislim da znamo odgovor, pa hajde da uradimo ono što možemo, a da nam naše obaveze ne postanu teret.

Uspori i nađi vremena za aktivnosti koje su zaista važne. Provedi vrijeme sa porodicom i priateljima. Uživaj u svom odnosu sa Gospodom. Izdvoji vrijeme za sebe – uživaj u nekom hobiju.

Jako je važno usporiti i uživati u životu. Ako si suviše zauzet da bi bio sretan, i ako si tako zauzet da se osjećaš beznađešno, vrijeme je za promjenu. Uprosti svoj raspored i počni da zaista uživaš u životu kojim te je Bog blagoslovio.

Postoji nebrojeno mnogo stvari koje nas usporavaju. Spomenula sam tri, ali predlažem ti da ih dodaš još, na osnovu svojih vlastitih situacija. Bilo da je neka od ove tri stvari ili neka druga, nemoj dopustiti da te ove laži neprijatelja više pritišću.

## Najbolji izvor radosti koji ćeš ikada naći

Da li si se ikada molio i rekao: „Gospode, ne znam šta nije u redu sa mnom. Izgubio sam radost i ne znam u čemu je problem?“ Jesi li ikada toliko očajno želio da čuješ Boga, pa počneš da gledaš u dnevni raspored čitanja Svetog Pisma ili nasumično otvoriš Bibliju nekoliko puta da vidiš možeš li da nađeš neki stih koji će te ohrabriti? Ili pogledaš hrišćanski TV kanal nekoliko minuta da vidiš ima li nekih upustava od Boga za tebe?

Jedne večeri sam toliko sluđeno tražila bilo šta što bi me spriječilo da potonem u očaj koji sam osjećala. Otišla sam do kutijice u kuhinji u kojoj sam držala stihove i izvukla sam ovaj iz Rimljanima 15:13:

A Bog nade neka vas ispuni svakom radošću i mirom u vjeri, da silom Svetoga Duha imate nade u izobilju.

Odmah sam shvatila da mi je Bog pokazao da sam izgubila radost jer sam postala negativna i prestala sam se nadati. Uvijek vjeruj u Boga i u Njegova obećanja! Bez obzira na to što se dešava, koliko boli ili koliko dugo traje – uvijek vjeruj! Ako vjeruješ, prelivaćeš se nadom! Ta nada će ti biti sidro za dušu. Umjesto da budeš nezreli hrišćanin kog nosi svaka promjena, bićeš zreo vjernik kojem Bog uvijek može vjerovati da će ga uvijek dobro predstavljati.

## Podigni nadu!

Nada i sreća nisu namijenjene samo za druge ljudе; ovo su stvari koje Bog želi da i ti iskusiš u svom životu. Ne dopusti da ti neprijatelj ukrade radost. Kao Božijem djetetu, dato ti je obilje blagoslova. Svaki dan se osvrni na to koliko si blagosloven i dopusti da ti ovo shvatanje donese radost.

Biće stvari u životu koje će te pokušati usporiti, spriječavajući te da iskusiš sve ono što Bog ima za tebe. Ali ni dana više ne moraš se držati ovog tereta. Svaku brigu možeš prebaciti na Gospoda i zauzvrat primiti Njegovu radost. Ustani i probudi svoje nade. Neka nada bude sidro tvoje duše. To je pouzdano i čvsto sidro koje se ne može polomiti, ko god da stane na njega. (Jevreji 6:19). Kakvo obećanje!

## ČETVRTI DIO

### Nada je ovdje

.....

*Jer ti si moja nada, Gospode, Gospode;  
moje pouzdanje od moje mladosti.*

*Psalam 71:5*

„Sada“ je jedna od najvažnijih riječi u Bibliji. Isus je rekao, „Ja jesam“, i mislio je Ja sam sada ovdje. Ne moraš me tražiti u nekom drugom vremenu! Ja sam ovdje! Nada je ovdje!

Ono što svijet naziva nadom, nije prava nada. Ona je slaba i mutna i u stvari joj nedostaje sila. Ona uvijek potiskuje u budućnost sve dobro što bi se moglo dogoditi. Sve je neodređeno. Ništa nije jasno. Ništa nije sada!

Kao Božija djeca, imamo tu privilegiju da vjerujemo da Bog radi *sada*, i da se nešto dobro događa u duhovnom svijetu i vrlo uskoro ćemo vidjeti ostvarenje toga. U Božijem domaćinstvu, prvo moramo vjerovati, a onda ćemo vidjeti. Nada koja je u svijetu više – manje nejasno „želi“ da se stvari promijene na bolje, ali tu nema istinske nade ni prave vjere da će se nešto dogoditi, sve dok ne vide nešto što to dokazuje.

Sjetimo se da Avram nije imao nikakav vidljiv razlog da se nada, ali je on nastavio da se nada u vjeri da će imati dijete, kao što mu je Bog i obećao. On je „iščekivao“ tu dobru stvar koju mu je Bog obećao. Njegovo iščekivanje je bilo stvarno i bilo je *sada*.

U ovom dijelu knjige, želim da ti pomognem da živiš u sa-  
dašnjem trenutku, a ne u prošlosti niti u budućnosti. Želim  
da vjeruješ da upravo sada Bog radi u tebi i tvom životu.

A vjera je pouzdanje u ono čemu se nadamo,  
osvjedočenje o stvarnosti koju ne vidimo.

Jevrejima 11:1

## POGLAVLJE 14

# Ne čekaj sutra

*Uslišio sam te u času povoljnog i pomogao ti na dan spasenja.*

*Evo, sada je najpovoljniji čas! Evo, sada je dan spasenja!*

2. Korinćanima 6:2

„Juče je istorija, sutra je misterija, danas je dar od Boga i zato ga nazivamo sadašnjost.“

— Bil Keane

Autor Leo Buscaglia jednom je ispričao priču o svojoj majci i događaju koji je nazivao „večera očajavanja.“ To je bilo jedne večeri kad se njegov otac vratio kući i rekao da su svi izgledi da će bankrotirati, jer je njegov partner potrošio fond firme. Buscaglijeva majka je izašla i prodala nešto nakita da kupi hranu za raskošnu gozbu. Ostali članovi porodice su je izgrdili jer je prodala nakit i potrošila toliko novca. Ali ona im je rekla: „Vrijeme za radost je sada, kada je najviše trebamo, a ne sljedeće sedmice.“

Pozdravljam odvažan čin i mudrost njegove majke. Nada i radost su dvije stvari koje nikada ne smijemo odlagati. Mnogi ljudi provedu svoj život čekajući „sutra.“ Oni kažu: „Pa, možda će sutra biti bolje,“ ili: „Prepostavljam da uvijek postoji i sutra,“ ili: „Samo da mi je izgurati ovaj dan do sutra.“

**Nada i radost su dvije stvari koje nikada ne smijemo odlagati.**

Dok odlažu nadu za sutra, oni ni danas ne doživljavaju nadu, a to nije život koji nam je Isus dao umrijevši. Isus želi da uživamo u svojim životima danas i svakog dana.

Mir, radost, sreća, pouzdanje, hrabrost, zdravlje, zdrav um, milost, blagoslovi, jak brak – ovo su sve stvari koje Bog želi da iskusiš danas. Svaki put kada misliš: „*Pa, valjda je danas propao dan; možda će sutra biti bolje,*“ ti propuštaš najbolji Božiji plan za svoj život. Ako je Bog s tobom danas – a jeste; On je uvijek s tobom – ne moraš čekati neko vrijeme u budućnosti da se počneš radovati. Možeš iskusiti Njegov pobjednički, obilan život ispunjen radošću još danas. Apostol Pavle je rekao da dok je još DANAS, ne treba da nam otvrdnu srca prema Njegovim obećanjima (Jevreji 3:15). Bog radi u našim životima *danas*, i On želi da vjeruješ u to danas i da se raduješ *danas!*

Psalam 118:24 kaže: „Ovo je dan koji je Gospod načinio; radovaćemo se i veseliti u njemu.“ Bog je sa razlogom stvorio ovaj dan. On želi da uradi nešto posebno. Da li si spreman da primiš to? Ljudi koji su puni nade rade upravo ono što ovaj stih kaže. Oni se raduju i vesele. Kakvo god da je vrijeme napolju, kako god se oni osjećali, šta god drugi ljudi govorili, koliko god da je toga što im je na putu i šta god se događa na vijestima – ljudi koji imaju nadu kažu: „Bog je ovaj dan stvorio sa razlogom – radovaču se i veseliti. Sretno ču iščekivati da Bog uradi nešto dobro u mom životu danas!“

Podijeliću jednu svoju priču: 1976. godine sam postala očajna zbog okolnosti u svom životu. Mislila sam da mi se nikada ništa dobro neće dogoditi. Iako sam bila hrišćanka, nisam iskusila nikakvu pobjedu u životu. Dok sam se jednog februarskog jutra te godine vozila na posao, u očaju sam vapila Gospodu i mislim da sam tada prvi put u svom hrišćanskem hodu iskusila pravu vjeru. Bog je u moje srce

stavio uvjerenje da se On brine za moju situaciju. Ništa se tog momenta nije promijenilo u mojim okolnostima, ali tada sam dobila potpuni mir. Bila sam ispunjena sretnim iščekivanjem da će se tog dana dogoditi nešto dobro. Imala sam pravu nadu! Nije mi bilo važno šta je Bog uradio, ni kad je to uradio, jer u svom srcu sam znala da je to već urađeno. Otvoreno mogu reći da su se od tog momenta stvari u mom životu počele mijenjati. Nisu bile savršene, ali malo po malo, dan po dan, dobre stvari su počele da se dešavaju.

Znam da se sada možda pitaš: „Joyce, šta ako povjerujem da će se nešto dobro dogoditi danas, a ne dogodi se?“ Prvo, dopusti mi da ti kažem da čvrsto vjerujem da se nešto dobro dogoditi svaki dan, ali mi to možda ne vidimo. Drugo, to dobro što se dogodi ne mora biti ono čemu smo se nadali, ali nuda nam je dala bolji dan od onog koji bismo imali bez nje, pa je i samo to već dobra stvar. I posljednje, reći ću ti da i sutra treba da ustaneš sa nadom, vjerujući da će se nešto dobro dogoditi toga dana. Koliko god dana to morao da radiš, nastavi i vidjećeš da je Bog vjeran!

## Dosljednost je ključ

Nedostatak dosljednosti je jedan od naših najvećih neuспjeha. Jedan od razloga što mnogi ljudi nekada dolaze do velikih pobjeda, a nekada dožive velike padove je zbog njihove svakodnevne nedosljednosti. Kada bi odlučio da budeš dosljedan svakoga dana, bio bi zadvljen koliko bi promjena donio u svoj život. Ako nešto samo jednom uradimo ispravno, to ne mijenja naše živote. Treba da budemo dosljedni u tome! Ako si jedan dan pun nade, a sljedećeg dana nisi, neće ti se svidjeti rezultati. Ako vjeruješ da je istina ovo čemu te učim o nadi i odlučiš da živiš tako, onda budi dosljedan u tome. Radimo ono što je ispravno jer je to ispravno! Mi smo posvećeni!

## Pusti balon

Jednom sam slušala o nekoj konferenciji koja je održana u crkvenom auditorijumu. Ljudi su dobili helijumske balone i rečeno im je da ih puste u nekom trenutku u toku službe, kada osjete radost u srcima. Tokom službe baloni su se podizali do visokih plafona, ali kada je služba bila gotova, još trećina balona nije bila puštena.

Nije li ovo nevjerovatno? Trećina ljudi je toliko dugo čekala, da je propustila šansu da se pridruži slavljenju i pusti svoje balone. Kao djeca Božija koja imaju šansu da žive puna nade i radosti, ne moramo čekati neko vrijeme u budućnosti da uživamo u životu koji nam je Bog dao – možemo uživati u njemu sada.

Toliko ljudi ima takav mentalni sklop, da bi bili veoma sretni i uživali bi u životu *kada...* Kada odu na odmor, kada se udaju ili ožene, kada napreduju u poslu, kada dobiju dijete, kada počnu više zarađivati, kada im djeca porastu, kada im se bračni drug počne bolje ponašati prema njima – razumjeli ste.

Mogu se poistovijetiti sa ovim, jer bilo je trenutaka kada nisam uživala u dnevnim obavezama i aktivnostima, iako sam voljela biti u službi. Morala sam naučiti da živim u trenutku i da uživam u onome što je Bog činio u meni i kroz mene *sada*, a ne *kada* se konferencija završi, ili *kada* se neki projekat završi ili *kada* budem mogla otići na odmor. Bog mi je pokazao važnost prihvatanja i uživanja u onome što On radi sada.

Isto ovo važi i za tebe. Uvijek će biti neko *kada* u životu. Možda te djeca izluđuju danas, možda ti je šef danas neraspoložen, možda te nešto boli, možda se loše osjećaš, ali ništa od ovoga ne mijenja činjenicu da je Bog sa tobom upravo

sada i da ima dobar plan za tvoj život... a danas je dio tog plana.

## Najbolje od današnjeg dana

Psalam 71:14 kaže: „A ja će se stalno nadati i hvaliti te još više i više.“ Ključna riječ u ovim stihovima o nadi je „stalno.“ Osoba koja je puna nade svakako ne čeka sutra da bi očekivala nešto dobro od Boga. Takva osoba se stalno nada, bira da se nada svaki dan... tokom cijelog dana.

**Osoba koja je puna nade svakako ne čeka sutra da bi očekivala nešto dobro od Boga. Takva osoba se stalno nada, bira da se nada svaki dan.**

Predložiću ti nekoliko načina da živiš u stalnoj nadi, da učiniš da ti svaki dan bude ispunjenim sretnim iščekivanjem dobrog.

### *Svaki dan moli neku odvažnu molitvu*

Ako imаш nadu, onda se ne bojiš da vjeruješ u nešto veliko. U stvari, volim reći da je nada platforma na kojoj stoji vjera. Zato je dobra ideja danas doći Bogu sa odvažnom molitvom. Ne možeš danas živjeti u iščekivanju, ako nisi čak imao vjere ni da tražiš nešto.

Šta god da ti je u srcu, ako se slaže sa Božijom Riječju, usudi se da tražiš sa pouzdanjem, a onda čekaj sa iščekivanjem. Bog voli odvažne molitve. Uslišavao ih je stalno u Bibliji, a uslišava ih još uvijek danas. Praktikuj nadu, stoj u vjeri i traži od Njega nešto odvažno i uradi to SADA!

## *Svaki dan uradi nešto zabavno*

Nekada izgubimo nadu jednostavno zato što izgubimo radost. Umjesto da uživamo u životu svaki dan, mi sagorimo zbog računa i obeshrabrimo se zbog dilema. Zašto ne bismo odlučili da svaki dan uradimo nešto zabavno? To ne mora biti dnevni put u Disneyland. To može biti nešto jednostavno kao što je kafa sa prijateljem, gledanje komedije sa porodicom ili šetnja u parku – bilo šta što ti donosi osmijeh na lice.

Ako želiš da si stalno ispunjen nadom, planiraj zabavne stvari koje će ti donijeti osjećaj iščekivanja. Nada i radost idu zajedno i zato isplaniraj nešto zabavno i iskoristi današnji dan uživajući u Božjoj prisutnosti i u svakom blagoslovu koji ti On da.

Svima nam trebaju zabavne i ugodne aktivnosti kojima ćemo se radovali. Danas ću pisati nekoliko sati. Takođe planiram da odem na kafu sa nekim prijateljima malo kasnije, da malo kupujem i da večeras izađem na večeru. Kada planiram dan, uvijek uključim nešto čemu ću se moći radovali. Ne čekaj penziju da bi uživao u životu. Uživaj u životu SADA!

## *Blagoslovi bar jednu osobu svaki dan*

Volim da potražim ljude koje bih mogla blagosloviti. Takođe je blagoslov blagosloviti druge! Ako zaista želiš da uživaš u svom danu, predlažem ti da nekom drugom pomogneš da uživa u svom. Možda možeš nekoga počastiti ručkom, dati mu ohrabrujući kompliment ili mu reći koliko ti je važan i da ga cijeniš.

Zamoli Boga da ti pokaže kako nekome možeš da budeš blagoslov i onda prati Njegova uputstva. Dok pokušavaš da ispunиш potrebu druge osobe, bićeš iznenađen kako je lako nadati se i vjerovati da će Bog ispuniti tvoje potrebe. Ne odlazi da nekome budeš blagoslov. Uraditi to danas! Budi blagoslov SADA!

## *Svaki dan zapiši bar jedan način na koji te je Bog blagoslovio*

Nada buja u atmosferi zahvalnosti. Ako želiš da stalno živiš u nadi, onda svaki dan provedi tražeći na koji način te je Bog blagoslovio. Iznenadićeš se koliko ćeš toga naći. Što bolje shvatiš kako te Bog SADA blagosilja, bićeš još ispunjeniji nadom da ćeš vidjeti i veće stvari.

Na kraju svakoga dana, zapiši ove stvari. Otvori dnevnik „svjedočanstvo nade.“ Nekada ćeš zapistati jednu ili dvije stvari, a nekada 10 ili 20, koje će ispuniti cijelu stranicu. Počni da bilježiš Božiju dobrotu u svom životu i vidi kako je lako nikada ne živjeti ni dana bez žive nade.

## **Podigni nadu!**

Neka se nada podigne. Ne moraš čekati danima, sedmica, mjesecima ili godinama da očekuješ od Boga da radi. On je s tobom i On već radi u tvom životu. Moli se za veću svijest o tome da nikada ne propustiš da vidiš ono što Bog radi u tvom životu.

Biće iskušenja da živiš u odlaganju i u kada umjesto u sili sada. Ne dopusti da te poteškoće dana navedu da odlažeš iščekivanje Božije dobrote. Kreni i podigni nadu.

Nešto veliko bi se moglo dogoditi danas. Neki probaj bi se danas mogao dogoditi. Ne čekaj sutra da povjeruješ u ovo – vjeruj još danas.

**Biće iskušenja da  
živiš u odlaganju  
i u kada umjesto  
u sili sada.**



## 15. POGLAVLJE

# Božija perspektiva

*Blagosloven je čovjek koji se pouzdaje u Gospoda  
i kojemu je Gospod pouzdanje!*

*Jeremija 17:7*

„Bog je jedini koji od doline nevolja može da načini vrata nade.“

— Catherine Marshall

Nekada prosto ne znaš kako bi se situacija mogla razvijati. Da li se ikada ovako osjećaš? Svaki dan čitaš svoju Bibliju, pokušavaš da zadržiš pozitivan stav, imaš dobre prijatelje koji ti u tome pomažu, ali koliko god se trudio još uvijek si obeshrabren. Jednostabno nemaš onu nadu o kojoj govorimo u ovoj knjizi. Naravno, ima dana koji su ispunjeniji nadom nego ostali, ali ne bi se nazvao osobom punom nade.

Nisi jedini koji se tako osjeća. Mnogo ljudi se bore da nađu nadu – i mnogo njih se bori da ostane u nadi. Nada ne može da zavisi od okolnosti; mora biti zasnovana samo na Hristu. Nada ne dolazi samo zato jer si tako poželio. Nada je nešto što se mora njegovati i razvijati, a redovno proučavanje Božije Riječi je hrana koja joj je potrebna. Ne moraš je čekati – nada je već ovdje. Još danas možeš da primiš nadu. Nemoj čekati da je osjetiš, nego jednostavno zauzmi stav da je život bez nade očajan i budi pun nade SADA! Očekuj da se danas nešto dobro dogodi!

Jedna od najvažnijih stvari koje možeš uraditi da bi živio život pun nade, život ispunjen sretnim iščekivanjem Boga, je da dobiješ Božiju perspektivu. Dok god posmatraš situaciju u svom životu kroz prirodnu, tjelesnu perspektivu, bićeš u iskušenju da se osjećaš bespomoćno i poraženo. Ali kada počneš posmatrati svoj život na onaj način na koji ga Bog posmatra, nada će da preuzme stvar u svoje ruke.

Ovo se dogodilo Avramu. U Postanju 15, Avram se osjećao prilično beznadežno. Bog je obećao Avramu da će biti otac mnogih naroda (vidi Postanje 12:2) i da će zemlju Kanan dati njegovom potomstvu (vidi Postanje 12:5-7), ali Avram prosti nije mogao da vidi kako će se to razvijati. Volio je Boga i želio je da ima nadu, ali nije imao djecu. Kako će Bog od njega napraviti veliki narod ako on nema čak ni nasljednika?

U Postanju 15:2-3, Avram je molio jednu od onih iskrenih molitvi kakvu svi molimo s vremena na vrijeme. Rekao je: „Gospode, Gospode, šta mi možeš dati kada sam bez djece...“ Avram je bio frustriran. Gledao je na stvari iz svoje perspektive, a njegova perspektiva nije nudila mnogo nade.

Znajući da Avram nije video cijelu sliku, Bog je učinio nešto divno. Postanje 15:5 kaže:

I izvede ga napolje i reče: „Pogledaj na nebesa i izbroj zvijezde, ako ih možeš izbrojiti“. I reče mu: „Tako će biti tvoje potomstvo.“

Usred Avramove velike muke, Bog je znao šta je Avramu potrebno – trebala mu je promjena perspektive. Stajao je tamo, beznadežno se moleći Bogu u okvirima male slike – jednog potomka – a sve vrijeme Bog je planirao da ga blagoslovi potomstvom toliko brojnim da se ne može izbrojati. Zato ga je Bog izveo i dao mu novu perspektivu: nebo puno zvijezda.

Onog momenta kada je Avram dobio Božiju perspektivu, njegove nade su oživjele. Rimljanima 4:18 kaže:

„Protivno svakoj nadi, Avram se nadao i povjerovao je da će postati otac mnogih naroda, kao što je rečeno: 'Toliko će ti biti potomstvo.'“

Avramova priča je toliko ohrabrujuća. Govori mi da čak i najbolji od nas mogu da se obeshrabre s vremena na vreme. Prirodno je da sumnjamo onda kada ne možemo da vidimo kako se neko obećanje može obistiniti. Ali ne moramo se predati ovim osjećajima sumnje i obeshrabrenja. Bog želi da nam da svoju perspektivu da bi nas ispunio nadom i vjerom. Umjesto uske perspektive, Bog želi da nam pokaže veliku sliku – Njegovu sliku – jer Njegova perspektiva sve mijenja.

**Bog želi da nam pokaže veliku sliku – Njegovu sliku – jer Njegova perspektiva sve mijenja.**

## Stavi Božije naočale

Hajde da stavimo ono što ja nazivam „Božijim naočala-ma“ i da pogledamo na neke stvari iz Božije perspektive. On stvari vidi mnogo drugačijima nego što ih mi vidimo, jer ih On vidi od početka do kraja.

Kako te Bog vidi? On te voli više nego što ćeš ikada moći da razumiješ i On ima dobar plan za tvoj život. Nikad nisi sam jer On je s tobom sve vrijeme. Božije oproštenje je veće od bilo kakvog grijeha koji si učinio. Njegova milost se obnavlja svakoga dana. Kao vjerniku, Bog ti je dao moć da ne moraš da živiš poraženički život. U Hristu si stvoren potpuno novim, dat ti je novi život i možeš odbaciti sve ono što je iza tebe i radovati se stvarima koje su pred tobom. Kada znaš ko

si u Hristu – i kako te Bog vidi zbog žrtve svoga Sina – to će promijeniti način na koji živiš.

Bog je pogledao sve što je stvorio i reče da je dobro (Postanje 1:31). Ti si dio toga, što znači da si i ti dobar. Ali nekada nam je teško da u to povjerujemo. Ne govorim o tvojoj tjelesnosti. Apostol Pavle je rekao: „Znam, naime, da u meni, to jest u mom tijelu, ne prebiva dobro.“ (Rimljani 7:18). Naša tjelesnost je grešna i svi mi pravimo greške. Kada Bog kaže: „Ti si dobar,“ On govori o novom, nanovo rođenom tebi!

Jer, mi smo njegovo djelo, stvoreni u Hristu Isusu za dobra djela koja je Bog unaprijed pripremio da ih činimo.

Efescima 2:10

Veoma je važno da razumijemo šta znači novo stvaranje i da se identifikujemo sa tim. Mnogi ljudi se loše ponašaju jer misle da su loši – *vjeruju* da su loši. Ljudi često ostaju u grešnom načinu života, jer ne vjeruju da su kroz Hrista od toga oslobođeni. Gledaju na isti način kao i ranije i ne razumiju pravu silu novog rođenja – da ako je neki čovjek u Hristu, on je novo stvorenje, staro je prošlo i sve novo je nastalo (vidi 2. Korinćanima 5:17).

Koliko god da je teško razumjeti ili istinski vjerovati, Bog nas sada vidi ovako pravednima kroz Isusa.

Njega, koji nije učinio grijeh, Bog je radi nas učinio grijehom, da u Njemu budemo (da smo viđeni kao, primjerici) Božija pravednost (što treba da budemo, prihvatljivi, odobreni i u ispravnom odnosu sa Njim, Njegovom dobrotom).

2. Korinćanima 5:21

Kao za nekoga ko se većinu života osjećao „pogrešnim“, za mene je učenje doktrine pravednosti kroz Hrista bila i jeste zadivljujuće oslobađajuća i divna. Volim da pomognem ljudima da ovo shvate, da bi prestali da sami sebe preziru, jer smatraju da nisu savršeni u svakodnevnom životu. Naš ispravan stav uz Boga nije zasnovan na onome što mi radimo, nego na onome što je Isus uradio.

Dok sve više učimo o ljubavi, prihvatanju i Božijoj milosti, primjetićemo da nada postaje naše stalno društvo. Zaista se ne mogu sjetiti kada sam posljednji put bila beznadežna! Možemo naučiti da uvijek vjerujemo Bogu i da imamo pouzdanje da dok rastemo i mijenjamo se, Bog vidi našu ljubav i posvećenost Njemu i vidi nas u ispravnom odnosu sa Njim.

Postoji velika razlika u onome ko si i šta radiš. Zato ohrađujem ljude da razdvoje svoje „ko“ od svoga „radim“. Ti si dijete Božije. Ti si nanovo rođen. Ti si ispunjen Njegovim Duhom. Umjesto da gledaš na svoju tjelesnost, pogledaj iz Božije perspektive i pogledaj na svoj duh. Pogledaj se u ogledalu Božije Riječi i oduševi se zbog onoga ko si u Hristu Isusu.

Želim da i u iskušenjima imaš Božiju perspektivu. Pogleđaj ih na onaj način na koji ih Bog vidi. On vidi da su ona pri-vremena. Nijedan problem ne traje vječno i zato drži svoje nade visoko jer proboj je bliži nego što misliš. Kada gledaš kroz Božije naočale, moraš reći: „Ovo neće vječno trajati i nadživjeću i ovo!“

Kada upadneš u neko tijesno mjesto i kada je sve protiv tebe toliko da ti se čini da ne možeš izdržati više ni minute, ne odustaj tada, jer upravo to je mjesto na koje će doći plima.

– Harriet Beecher Stowe

Bog želi da uz Njega ideš cijelim putem. Naš je izbor da li ćemo nastaviti ili odustati. Bog nam obećava, ali naš je izbor da li ćemo čvrsto stajati i čekati da prođe neka oluja u našem životu. Naravno da nam Bog pomaže. Daje nam milost, snagu i ohrabrenje, ali ipak mi moramo odlučiti da li ćemo se boriti ili odustati. Jedna od prednosti iskušenja je da ih Bog koristi da nas ojača za teškoće.

Ne boj se (jer nemaš čega) jer ja sam s tobom; ne budi uznemiren jer sam ja tvoj Bog. Ojačaću te, da pomoći će ti. Poduprijeću te desnicom svoje pravde.

Izaija 41:10

Ovo su sjajni stihovi koji nam govore da i kada prolazimo kroz nešto teško, Bog će to da izvede na dobro. On radi mnoge stvari, a jedna od njih je da nas čini jačim. Ojačani smo za teškoće. Drugim riječima, stvari koje nas nekada uznemire i uplaše ili zabrinu ne treba da nam smetaju.

Osoba koja vježba u teretani sa tegovima će dobiti mišićnu masu, ali jednom kada dosegne određen nivo, jedini način da dobije još mase je da diže teže tegove. Kada od Boga tražimo poboljšanje u bilo kojoj oblasti života, možemo očekivati da će On uraditi nešto u nama prije nego što uradi nešto za nas. Reklo bi se da treba da se naviknemo da podižemo teže tegove u duhu.

Na primjer, možemo se moliti da sve više obilujemo u ljubavi, ali to takođe može značiti da ćemo biti okruženi sa sve više ljudi koje je teško voljeti. Sjećam se kada sam jednom molila za sposobnost da volim one koje je teško voljeti! Nakon nekoliko sedmica, gundala sam Bogu u molitvi o teškim ljudima s kojima sam se susrela, i On me podsjetio da neću moći da naučim da volim ako sam okružena samo onim ljudima koji me nikada nisu iznervirali.

Kada se molimo da nas Bog više koristi, sjetimo se da je Pavle rekao da su mu se otvorila velika i za rad povoljna vrata, ali da je protivnika mnogo (1. Korinćanima 16:9). Satana se protivi svemu što je dobro. On mrzi rast i napredak bilo koje vrste, ali ako ostanemo čvrsti, Bog će nas oslobođiti i pomoći će nam da duhovno rastemo kroz teškoće.

Ovo ne znači da je Bog prouzrokovao naše probleme, ali svakako ih koristi da nam pomogne na mnoge načine. Kada se nađeš u bolnoj ili izazovnoj situaciji, pokušaj da razmišljaš o onom dobrom što dolazi iz toga, umjesto samo o tome koliko je situacija teška. Kada nema razloga da se nadaš, nastavi da se nadaš u vjeri, kao što je i Avram uradio.

Iz Božije perspektive, dobre stvari se događaju čak i kada čekaš da dođe do nekog probaja ili oslobođenja. Ti rasteš duhovno, razvijaš strpljivost, na testu si, a kada ga prođeš doživjećeš napredak. I veličaš Boga jer Ga sada voliš isto onoliko koliko ćeš Ga voljeti kada se tvoje okolnosti promijene.

Iskušenja su vrijedna. Ona bole, ali su vrijedna! Svi kroz njih prolazimo, ali ne prolazimo svi kroz njih sa uspjehom. Često kažem da nakon testa neki ljudi imaju svjedočanstvo, ali neki drugi imaju samo jadikovanje.

## Nada kao navika

Da bi stekao Božiju perspektivu, moraćeš da razviješ neke nove navike u svakodnevnom životu. Kada čuješ riječ „navika“ možda ćeš pomisliti na neke loše navike (jer danas se najviše govori o lošim navikama), ali i dobre navike se mogu steći. Najznačajnije je što nada može postati navika. Nada je nešto što vremenom možeš razviti do te granice da postane tvoj prirodan stav.

Stav očekivanja – traženja – težnje i iščekivanja da će Bog uraditi nešto sjajno – nije nešto što će se samo po sebi nametnuti. Ovo je mentalitet nade koji će namjerno morati da razvijaš sve dok ne postane tvoja druga priroda... navika. Jedan od načina na koji to možeš da uradiš je da podsjetiš sebe da treba da očekuješ dobre stvari. Možda po cijeloj kući treba da postaviš natpise koji će te podsjetiti da treba da imaš srce puno nade. Vjerujem da kada razvijamo novu naviku, treba da uključimo sve moguće metode. Dobre navike ne ostavljaju prostora lošim, tako da ako imamo naviku nade, u našim srcima i mislima neće biti mjesta za beznađežnost, obeshrabrenje i očaj.

Habakuk 2:2 kaže:

Tada mi odgovori Gospod i reče: „Piši viđenje, ureži ga na ploču, da se može lako čitati.

Zapiši svoju viziju. Ne mora to biti ništa dugačko. Napravi male natpise koji se čitaju „lako i brzo“ dok ti i članovi porodice prolazite pored njih. Zamisli koliko više nade bi imao kada...

- Ustaješ ujutru da opereš zube i na ogledalu u kupatilu vidiš natpis: „Nada je važna. Ne zaboravi da vjeruješ da će Bog danas uraditi nešto divno u tvom životu.“
- Ideš kroz hodnik i vidiš natpis: “Nada je sretno iščekivanje dobrog. Budi sretan. Bog za tebe čuva dobre stvari.“
- Ideš u kuhinju da napraviš doručak, i vidiš natpis iznad šporeta: „Raduj se. Danas Bog kuva nešto fantastično.“
- Uđeš u auto da ideš na posao, odvedeš djecu u školu ili da se nađeš sa prijateljem na kafi i pročitaš natpis: „Drži svoje nade. Bog je s tobom danas i uživa u tome da bude dobar prema tebi.“

Ne znam za tebe, ali ja već dobijam nadu! Ako želiš da živiš život nade, uradi šta god je potrebno. Mnogo je stvari tokom dana koje pokušavaju da ti ukradu nadu. Odluči da ćeš podsjetnicima na nadu nadjačati „kradljivce nade“. Svuđa ih polijepi! Ovo je posebno važno ako težiš ka tome da budeš negativan ili depresivan ili ako prolaziš kroz posebno težak period.

## Što si više, to bolje vidiš

Moram priznati da nisam vrstan šetač. Ti možda jesi, ali meni to nije omiljena aktivnost. Radije bih provela vikend družeći se sa djecom, nego da istražujem šumu ili planinske stazice. Ali rečeno mi je da kada se izletnici izgube i pokušavaju da se vrate na pravi put, onda idu ka višoj nadmorskoj visini. To im daje bolju perspektivu. Bilo da moraju da se popnu na drvo ili pojure uz brdo ili savladaju veliku gomilu šljunka, izletnici idu ka većoj visini. Znaju da što više idu, da lje mogu da vide.

Misljam da je ovo istina za tebe i za mene danas. Nekada je teško vidjeti gdje idemo jer imamo ograničen vid. Okruženje nas može zbuniti i možemo biti nesigurni gdje treba da idemo, jer nemamo dobru perspektivu. Nada i pravci su umanjeni ranijim neuspjesima, maglom niskih očekivanja i klisurama očaja.

Da bismo dobili Božiju perpektivu, treba da idemo više. Treba da propješačiš pored nezahvalnosti; da se popneš iznad sumnji i obeshrabrenja. Ako izabereš viša očekivanja i više nade, vjerujem da ćeš početi da dobijaš novu perspektivu – božansku perpektivu. A kada se to dogodi, bićeš u mogućnosti da vidiš dalje nego ikada do sada.

## Podigni nadu!

Možeš odrediti kakvim životom ćeš živjeti na osnovu onoga kako gledaš na sebe i na situacije u svom životu. Ako gledaš na mane i neuspjehe, misleći da je to ono što te definije, nećeš se nadati da će Bog mnogo uraditi u tvom životu. Ako gledaš na svoje probleme i pričaš o njima sve vrijeme, činiće se nemogućim da se prevaziđu i mislićeš da je izuzetno teško ne odustati od nade.

Na sreću, postoji i druga perspektiva. Božija perspektiva za tebe i tvoj život je bolja perspektiva... i ona je jedina koja je važna. Kada te Bog gleda, On je pun ljubavi i On je već sastavio divan plan za tvoj život. Jeremija 29:11 kaže: „Znam misli koje mislim za vas, govori Gospod, misli mira, a ne nesreće, da vam dam izlaz i nadu.“ Zato kreni i probudi svoje nade. Bog te je blagoslovio ranije i obećava da će te blagosloviti i ubuduće. Svaki put kada nisi siguran kako će se sve razvijati, samo izađi po noći i pogledaj ka zvijezdama. Bog je održao svoje obećanje Avramu i On će održati svoje obećanje dato i tebi.

## 16. POGLAVLJE

### Izbor je tvoj

*Ne budite zabrinuti ni za šta, nego u svemu,  
molitvom i molbom sa zahvaljivanjem,  
jasno pokazujte Bogu za šta ga molite.  
I Božiji mir, koji prevaziđa svako razumijevanje,  
čuvaće vaša srca i misli u Hristu Isusu.*

*Filipljani 4:6,7*

„Nada je sila zbog koje si vedar u okolnostima za koje znamo da su očajne.“

— G. K. Chesterton

Divno je znati da je nada ovdje – na raspolaganju je i tebi i meni danas. Ali da bismo živjeli u ovoj istini, treba da porazimo neprijatelja nade: brigu.

Briga je ljuti neprijatelj nade. Nemoguće je biti pun i nade i brige istovremeno. Moraš izabrati jedno od to dvoje, jer su to dvije suprotnosti. Nada vidi sve dobre stvari koje se mogu dogoditi; briga se manifestuje kao zao nalogeštaj. Brine se da će se dogoditi nešto loše. Briga i strah rade ruku pod ruku i nameću nam mišljenje da kada bismo mogli shvatiti šta treba da uradimo povodom naše situacije, mogli bismo prekinuti poteškoće. Biblija nam ponavlja da je briga beskorisna i da ne treba da se brinemo, a istovremeno je ona jedno od najvećih iskušenja s kojima se borimo.

**Nemoguće je biti pun i nade i brige istovremeno.**

Potrebno je vrijeme da vjerovanje u sebe da ćemo riješiti probleme, preusmjerimo na potpuno vjerovanje Bogu da to uradi.

Naišla sam na ilustrovanu priču koja demonstrira ključ za prevazilaženje brige i života u punini nade...

Jedan pastor je bio na dugačkom letu iz jednog mjestu u drugo. Prvi znak za nadolazeće probleme bio je kada je zasvijetlio znak u avionu: „Vežite pojaseve.“ Onda, nakon nekog vremena, jedan smiren glas je rekao: „Trenutno nećemo služiti piće, jer očekujemo blage turbulencije. Provjerite da li su vam vezani pojasevi.“

Dok je pastor razgledao po avionu, postalo mu je očigledno da je većina putnika već tjeskobna. Kasnije je stjuardesa rekla: „Žao nam je što trenutno nismo u mogućnosti da poslužujemo ručak. Još uvijek očekujemo turbulenciju.“ I tada je nastupila oluja. Zloslutni udari gromova su se čuli povrh bučnog zvuka motora. Munja je osvijetlila tamno nebo i u samo nekoliko trenutaka, ovaj avion je bio kao plutani čep koji se kotrlja i prevrće po nebeskom okeanu. Jednog momenta avion je bio podignut na strašnim vazdušnim strujama, a sljedećeg je padao kao da će se razbiti.

Pastor je priznao da je dijelio nelagodu i strah ljudi u avionu. Rekao je: „Kako sam gledao po avionu, mogao sam vidjeti da su skoro svi putnici bili uznemireni i uzbuđeni. Neki od njih su se molili. Budućnost se činila zloslutnom i mnogi su se pitali da li će preživjeti oluji. Onda sam odjednom

ugledao jednu djevojčicu. Očito joj oluja ništa nije značila. Smotala je noge na sjedište i čitala knjigu. Sve u njenom malom svijetu je bilo mirno i u redu. Ponekad bi zaklopila oči, a onda bi ponovo čitala pa bi zatim ispružila noge, ali briga i strah nisu bili prisutni u njenom svijetu. Kada je avion bio nošen strašnom olujom, kada se teturao sad u ovu sad u onu stranu, dok se podizao i padao sa zastrašujućom surovošću, kada su svi odrasli bili na smrt prestrašeni, ovo divno dijete je bilo potpuno pribrano i bez straha.“

Pastor je teško mogao povjerovati svojim očima. Kada je avion napokon sletio na svoje odredište i kada su svi putnici požurili napolje, ne iznenađuje da je naš pastor želio da razgovara sa djevojčicom koju je posmatrao toliko dugo. Nakon što je prvo prokomentarisao oluju i ponašanje aviona, pitao ju je kako to da nije bila uplašena.

Dijete je odgovorilo: „Zato što je moj tata pilot i on me vodi kući.“

Kako divna slika načina na koji treba da nađemo mir, čak i usred oluje. Ova djevojčica nije bila ni uplašena ni tjeskobna, jer je vjerovala da njen tata zna šta radi. Svi ostali su se fokusirali na oluju i obuzele su ih briga i panika da neće preživjeti. Ali djevojčica nije ni pomislila na to. U njenim mislima, njen tata je sve vrijeme imao sve pod kontrolom – nije imala oko čega da se brine.

Ako želiš da prevaziđeš brigu u životu, ohrabrujem te da zauzmeš isti ovakav stav. Umjesto da pretpostavljaš ono najgore svaki put

**imaj vjere  
i opusti se.**

kada si u teškoćama, imaj vjere i opusti se. Biće turbulencija i ljudi oko tebe će se bojati, ali ti znaš nešto što oni možda ne znaju... tvoj Nebeski Otac je pilot. On te sigurno neće pustiti da padneš. On sve vrijeme drži stvari pod kontrolom.

## Mirnoća u oluji

Poslanica Rimljanima 8:24-25 ovo kaže o nadi:

Jer u toj nadi smo spaseni. A nada koja se vidi nije nada, jer ko se nada onom što već vidi? Ali ako se nadamo onom što ne vidimo, onda to strpljivo očekujemo.

Šta je strpljenje? To znači da su naše emocije pod kontrolom. Kada se neko emocionalno uzruje, možemo mu reći: „Strpi se, smiri se.“ Biblija nas uči da nam nada obezbjeđuje da čekamo na Boga sa stavom strpljenja i pribranosti. Drugim riječima, dok čekamo na Boga, možemo ostati mirni. Nećemo biti prestrašeni i uznemirenici, pa čak i ako smo u tom iskušenju, možemo ga prevazići prisjećajući se da nas Bog voli i da nas neće ostaviti niti napustiti. Nemoj samo da „pokušavaš“ da ne budeš uznemiren, nego se suoči sa brigama prisjećajući se kako te je Bog već oslobođio i znaj da će uraditi to ponovo. Možemo dobiti udarac, ali ne i izgubiti borbu!

Nada donosi jednu dozu mirnoće i pribranosti. Nada kaže: „Još ne vidim odgovor za moju situaciju ali vjerujem da Bog radi.“ Uvijek se sjeti da je briga potpuni gubitak energije. Iscrpljuje nas mentalno i emotivno i ne donosi nam apsolutno ništa dobro. Briga ne mijenja ništa osim nas samih! Zbunjuje nas kada sluđeno tražimo odgovor na probleme na koje samo Bog ima odgovor. Bog nije stvorio zbunjenost, On je Princ Mira. On želi da živiš u nadi, pa i kada se čini

da se sve oko tebe nekontrolisano vrti, ti da budeš čvrst u vjerovanju da će se nešto dobro dogoditi. Vjeruj, meditiraj nad ovim, izgovaraj to i ohrabri i druge koji se takođe suočavaju sa iskušenjima.

Zamisli par roditelja kako sjede na fudbalskoj utakmici svog sina. Jedan od njih se hronično brine, a drugi ne. Onaj koji se brine pretpostavlja ono najgore; drugi roditelj vjeruje najboljem.

Njihov sin je u drugom razredu. On trči okolo, udara loptu i super se zabavlja. Odjednom se okreće, natrči na suparničkog igrača, pada, i ogrebe koljeno. Naravno, pusti koju suzu i sva ostala djeca čekaju da neko sanira ogrebano koljeno. Oba roditelja gledaju na teren da se uvjere da im je sin dobro (a jeste) ali zbog njihove različite perspektive reakcije im se drastično razlikuju.

Roditelj koji je strpljiv i pribran pažljivo gleda dok trener prilazi djetetu. Ovaj roditelj se brine do neke granice, kao što bi i svaki roditelj, ali kada postane očigledno da je dječaku potreban samo zavoj, ovaj roditelj ohrabruje djete da uživa u ostatku utakmice dižući palac. Ovaj optimistični roditelj nije nesvjestan situacije, ali odbija da se uznemiri i iznervira zbog mogućnosti povrede. Ovo je zdravo i sretno iščekivanje dobrega, a ne bolesna i očajna strepnja da će se dogoditi nešto loše.

Drugi roditelj koji se brine ima potpuno drugačiju reakciju. Ovaj roditelj juriša na teren. Prije nego što trener ili sudija stignu da provjere da li je dječak dobro, ovaj roditelj je već tamo, sluđeno provjerava koljeno i pita se koliko će koštati liječenje u bolnici. Sjeti se da je ovo samo ogrebano koljeno, ali ovaj roditelj uopšte nije pribran. On pravi scenu, iznosi dječaka sa terena, žuri do automobila zamišljajući sina u gipsu i na štakama.

Možda si video odigravanje sličnih scena kod ljudi koje poznaješ (ili čak u svom životu). Ljudi koji se izgube na prvi znak nevolje obično kažu: „Pa, ja sam samo brižan,“ opravdavajući svoju reakciju, kao da je ona samo neka osobina. Ali briga je neprijateljsko oružje namijenjeno da ukrade i tvoju radost i radost svih oko tebe. To nije samo osobina; ona je zasnovana na strahu i nevjerovanju Bogu.

Ne moraš ići kroz život bojeći se najgoreg. Ne moraš gubitи kontrolу zbog svakog ogrebanog koljena. Možeš živjetи u nadi i sigurnosti da će sve biti u redu. U stvari, biće i više nego u redu – biće super! Bog drži sve pod kontrolom i kada vjeruješ u Njegov plan za svoj život, onda će nada, mir i pribranost biti prirodne reakcije. Ovo ne znači da se niko od nas neće suočavati sa neprijatnim situacijama, niti da će sve u životu biti onako kako mi budemo željeli, nego to znači da možemo izabrati da vjerujemo u najbolje ili u najgore – izbor je naš!

## Umirujući efekat nade

Svi ljudi, uključujući i hrišćane imaju veliki problem sa nedostatkom stabilnosti – a nedostatak stabilnosti proizilazi iz brige i straha. Zbog brige, ljudima emocije variraju i nekada im misli divljaju zbog toga. Nikada ne znaš sa čim ćeš se susresti kod članova porodice ili prijatelja koji su skloni brigama. Njihove emocije zavise od dešavanja u toku dana, pa su oni nepredvidivi i nepouzdani. Ne žele oni da budu ovakvi, nego to briga od njih čini. Oni bi željeli biti mirni, ali oni griješe jer misle da je jedini način da budu mirni taj da se nađu u prijatnim okolnostima.

Mnogo godina sam provela u emotivnim usponima i padovima i stalno sam se molila da mi Bog riješi probleme, da

bih mogla biti mirna. Sada znam da Bog želi da mi budemo mirni u oluji kao što je i Isus bio. Zašto Bog jednostavno ne otkloni naše probleme? Na kraju krajeva, On bi to mogao kada bi htio. Odgovor je jednostavno zato što smo u svijetu, a u svijetu će biti nevolja (Jovan 16:33). Da ne bismo imali nikakvih nevolja, morali bismo se maknuti iz svijeta. Za sada smo ovdje gdje jesmo. Nije uvijek lako biti ovdje, ali Bog nam je dao sve što nam je potrebno da ostanemo mirni i da uživamo u životu šta god se dešavalo.

## Budi realan

U svakom poglavlju ove knjige te ohrabrujem da očekuješ dobre stvari, ali to ne znači da treba da imamo nerealna očekivanja. Nerealno je očekivati da ljudi budu savršeni i da te nikada ne povrijede ili da će svaki dan u tvom životu biti onakav kakav ti želiš da bude. Ako vjeruješ da će se dogoditi dobre stvari, uspjećeš da nađeš put kroz životne oluje i da stigneš na odredište. Prolazimo kroz mnogo toga ali hvala Bogu da „prolazimo“. Taj prolazak nije uvijek prijatan, ali je bolje to nego ostati negdje zaglavljen i nikada ne uspjeti proći.

Ne budim se očekujući probleme, ali sam svjesna toga da se oni mogu pojaviti, pa sam već pripremila um da bih bila puna nade i pozitivnog očekivanja da će sve izaći na dobro! Mi smo više nego osvajači i za mene to znači da imamo pouzdanu pobjedu i prije nego što najdu problemi. „Pobjednički“ postaje naš novi identitet! Ne moramo živjeti sa mentalitetom žrtve, jer znamo da na kraju uvijek mi pobjeđujemo!

Kada smo potpuno uvjereni u ovo, ostaćemo pribrani i smireni. U 1. Korinćanima 15:58, apostol Pavle kaže da možemo biti „čvrsti, nepokolebljivi, uvijek obilovati Gospodnjim

djelima.“ Kako je ovo divan opis šta znači slijediti Isusa. Ovo je način na koji živi osoba kojoj je Bog temelj života. „Čvrst“ i „nepokolebljiv“ su karakteristike koje razvijamo kao rezultat toga što smo brigu ostavili na stranu i konstantno odlučujemo da živimo u nadi.

Nada donosi snagu i stabilnost u tvoj život. Kada si uvjeren da Bog sve drži pod kontrolom i da će uraditi nešto divno u tvojoj situaciji, onda nisi šiban životnim olujama; onda si usidren i siguran jer tvoja nada je u Gospodu.

## Koji od ovih si ti: Lešinar ili kolibri?

Jedan članak u Reader's Digest kaže:

I lešinar i kolibri leti iznad naše zemlje. Lešinari vide samo trulo meso, jer oni to i traže. Oni žive na takvoj ishrani. Ali kolibri ne obraćaju pažnju na smrdljivo meso mrtvih životinja. Oni traže cvjetove raznih boja na pustinjskim biljkama. Lešinari žive na onome što je bilo. Oni žive od prošlosti. Oni se pune onim što je umrlo i otišlo.

A kolibri žive na onome što jeste. Oni traže novi život. Oni se pune svježinom i životom. Svaka ptica nalazi ono što traži. Kao i svi mi.

**Razlika između  
lešinara i kolibrija je  
slična razlici između  
brige i nade.**

Razlika između lešinara i kolibrija je slična razlici između brige i nade. Kao i lešinar, i briga se hrani stvarima u kojima ne prebiva život: negativnošću, pesimizmom, strahom, tjeskobom. To je ružan način života jer divljački traži opstanak među umirućim i umrlim stvarima. Ali nada je drugačija. Kao i kolibri, nada je prelijepa. Nada traži novi život i hrani se onim što je sveže i novo.

Kao dijete Božije, imaš pravo da uživaš u životu, ali da bi tako živio, moraš izabrati da budeš pozitivan i da tražiš ono što je svježe i novo. Biti pozitivan znači stalno tražiti dobre stvari. Neprestano vjerovati i tražiti dobre stvari koje Bog ima za tebe, a ne očekivati narednu katastrofu.

Nije dovoljno samo se riješiti negativnosti – to je samo početak. Imaš priliku da se riješiš negativnosti...a onda da prigrliš pozitivnu životnu perspektivu!

Sjećam se kada je Bog snažno radio na meni zbog negativnosti i postavio je pred mene izazov da prestanem da mislim i izgovaram negativne stvari. Uspjela sam na nekoliko mjeseci i mislila sam da mi dobro ide, ali i dalje nisam vidjela nikakvu pozitivnu promjenu u mojim okolnostima. Dok sam proučavala ovu situaciju, osjetila sam da mi Bog pokazuje da iako sam uspjela u tome da ne budem negativna, još uvijek nisam bila pozitivna. Bog želi ne samo da prestanemo da radimo nešto pogrešno, nego i da počnemo da radimo nešto pozitivno. Apostol Pavle je naučavao da lopov ne treba više da krade, nego da radi da bi mogao da pomogne drugima koji su u potrebi. Rekao je da treba da izbjegavamo ljutnju i prezir i da budemo ljubazni prema svakome, radeći ono što će im biti od koristi. (Efesci 4:28, 31-32)

Bog želi da svjetovne principe zamijeni božanskim. To se vidi kroz cijelu Bibliju. On uzima naš grijeh i daje nam svoju pravednost. Uzima naše nedaće i daje nam svoj mir. Uzima našu tugu i daje nam svoju radost. Otklanja ono što je loše i unosi ono što je dobro.

Ovako to možda izgleda u tvom životu...

- Prestao si da se loše ponašaš prema nekome. To je dobar korak. Ali sada zakorači još jednom i počni se dobro ponašati prema toj osobi, blagosiljajući je kada god imaš priliku.

- Prestao si loše govoriti o ljudima, ali sada moraš biti uporan u tome da pronađeš neke dobre stvari koje bi mogao reći o njima.
- Prestao si stalno da se žališ zbog teškoća u životu. To je dobar korak. Ali sada počni da budeš zahvalan na dobrom stvarima koje doživljavaš svaki dan.
- Prestao si svako jutro da slutiš da ćeš imati najgori mogući dan. To je dobar korak. Ali sada počni da očekuješ da ćeš imati divan dan u Gospodu.

Kao što sam već spomenula u prethodnom pogavlju, Biblija kaže da je Bog pogledao na sve što je stvorio i rekao je da je bilo dobro (Postanje 1:31). Sviđa mi se kako je Bog vido i cijenio ono dobro. Mislim da mi treba da uradimo isto to. Izaberimo da budemo kolibri, a ne lešinari. Ostavimo po strani negativne stvari i krenimo u potragu za onim dobrim. Ne znam za tebe, ali ja bih radije bila kolibri nego lešinar.

## Podigni nadu!

Ako se u životu boriš sa brigom i strepnjom, onda bi ovo mogao biti momenat probaja za tebe. Možeš odlučiti da živiš život pun nade u Boga, radostan i optimističan zbog Njegovih planova za tvoj život. Briga nije dio tvoje prirode. To je neprijatelj kojeg možeš poraziti uz Božiju pomoć.

Kada dođe do teških situacija, ne moraš paničiti i biti uznemiren; možeš biti smiren i pribran. Gospod je tvoja stjena i On će te usidriti da ne bi bio šiban životnim olujama. Zato kreni i probudi svoje nade. Možeš biti kolibri, a ne lešinar. U svakoj situaciji možeš da vidiš dobro, a ne loše. Ako te prepadne neka oluja i turbulencija, ne brini... tvoj Nebeski Otac je tvoj pilot!

## 17. POGLAVLJE

# Neka se nada preliva

*A Bog nade neka vas ispunи svakom radošću i mirom u vjeri,  
da silom Svetoga Duha imate nade u izobilju.*

*Rimljani 15:13*

„Radost doseže dublje od očaja.“

— Corrie ten Boom

## Sve što možeš jesti!

Pažljivo sam razmotrila kako da započнем posljednje poglavlje ove knjige, ali stalno se vraćam na ove riječi: SVE ŠTO MOŽEŠ JESTI! Napisala sam preko stotinu knjiga, ali sa sigurnošću mogu reći da nikada ovako nisam započela poglavlje.

„Sve što možeš jesti“ je nešto što ne praktikuješ često, ali kada to radiš, vjerovatno maksimalno iskoristiš priliku. Skoro sam od nekoga čula da za svaki Dan zahvalnosti izvede porodicu na „Sve što možeš jesti“ veče i to je njihova porodična tradicija. Umjesto da kuvaju cijelo jutro i peru suđe cijelo veče, oni svake godine za Dan Zahvalnosti odu u isti restoran i uživaju u gozbi. Nekoliko puta se vraćaju do poslužavnika po još čurke – tanjur za tanjirom krompira, nadjeva, graška, slatkog krompira i sosa od brusnice. I ovom svečanom prilikom on i njegova žena dozvole djeci da odu do šanka sa desertima koliko god puta žele. Rekao mi je: „Joyce, izlazimo na 'sve što možeš jesti' večeru samo jednom godišnje ali kada izađemo, to je definitivno vrijedno potrošenog novca!“

Spominjem ovo na početku našeg posljednjeg poglavlja jer smatram da je nada jedno od jela na Božijem 'sve što možeš jesti' meniju. To nije jedino jelo koje On nudi, ali je među istaknutijim. Milost, nada, ljubav, oproštenje, prihvatanje, snaga, sigurnost – ovo su samo neke od stvari koje Bog nudi bez ograničenja. Nikada se ne možeš vratiti po još milosti previše puta. Nikada nećeš potrošiti Božiju zalihu ljubavi. Nemoguće je tražiti previše nade.

**Nemoguće je tražiti  
previše nade.**

U čemu god danas vjeruješ Bogu – bilo da se tiče tvoje porodice, emocionalnog zdravlja, fizičkog zdravlja, međuljudskih odnosa, karijere, finansija ili budućnosti – zaboravi na ograničenja. Vrati se do stola i napuni svoj tanjur nadom, koliko god puta je potrebno. Kada ljudi govore o tebi, oni treba da kažu: „Ovo je osoba kojoj se nada preliva. Šta god se događalo, kako god izgledalo sve oko nje, ona nikada ne odustaje od Boga.“

Posmatraj svoju dušu kao staklo; ne dozvoli da bude napunjena nadom samo do četvrtine. Ne zadovolji se ni do pola napunjenom čašom. Tri četvrine još uvijek nije dovoljno. Možeš čak i bolje od pune čaše – neka se nada izliva, preliva svugdje, pa i preko drugih ljudi. Neka se preliva nadom u Boga. Vjeruj da će On uraditi neuporedivo i preobilno više od onoga što mi možemo moliti ili misliti (vidi Efescima 3:20).

## **Bog više nego dovoljnoga**

Jedna od stvari koje znamo o Isusu je da On voli da prevažiće očekivanja. Ne postoji sumnja u Njegovu silu, jer On nam daje i više nego što nam je potrebno; daje nam ono što

nam je potrebno...i još preko toga. Ovo su stihovi koji potvrđuju ovaj princip:

A Bog može na vas da izlije obilje svake milosti (i ovozemaljski blagoslov), da u svemu uvijek imate svega dovoljno za sebe (da ne morate da tražite više, i da imate i da pomognete drugima) i još da vam preostane za svako dobro djelo, kao što je zapisano.

2. Korinćanima 9:8

Bog obećava dovoljno za tebe, a i preko toga da bi mogao pomoći i drugim ljudima. Ovo zvuči kao uzbudljiv način života i ja ne želim da ga propustim – a ti?

U Jovanovom Jevanđelju u šestom poglavlju nalazimo poznatu priču kako Isus hrani 5.000 ljudi (plus žene i djecu). Učenici su paničili jer su ovi ljudi bili gladni i nije bilo šanse da ih sve nahrane, jer nisu imali dovoljno hrane. Izgladnjela gomila i bespomoćni učenici – to nije dobro izgledalo.

Možeš li se poistovijetiti sa ovim osjećajem bespomoćnosti? Da li si ikada bio u situaciji da je problem bio toliko veliki da nije bilo šanse da ga sam riješiš?

- Brak ti pati i nemaš pojma kako da ga popraviš.
- Usamljen si i obeshrabren i nemaš pojma kako to da popraviš.
- Nisi više u milosti na poslu i nemaš pojma kako to da popraviš.
- Plata ti nije dovoljna da platiš sve račune i nemaš pojma kako to da popraviš.
- Djeca ti se muče sa gradivom u školi i nemaš pojma kako to da popraviš.

Ovako su se možda osjećali učenici. Gomila ljudi je nešto očekivala od njih, a oni su bili bespomoćni. Njihov problem

je bio prevelik, njihove mogućnosti premale. Zato su uradili jedino što se moglo uraditi – otišli su kod Isusa. Riječ Božija nam govori da je Isus uzeo to malo hrane koju su imali (pet vekni hljeba i dvije male ribe). Molio se nad tim i hrana se umnožila.

Na početku su učenici sigurno mislili da će hrane biti dovoljno za dvoje ili troje ljudi. Ali još zaliha je došlo iz ruke Spasitelja. Deset ljudi je bilo nahranjeno, 100 ljudi je bilo nahranjeno, 500 ljudi je bilo nahranjeno, 1.000 ljudi je bilo nahranjeno. Na njihovo zaprepaštenje, zaliha se stalno povećavala! A najnevjerovatniji dio priče nije samo što su svi bili nahranjeni – svi su jeli dok nisu bili potpuno siti...a ostalo je i 12 korpi ostataka. Isus je obezbjedio više nego dovoljno.

SVE ŠTO MOŽEŠ JESTI!

**Ako je Isus mogao  
da nahrani gladnu  
gomilu, samo  
pomisli šta sve  
može da uradi za  
jednu gladnu dušu.**

Ako je Isus mogao da nahrani gladnu gomilu, samo pomisli šta sve može da uradi za jednu gladnu dušu. Kroz šta god prolaziš danas, to se ne može porediti sa Božijom silom u tvom životu. Nema razloga da se brineš ili plašiš – nada je ovde. Isti taj Isus koji je obezbjedio toliko hrane da je ostalo 12 korpi viška – obezbjeđuje sve i za tebe.

Ne oklijevaj nego vjeruj i zamoli Boga da uradi nezamislivo u tvom životu. Bogu je najdraže da uzme nešto za šta se misli da je nemoguće i to pretvori u bezbroj mogućnosti. Kada se more ispriječilo na putu Njegovom narodu, On je razdvojio more. Kada sunce počinje da zalazi tokom neke pobjede, On naredi suncu da stane. Kada nemirna gomila ljudi ogladni, On ih nahrani iz kutije za užinu. Svaki put kada se On pomjeri, dođe neka pobjeda, svjetlost dana, i višak hrane. Zato nemoj moliti Boga samo za dovoljno; zamoli ga

za previše. Ne moli iz nekog sebičnog motiva, jer možda nećeš dobiti ništa, ali ako želiš više nego dovoljno da bi mogao da blagosloviš nekoga ko je u potrebi, onda možeš da očekuješ prekomjerno, izobilno, iznad i izvan svega onoga čemu se nadaš, za šta moliš ili na šta misliš. (Efesci 3:20)

U Lukinom Jevanđelju u petom poglavlju vidimo kako Isus prilazi svojim učenicima nakon što su pecali cijelu noć i ništa nisu ulovili. Rekao im je da idu u dublju vodu i da spuste mreže. Kada su to uradili, dogodilo se nešto divno.

I kad to učiniše, uhvatiše veoma mnogo ribe – toliko da su im se mreže cijepale. Zato mahnuše drugovima u drugom čamcu da dođu da im pomognu. Ovi dodoše pa oba čamca toliko napuniše da su počeli da tonu.

Luka 5:6,7

## Izaberi pravi oslonac

Često kada ništa ne ide kako treba, kada dobijemo loš savjet, ili nas razočara prijatelj, neko će nam reći: „Šta si očekivao, s obzirom na koga si se oslonio.“ Drugim riječima, oni kažu da je oslonac koji smo izabrali klimav i da je povreda bila neminovna.

Jedan od razloga zbog kojih se nada ne preliva kod ljudi je taj što biraju pogrešan oslonac. Oslanjaju se na posao, neku vezu, primanja, političku ideologiju, san, ili čak na bračnog druga da ih usreći i da im ispuni potrebe umjesto da se uzdaju u Boga. Na prvi pogled, nema ništa loše u ovim stvarima, ali one ne treba da budu glavni izvor naše nade. Bog je jedini izvor koji nikada ne presušuje. Na početku knjige smo govorili o važnosti toga da naša nada treba da potiče od Boga, ali nam je vrlo lako da odlutamo od te istine, pa hoću ponovo da je uključim i u ovo posljednje poglavlje.

### 1. Korinćanima 8:6 kaže:

Za nas postoji samo jedan Bog Otac, od koga je sve i za koga smo mi (imamo život), i samo jedan Gospod, Isus Hristos, kroz koga je sve i mi kroz njega (postojimo).

Bog je izvor svega i On je Onaj u Kojem imamo život. Ako tvoja nada potiče od bilo čega drugog osim od Boga, razočaraćeš se. Emocionalni stres pod kojim žive mnogi vjernici potiče iz oslanjanja na pogrešne oslonce. Ako je tvoja nada u nekoj osobi, u programu ili čak i u tebi samom, iznova i iznova ćeš biti isfrustriran i povrijeđen, jer ovi svi oslonci imaju svoja ograničenja. I što duže pokušavaš da izvučeš vodu iz ovih suvih bunara, razočaranje će biti sve dublje i glasnije.

### Psalam 42:11 kaže:

„Zašto si klonula dušo moja i zašto si žalosna? Uzdaj se u Boga jer ču ga još slaviti, koji je zdravlje lica mog i moj Bog.“

David je u ovom stihu uradio nešto veoma mudro. Iako se osjećao žalosno i mada nije bio pun nade, počeo se prijeći da treba da stavi nadu u Boga. Rekao je sebi: „*Danas ču nadu staviti u Boga i slaviću Ga. Nije važno da li sam raspoložen za to ili ne. Bog je moj oslonac i u Njega ču staviti nade!*“ Nije obraćao pažnju na svoje raspoloženje i odlučio je da se nada jedinom osloncu koji ga neće iznevjeriti. David je već iskusio Božiju oslobađajuću silu i znao je da je Bog vjeran.

Ne mogu nabrojati koliko puta mi je Bog pokazao svoju vjernost, a sigurno i ti možeš reći isto ovo i za sebe. Zašto bismo gubili vrijeme oslanjajući se na nešto klimavo? Stavimo svoje nade na pravo mjesto, da bismo izbjegli mnoga razočaranja.

## Kako nada izgleda

Pogled na Nijagarine vodopade, jedan od najljepših prizora u Sjevernoj Americi, oduzima dah. Čak i ako ih nisi video uživo, sigurno si na televiziji video njihovu veličanstvenost. Snažan tok rijeke i zaglušujući udar vodopada zaista nadahnjuju. Čudo i ljepota svijeta koji je Bog stvorio ne prestaje da me zadržava!

Mislim da ono što najviše fascinira u vezi s Nijagarinim Vodopadima je činjenica da se pad ove rijeke nikada ne isušuje. Skoro 2 miliona kubnih metara vode se svaki minut spušta niz ovaj vodopad i ovo nikada ne prestaje. Ova rijeka nikada nije prestala da teče ni jedan dan, pa rendžeri nikada nisu poslali posjetioce kući da bi se mogli odmarati na rijeci. Minut za minutom, sat za satom, dan za danom, voda i dalje teče.

Čak i ako si posjetio ove vodopade, znaš da im ne možeš prići a da ne osjetiš rijeku. Dok hodaš uz park, i prije nego što ugledaš rijeku, ti je čuješ. Tresak vodopada na stijenama je izuzetno jak. A kada se približiš, počneš osjećati izmaglicu. Vodopad prska na sve strane i ako se nađeš u blizini ove prirodne ljepote, završićeš sav natopljen. To je neprolazno čudo koje ostavlja utisak na svakoga ko s njim dođe u kontakt.

Ovo je divna slika onoga što nada može biti u tvom životu. Baš kao i rijeka koja nikada ne presušuje, i nada uvijek teče. Možeš plivati u njoj, piti je, dijeliti je sa drugima – koliko god da je uzmeš, ne možeš je iscrpiti. Izreke 23:18 obećavaju da „tvoja nada neće propasti“. To znači da se nikada neće desiti da odeš na rijeku nade i da tamo nađeš suvo korito. Bog je vječan, pa i nada u Njemu vječno izvire. Svaki dan svog života možeš da odeš kod Njega, pun vjere i nade, vjerujući da će On obezbjediti sve što ti je potrebno.

Nije nada samo rijeka koja nikada ne presušuje, nego je nada i vodopad koji obaspe svakoga ko priđe blizu. Možeš je čuti, vidjeti je i osjetiti u vazduhu oko sebe. Kada ti se nada preliva, to ne samo da utiče na tvoj život nego i na živote svih oko tebe. Tvoja nada se preliva na njih. Što su ti bliže, to više čuju hučanje vodopada i osjete izmaglicu u vazduhu. Uskoro ti kažu: „Velim biti u tvojoj blizini. Nešto je posebno u vezi s tobom. Pun sam nade kada pričam sa tobom.“

Svako jutro kada ustaneš, vjerujući Bogu na dobrim stvarima u životu, sjeti se vodopada. Svaki put kada si u iskušenju da se obeshrabriš i odustaneš od sna koji ti je Bog stavio na srce, sjeti se vodopada. I svaki put kada znaš da je nekom potrebno ohrabrenje, sjeti se vodopada. Nada nije neki tanak mlaz. Nada nije ni potok. Nada je moćan juriš vodopada zbog čijeg doživljaja ljudi putuju preko cijelog svijeta.

## U šta ćeš vjerovati?

Kritičan i ciničan svijet će te konstantno upozoravati da se ne nadaš. Reći će ti: „Ovo ranije nije dobro prošlo,“ ili: „Nemoj da se izlažeš razočaranju.“ Primoravaće te da budeš „razuman“ i da ne očekuješ previše, ali Bog nam kaže da očekujemo više nego dovoljno!

Želim da te ohrabrim da uradiš suprotno od onoga što bi svijet uradio. Ne dozvoli svom tjelesnom umu da vlada tvojim životom. Obnovi um prema Božjoj Riječi i nauči da razmišljaš kao što Bog razmišlja. U svakom poglavljju ove knjige vidjeli smo Božije stihove i obećanja koji te ohrabruju da se nadaš najboljem što Bog ima za tebe. Vidjeli smo biblijske primjere. Čuli smo priče običnih ljudi kao što smo ti i ja – muškaraca i žena koji su se usudli da se nadaju da će Bog ispuniti svoja obećanja. Moramo se zapitati: Šta ćemo izabrati? Da li nadu ili beznadežnost? Da li si spremjan da

živiš u sretnom iščekivanju da će se danas dogoditi nešto dobro u tebi, kroz tebe, za tebe, za tvoju porodicu, u tvojoj djeci, u svijetu, tvojim prijateljima, u tvojim okolnostima, na poslu, u školi, u vladu itd? Jedna stvar je sigurna: bezdežnost i negativnost nikada neće poboljšati ništa, ali ako postoji neka mogućnost da nada i vjera u Boga funkcionišu, zašto ne bismo to isprobali?

Jedna od najgorih laži neprijatelja koja te sprječava da živiš u sili nade je da je ne zасlužuješ. „Ne zасlužuješ da tražиш više od Boga. Ne zасlužuješ da vjeruješ u ono najbolje od Njega. Ne zасlužuješ da užиваš u životu, jer si već napravio previše grešaka.“ Svijet, tijelo i đavo će te podsjetiti na tvoje mane i neuspjehe, grijeha i nedostatke i tim osudama će pokušati da te spriječe da prideš Bogu srca punog nade.

Ovo je istina: Ti ne zасlužuješ nadu... kao ni ja. Oboje smo mnogo puta zabrljali; i kada bi nada zavisila od naše pravednosti, nikada je ne bismo mogli zaraditi. Ali moć Jevanđelja je u tome da, kada nas Bog vidi, On ne vidi naše neuspjele pokušaje da budemo pravedni. Umjesto toga On vidi savršeno djelo Isusove pravednosti. Kada smo bili usred svojih grijeha, slomljeni i daleko od Boga, Isus je došao i platio cijenu za nas. Njegova smrt je platila za svaki grijeh, svaku grešku, svaki neuspjeh i svaki nedostatak. Ne bi bilo šanse da zaradimo bilo šta od onoga što nam je Bog dao, ali Bog je to znao, pa nije ni tražio to od nas. Data nam je nada, ne zato što smo platili za nju, nego zato što Isus jeste. A Njegova plata je bila i više nego dovoljna.

**Data nam je nada,  
ne zato što smo  
platili za nju, nego  
zato što Isus jeste.**

### *Nada donosi...*

Oslobađanje od pritiska  
Pozitivnu promjenu raspoloženja  
Oslobađanje od depresije  
Želju da ponovo sanjaš  
Obećanje za bolje dane koji slijede  
Omekšalo srce  
Osvježen duh  
Motivaciju za postizanje ciljeva  
Smirenost uma i emocija  
Slobodu od brige  
Slobodu od straha  
Uživanje u životu  
Strpljenje u čekanju  
Pouzdanje koje te sprječava da odustaneš  
Uvjerjenje da se sve i svako može promijeniti  
Podsjetnik da Bog sve drži pod kontrolom  
Uzbuđenje zbog nepoznatog  
Pouzdanje da nikada nije kasno ponovo početi  
Shvatanje da nisi sam

Ovo je samo mali dio onoga što nada donosi, ali biću iskrena. Čak i ako si živio u nadi i nijedna od ovih stvari se nije desila, ipak je vrijedno nadati se jer ćeš biti sretniji sa njom, nego što bi ikada bio bez nje!

### **Sada kreni i Podigni nadu!**

Nada ne poznaje granice ni ograničenja. Što više vjeruješ, to je Bog zadovoljniji. Ali sjeti se – nada je jaka samo onoliko koliko je i ono iz čega potiče. Ako je tvoja nada u osobi, u poslu, ili u twojoj vlastitoj snazi i sposobnostima, bićeš nesretan i frustriran. Sve ove stvari imaju svoja ograničenja, ali Bog nema – neka on bude izvor tvoje nade.

Idi kroz dan pjevajući pjesmu koju je 1834. godine napisao Edward Mote:

*Moja nada je na Isusu, mojoj pravednosti  
Neću vjerovati ničemu  
Osim Isusovom imenu*

*Na Hristu, čvrstoj stijeni, stojim  
Sve ostalo kao pijesak tone*

*Njegova krv i Njegov savez  
Nose me kroz bujice  
Kada mi se duša raspe  
On je moja nada i tlo*

*Kada dođe uz zvuk trube  
Neka se u Njemu nađem  
Njemu, mojoj pravednosti  
Bez mane da stojim pred tronom*

Kreni i Podigni nadu! Nema razloga da ne uradiš to. Pri-druži se milionima drugih ljudi kroz vijekove, koji su iskoračili u nadu i nikada nisu požalili!



## Epilog

Prvo poglavlje knjige smo započeli pričom o Betty, Lošom Vijesti. Sirota Betty – ona ja bila u haosu, zar ne? Iako je imala divnu porodicu i zaista je voljela Gospoda, nije imala puno nade. Betty nije sretno iščekivala da će se dobre stvari dogoditi; obeshrabreno je očekivala loše, misleći da je to neizbjježno. Umjesto da očekuje najbolje, Beti je naginjala ka najgorem...i to je uticalo na njen život.

Isfrustriran, zabrinut, klonuo ili obeshrabren, možda se nekada možeš poistovijetiti sa Betty. Možda se nekada borиш da iskusiš izobilan, pobjednički i radostan život za koji je Isus umro da bi ga ti živio. Možda si kupio ovu knjigu jer ti je njen naslov zvučao kao neka dobra vijest, a to je ono što ti očajno treba.

Prije nego što ovaj tekst pošaljem izdavaču, željela bih da prvo lično razgovaram s tobom. Vidiš, za tebe imam velike nade. Vjerujem da Bog želi da te oslobodi iz teških okova po imenu „Ne mogu“ i „Prekasno je“, da bi mogao da poletiš na krilima zvanim „Mogu“ i „Ovo je pravo vrijeme.“ Sretno iščekujem da ćeš očaj i obeshrabrenje iz prošlosti ostaviti tamo gdje i pripada – u prošlosti – i da ćeš potrčati prema obećanjima za budućnost.

Ne znam tačno kroz šta prolaziš dok čitaš ove riječi. Možda ti sve odlično ide i uzbuđen si zbog neke nove avanture ili prilike. Možda se jedva provlačiš i pristaješ na „dovoljno dobro“ misleći: „*Ne može biti mnogo gore od ovoga.*“ Ili si toliko mnogo povrijeđen da se pitaš da li će bol ikada prestati.

Sa čim god se danas suočavaš – bilo veliko ili malo – vrijeme je da se ponovo nadaš. Vrijeme je da se nadaš milosti. Vrijeme je da se nadaš proboju. Prepreka koja je ispred tebe je prilika da Bog uradi nešto predivno u tvom životu. Nećeš izgubiti – Bog je na tvojoj strani, a On je nepobjediv.

Zato ustani i kreni. Podigni nivo očekivanja. Odbij da budеш zadovoljan „dobrim“ jer obećano ti je „odlično“. Danas je novi dan u tvom životu – a novi dan je savršeno vrijeme da podigneš nade.

# Dodatni biblijski stihovi o nadi

Stranice ove knjige su ispunjene stihovima o nadi, ali je navedeno još njih, radi dodatnog ohrabrenja.

## Nada za svakodnevni život

Gospod je moj dio, kaže moja duša; zato ću se nadati u njega.

Tužaljke Jeremijine 3:24

U nadi budite radosni, u nevolji strpljivi, u molitvi istrajni.

Rimljani 12:12

A vjera je pouzdanje (potvrda) u ono čemu se nadamo, osvjedočenje o stvarnosti koju ne vidimo.

Jevrejima 11:1

Nego, neka Gospod Hristos bude svet u vašim srcima i uvek budite spremni da odgovorite svakom ko od vas zatraži obrazloženje nade koja je u vama.

1.Petrova 3:15

Jer, Bogu ništa nije nemoguće.

Luka 1:37

Gle, oko Gospoda usmjereno je na one koji se njega boje, koji čekaju njegovu dobrotu.

Psalam 33:18

Izraele, čekaj Gospoda! Jer u Gospoda je dobrota, i obilje otkupljenja.

Psalam 130:7

A sve što je u prošlosti zapisano, zapisano je za našu pouku, da strpljivošću i utjehom Pisama imamo nadu.

Rimljani 15:4

Podupri me svojom riječi, i živjeću; da ne budem posramljen u svojoj nadi!

Psalam 119:116

Neka bude tvoja dobrota nad nama, Gospode, kao što čekamo tebe.

Psalam 33:22

Sjeti se riječi svom sluzi, koju si mi dao da očekujem!

Psalam 119:49

Da vam prosvjetli oči srca, da saznate kakva je nada na koju vas je pozvao, koliko je bogatstvo njegovog slavnog naslijedstva među svetima.

Efesci 1:18

Da preko dvaju nepromjenljivih činjenica, o kojima je nemoguće da bi Bog slagao, budemo silno ohrabreni mi koji smo pobjegli da dohvatimo nadu koja nam je ponuđena.

Jevrejima 6:18

Znaj da je mudrost takva tvojoj duši; ako si je našao, tada ima budućnosti, i neće se poništiti tvoja nada.

Izreke 24:14

Podsjećam se toga u svom srcu i zato se hoću nadati:  
„Dobrote su Gospoda da nismo uništeni: jer njegova smilovanja ne prestaju, ona su nova svakog jutra, velika je tvoja vjernost.

Tužaljke Jeremijine 3:21,22

Moja duša čezne za tvojim spasenjem, čekam tvoju riječ.

Psalam 119:81

Ti si moj zaklon i moj štit; čekam tvoju riječ.

Psalam 119:114

Koji te se boje, vidjeće me i obradovati se, jer čekam tvoju riječ.

Psalam 119:74

Koji kroz njega vjerujete u Boga, koji ga je vaskrsao iz mrtvih i proslavio, da vaša vjera i nada budu u Bogu.

1.Petrova 1:21

A mi želimo da svaki od vas do kraja pokaže istu revnost za ispunjenje nade.

Jevrejima 6:11

A sam naš Gospod, Isus Hristos, i Bog, naš Otac, koji nas je zavolio i svojom milošću nam dao vječnu utjehu i dobru nadu, neka utješi vaša srca i učvrsti vas u svakom dobrom djelu i reči.

2.Solunjanima 2:16,17

A nada nas ne iznevjerava, jer se Božija ljubav već izlila u naša srca kroz Svetog Duha, koji nam je dat.

Rimljanima 5:5

Čekao sam tvoje spasenje, Gospode; i držao sam tvoje zapovijedi.

Psalam 119:166

Jer, za to se mi trudimo i borimo: mi smo svoje nade položili u Boga živoga, koji je Spasitelj svih ljudi, prije svega onih koji vjeruju.

1.Timoteju 4:10

Neka je blagosloven Bog i Otc našeg Gospoda Isusa Hrista. On nas je u svom velikom milosrđu, vaskrsenjem Isusa Hrista iz mrtvih, ponovo rodio za živu nadu.

1.Petrova 1:3

Da opravdani njegovom milošću postanemo nasljednici, imajući nadu u vječni život.

Titu 3:7

Jer, za sve ljude se pojavila Božija milost, koja donosi spasenje. Ona nas uči da se odrekнемo bezbožnosti i ovozemaljskih požuda, da u ovom svijetu živimo razborito, pravedno i pobožno dok isčekujemo blaženu nadu i da se u slavi pojavi veliki Bog i naš Spasitelj, Isus Hristos.

Titu 2:11-13

Vjere i spoznanja zasnovanih na nadi u vječni život, što ga je Bog, koji ne laže, obećao pre postanka sveta.

Titu 1:2

A mi, pošto pripadamo danu, budimo trijezni, navucimo oklop vjere i ljubav i kacigu nade u spasenje.

1.Solunjanima 5:8

Ta vjera i ljubav dolaze od nade koja je za vas spremljena na nebesima, a za koju ste već čuli u Riječi istine – Jevandelju.

Kološanima 1:5

Ako se samo u ovom životu uzdamo u Hrista, najbjedniji smo od svih ljudi. Ali, Hristos jeste vaskrsao iz mrtvih, kao prvenac onih koji su umrli.

1.Korinćanima 19,20

## Molitva spasenja

Bog te voli i želi da ima lični odnos s tobom. Ako još uvijek nisi prihvatio Isusa Hrista kao svog Spasitelja, možeš to sada uraditi. Samo Mu otvori svoje srce i moli ovu molitvu...

„Oče, znam da sam ti zgrijeo. Molim te da mi oprostiš. Očisti me. Obećavam da će da se predam Tvoj Sinu, Isusu. Vjerujem da je On umro za mene – uzeo je moj grijeh na sebe kada je umro na krstu. Vjerujem da je podignut iz mrtvih. Predajem svoj život Isusu sada.

Hvala ti, Oče, za tvoj dar oproštenja i vječnog života. Molim te, pomozi mi da živim za Tebe. U Isusovo ime, amin.“

Kako si se molio iz srca, Bog te je primio, očistio te i oslobođio iz ropstva duhovne smrti. Odvoji vremena da čitaš i proučavaš ove stihove i zamoli Boga da ti govori dok sa Njim putuješ u svoj novi život.

Jovan 3:16

Efesima 1:4

1. Jovanova 1:9

1. Jovanova 5:1

1. Korinćanima 15:3-4

Efesima 2:8-9

1. Jovanova 4:14-15

1. Jovanova 5:12-13

Moli se i zamoli Ga da ti pomogne da nađeš dobru crkvu koja proučava Bibliju da bi se ohrabrio i rastao u svom odnosu sa Hristom. Bog je uvijek s tobom. On će te voditi dan po dan i pokazati ti kako da živiš izobilan život koji On ima za tebe!



## O autoru

JOYCE MEYER je jedna od vodećih svjetskih učitelja Biblije. Njena emisija, "Uživanje u svakodnevnom životu sa Joyce Meyer", se emituje na stotinama televizijskih mreža i radio stanica širom svijeta.

Joyce je napisala više od 100 inspirativnih knjiga. Neki od njenih bestselera su: *Revolucija ljubavi, Lepota umesto pepela, Nikad nemoj odustati, Isceljenje slomljenog srca, Vođa u nastajanju, Power Thoughts; The Confident Woman; Look Great, Feel Great; Starting Your Day Right; Ending Your Day Right; The Every-day Life Bible; Approval Addiction; How to Hear from God; Beauty for Ashes; i Bojno polje uma.*

Joyce intenzivno putuje i cijele godine održava konferencije i govori hiljadama ljudi širom svijeta.

**Želite li saznati više, ili nas informisati  
kako je ova knjiga uticala na vaš život**

**PIŠITE NAM NA**

**Hrišćanska međunarodna misija Syloam  
Masarikova 8, 21433 Silbaš, Srbija**

.....

**ILI NAM POŠALJITE MAIL NA ADRESU**

**[joycemeyer@syloam-international.org](mailto:joycemeyer@syloam-international.org)**

.....

**EMISIJE “UŽIVANJE U SVAKODNEVNOM ŽIVOTU  
SA JOYCE MEYER” MOŽETE GLEDATI NA:**

**[www.media.syloam-international.org](http://www.media.syloam-international.org)**



**[tv.joycemeyer.org](http://tv.joycemeyer.org)**

Jedna od najmoćnijih sila na svijetu je nada – sretno, uvjereni očekivanje da će se dogoditi nešto dobro. Nada te krije kroz najmračnija vremena i ona je gorivo koje ti je potrebno da ostvariš snove. Kakve god da su okolnosti, bez nade je nemoguće živjeti potpuno ispunjen život. Ali traženje ovog oslonca u pogrešnim stvarima – poslovnom ugledu ili u nekoj drugoj osobi – vremenom vodi do razočaranja. Nada je jaka koliko i njen izvor, a kada je utemeljiš na vjeri u Boga, naći ćeš beskrajnu zalihu nepokolebljive nade. U ovoj knjizi Joyce Meyer, broj jedan autor časopisa *New York Times*, dijeli praktične savjete i biblijsku mudrost koja će ti pomoći da otkriješ silu nade koja se nalazi jedino u Hristu. Naučićeš kako da čvrsto utemeljiš nadu u Boga da bi dobio neograničenu radost i mogućnosti u životu. Kako Joyce objašnjava: „*Bez nade u Boga, nema puno toga što možeš uraditi, ali sa nadom u Boga, nema mnogo toga što ne možeš uraditi!*“ danas i svaki dan možeš očekivati nešto dobro od Boga i podigni nadu!

---

EMISIJE "UŽIVANJE U SVAKODNEVNOM ŽIVOTU SA JOYCE MEYER"  
MOŽETE GLEDATI NA:

[WWW.MEDIA.SYLOAM-INTERNATIONAL.ORG](http://WWW.MEDIA.SYLOAM-INTERNATIONAL.ORG)

[TV.JOYCEMEYER.ORG](http://TV.JOYCEMEYER.ORG)

.....

DOK IDEŠ KROZ OVU KNJIGU, NADAM SE DA ĆEŠ VIDJETI DA BOG ŽELI DA „IMAŠ ŽIVOT I DA GA IMAŠ U IZOBILJU“. ON ŽELI NAJBOLJE ZA TEBE DUHOVNO, MENTALNO, EMOCIONALNO, FIZIČKI I U TVOJIM MEĐULJUDSKIM ODНОSIMA — SVAKE GODINE, SVAKOG DANA, SVAKOG MOMENTA. I KADA ZNAŠ DA BOG ZA TEBE ŽELI NAJBOLJE, NEMAŠ IZBORA NEGO DA BUDEŠ ISPUNJEN NADOM. BOG ŽELI DA ISPUNI SVE TVOJE POTREBE I DA TI OMOGUĆI DA POMOGNEŠ DRUGIM LJUDIMA.

AKO SI DANAS POVRIJEĐEN, SUMNJAŠ DA ĆE SE IŠTA PROMIJENITI NA BOLJE... **PODIGNI NADU.**

AKO SE MUČIŠ U ŽIVOTU PITAJUĆI SE POSTOJI LI DALJE ... **PODIGNI NADU.**

AKO PODIŽEŠ DJECU I PITAŠ SE ŠTA JE ŽIVOT PRIPREMIO ZA NJIH... **PODIGNI NADU.**

AKO ULASI U UZBUDLJIVU AVANTURU, RIZIKUJUĆI VIŠE NEGO IKADA RANIJE... **PODIGNI NADU.**

JOYCE

.....

OVA KNJIGA JE POKLON OD JOYCE MEYER  
I NE SME SE PRODAVATI!

The logo for Syloam features the word "Syloam" in a stylized, lowercase, italicized font. Above the letter "y", there is a small circular icon containing a red "YouTube" logo. To the right of the "y", there is a green circle with a white "v" for YouTube. To the right of the "m", there is a blue circle with a white "f" for Facebook.

[www.press.syloam-international.org](http://www.press.syloam-international.org)  
[www.media.syloam-international.org](http://www.media.syloam-international.org)



978-80-89414-53-6

